

APÓSTOLO AG TỠ NÉN HAN KĂME

¹ Teófilo, inh livro ve ki sóg ã mỷ Jesus tỡ nén han kar tó ja nĩ, ti tỡ nén han vén mũ ẽn ti, ti tỡ nén han rén ẽn ti ke gé. Ti tỡ ẽg kanhrăn mũ ẽn rán sóg huri ke gé.

² Kỡ sóg ti tỡ kanhkă ra tăpry mũ rán huri ke gé. Ầ tỡ kanhkă ra tăpry to hă tóg apóstolo ag mré vēmén ja nĩ ver, ầ tỡ ừn kuprẽg mũ ag mré. Topẽ kuprĩg tỡ ti mỷ nén tó mũ ẽn tó tóg mũ ag mỷ, ag tỡ ki hă han jé.

³ Ầ ter kar kỡ Jesus tóg ag mỷ vẽn ven tỡ hẽn ri ke han ja nĩ, kură tỡ 40 (ke) ki. Rĩr măn kỡ tóg ag mỷ vẽn ven ja nĩ, ti tỡ ừn kuprẽg ja ẽn ag mỷ. Ag tỡ ti ve kỡ, ag tỡ ti mré vēmén kỡ ag tóg ti rĩr jẽ ki kanhró nỹtĩ, apóstolo ag. Ag mỷ tóg Topẽ tỡ tỡ ẽg pã'i nĩ kămén mũ, Jesus ti.

⁴ Kejẽn tóg ag mré nĩ nĩ. Kỡ tóg ag mỷ: “ver cidade tỡ Jerusalém tá kăpa tũg nĩ,” he mũ. “Tá nỹtĩ kỡ Topẽ tỡ ăjag mỷ nén tó ja jăvăn nĩ,” he tóg, “isỹ ăjag mỷ nén tó ja ẽn ti,” he tóg.

⁵ “Joăo vỹ goj tỡ ẽg kygpe ja nĩgtĩ,” he tóg. “Hă ra kănhar ăjag tóg Topẽ kuprĩg tỡ jagrẽ venh ke mũ. Sỹ ăjag kypenh ken hă vẽ,” he tóg, Jesus ti. Kỡ tóg tĩ mũ sir.

Jesus tỡ kanhkă ra tũg

⁶ Kejẽn ag tóg vẽn măn măn mũ sir, Jesus tỡ ừn vin mũ ag. Kỡ tóg ag mré nĩ nĩ, Jesus ti. Kỡ ag tóg ti mỷ: “Senhor,” he mũ. “Ầ mỷ ừ ri ẽg pã'i mág fẽg

mãn mũ', ěg povo tỹ Israel tỹ pã'i mág?" he ag tóg ti mỹ.

⁷ Hã ra tóg ag mỹ: "vó," he mũ. "Topě hã ki kanhro nĩ," he tóg. "Ājag tũ pijé'," he tóg. "Kurã ěn ki kanhrãn ke tũ ājag tóg nĩ, Topě tỹ ājag pã'i mág fěg mãn ke kurã ti. Topě hã ne kurã tag tónh ke mũ," he tóg.

⁸ "Hã ra Topě kuprĩg vỹ tỹ ājag jagrě nĩnh ke mũ. Kỹ ti hã vỹ ājag tar han ke mũ, ājag tỹ inh kãmén jé. Cidade tỹ Jerusalém tá ājag tóg inh kãmén ke mũ, ga tỹ Judéia tá ke gé, ga tỹ Samaria tá ke gé, ga fyn ja tá hã ke gé mỹr," he tóg, Jesus ti.

⁹ Ā tỹ tag tó kar kỹ tóg vãhã kynh mỹ tãpry mũ sir ag rĩnve, kỹ kanhkã góg vỹ ti kri rũm ke mũ sir, ti ve mãn tũ ag tóg nĩ sir.

¹⁰ Hã ra ag tóg kanhkã tugnyĩm mũ, ag tỹ ti tĩg ven kỹ, ti tỹ ũn vin mũ ag.

Kỹ vãhã ũn régre ag tóg tá nỹtĩ, kur kupri rĩnh kỹ. Topě tỹ jěně jafã ag vě, ũn régre ěn ag.

¹¹ Kỹ ag tóg ag mỹ: "ha vé, Galiléia tá ke'," he mũ. "Ājag hã ne tóg kanhkã tá ěvãnh nỹtĩ nĩ'," he ag tóg. "Jesus vỹ vỹn kenh mũ, ti tĩg ja ěn ri ke han jé tóg ke mũ. Ti tỹ kanhkã ra tãpry vě, hã ra tóg tá kãtére mãn ke mũ gé," he ag tóg, Topě tỹ jěně jafã ag, Jesus tỹ ũn vin mũ ag mỹ.

Ag tỹ Matias fěg

¹² Kỹ Jesus tỹ ũn vin mũ ag tóg vỹnvỹn ke mũ sir, Jerusalém ra, krĩ tỹ Oliveiras tá kãmũ kỹ. Jerusalém kakó kã ti nĩ, 1 quilômetro tá ti nĩ hỹn, krĩ tỹ Oliveiras ti.

13 Ag tỹ Jerusalém tá junjun kỹ ag tóg ĩn to jãpry jafã to jãpry mũ, tá nỹtĩ jé, ĩn kri. Ũ tỹ tá nỹtĩ ag hã vê: Pedro, João, Tiago, André, Filipe, Tomé, Bartolomeu, Mateus, Tiago ũ hã vỹ: Alfeu kósin, he mũ, Simão ke gé, vỹ tar han tĩ tag ti, Judas ke gé, Tiago kósin tag ti.

14 Ag kar ên tóg Topê mré vỹ mũ, jagnê mré, ũn tỹtã fag mré hã, Maria fi mré hã, Jesus mỹnh ên fi, Jesus jãvy ag mré hã ke gé, ha mẽ.

15 Kejên Jesus mré ke tỹ hên ri ke ag vỹ tá nỹtĩ nĩ, ĩn to jãpry jafã ên tá, ũ tỹ 100 kri 20 (ke) hỹn.

16 Kỹ Pedro vỹ tóg jêg nê mũ, kỹ tóg: “ha vé, inh kanhkã,” he mũ. “Vãsỹ tóg rán kỹ nĩ, Judas to,” he tóg. “Topê kuprĩg tóg Davi krĩn ja nĩgtĩ, ti tỹ Judas to rán jé,” he tóg. “Hã ra tóg ki hã tó ja nĩ, vênh rán ki,” he tóg. “Ag jãmĩ tóg kãtĩg ja nĩ, Judas ti, ũ tỹ Jesus kãgmĩnh ke mũ ag jãmĩ.

17 Hã ra tóg tỹ êg mré ke ja nĩ, kỹ ti tỹ nén han mũ tóg êg tỹ nén han mũ ri ke ja nĩ gé,” he tóg, Pedro ti.

18 “Hã ra tóg Jesus kato jãnkamy mãn ja nĩ, kỹ tóg jãnkamy ên tỹ êpỹ kajãm ja nĩgtĩ. Hã ra tóg ã nunh kã vênh jãján ja nĩ, kỹ tóg tam ke kỹ kutê ja nĩ, kỹ ti nug tóg jar ja nĩ, kỹ ti nug tóg kãkutê ja nĩ, kỹ tóg ter ja nĩ, Judas ti,” he tóg, Pedro ti.

19 “Kỹ Jerusalém tá ke kar ag tóg mêng mũ sir, hã kỹ ag tóg ti japỹ to: Aceldama, he mũ, hã vỹ: êpỹ kyvênh, he mũ, êg vỹ ki,” he tóg, Pedro ti.

20 “Êg tỹ Topê mỹ jãn jãn jafã ki tag tóg rán kỹ nĩ, hã mẽ: ên jamã vỹ vag ke mũ, ũ pi(jé) ki êmãn mãn mũ’, he tóg, vênh rán ki, Judas to,” he tóg, Pedro ti. “Kỹ ũ vỹ ge nĩ gé, hã mẽ: ũ ũ tỹ ti jêg ja kã jênh ke

kỹ ti rānhrāj han ke vễ, he tóg mũ gé, vễnh rán ki,” he tóg, Pedro ti.

²¹ “Hã kỹ ẽg tỹ ẽg mré mũ tĩ ù jāvānh ke vễ. Jesus mré tóg tĩg ja nĩgtĩ, ẽg tỹ ùn jāvānh ke mũ ti, kỹ tóg Jesus tỹ ga mĩ tĩ ẽn ve ja nĩgtĩ gé.

²² João tỹ Jesus kype ve ja tóg nĩ gé. Jesus tỹ kanhkā ra tấpy ve ja tóg nĩ gé. Jesus tỹ nén han mũ kar ve ja tóg nĩ, ẽg tỹ ùn jāvānh ke mũ ti. Kỹ tóg sir Jesus rĩr mǎn tónh ke mũ ẽg mré,” he tóg, Pedro ti.

²³ Kỹ ag tóg ùn régre ag vin mũ, hã vỹ: José, he mũ, ti jyjy ù hã vỹ: Barsabás, he mũ. Fóg tỹ ti jiji hã vỹ: Justo, he mũ. Ti mré ag tóg Matias fẽg mũ gé.

²⁴ Kỹ ag tóg Topẽ mré vĩ mũ, kỹ ag tóg tag tó mũ, ha mẽ. “Èg jóg!,” he ag tóg ti mỹ. “Èg tỹ nén to jykrén mũ ki kanhró ã tóg nĩ,” he ag tóg mũ. “Ă hỹn ù tỹ hẽ kuprẽg, ùn régre tag ag kã,

²⁵ ti tỹ ẽg mré ã rānhrāj tag han jé, ti tỹ tỹ ẽg mré apóstolo jẽ jé? Judas vĩ ã rānhrāj tovānh, kỹ tóg ã tỹ ra tĩg ke ẽn ra vyr. Kỹ ù tỹ hẽ nỹ ti jẽg ja kã jẽnh mũ ha?” he ag tóg mũ, Topẽ mỹ.

²⁶ Kỹ ag tóg to jogar he mũ sir, hã ra Matias tóg Judas jẽgja kã jẽ nĩ. Hã kỹ tóg tỹ ù tỹ 11 (ke) ag mré ke nĩ sir, tỹ tóg apóstolo jẽ sir.

2

Topẽ kuprĩg tỹ tỹ ẽg jagrẽ

¹ Vāhã tóg festa tỹ Pentecostes kurā tá krỹg mũ. Kỹ vễnh kar vĩ vễnh mǎn kỹ nỹtĩ nĩ, Jesus ki ge kỹ nỹtĩ kar ẽn ag.

² Kŷ vāhā kanhkā tá kóho ri ke tóg mẽ há tĩ, króg he mũ ěn ti. Kŷ ĩn tóg kóho ri ke ěn tŷ fór mũ. Hã ra ag tóg ĩn ěn ki nŷtĩ, Jesus ki ge kŷ nŷtĩ ag.

³ Kŷ ag tóg nén nē vég mũ, hã ra tóg tŷ pĩ gru hã pē nĩ, nén nē ěn ti. Vēnh kăpópâm kŷ tóg nĩ nĩ, pĩ gru hã pē ěn ti. Kŷ tóg ag kri nĩ' nĩ' he kăn mũ, pĩ gru hã pē ěn ti.

⁴ Kŷ Topē kuprīg tóg ag ki ge kăn mũ, kŷ ag tóg vēnh vĩ ù tugtó mũ, Topē kuprīg tŷ ag krĩn kŷ, ti tŷ tŷ ag jagrē nĩn kŷ.

⁵ Hã ra Jerusalém tá ke ù ag tóg Topē to há nŷtĩ gé. Israel ag vē gé, hã ra ag tóg povo tŷ hēn ri ke mĩ mogmog ja nĩ. Hã kŷ ag vĩ tóg tó tŷ hēn ri ke nĩ.

⁶ Ag tŷ kóho ri ke ěn mẽ kŷ ag tóg vēnh măn mũ. Kŷ ag tóg ājag vĩ e ěn ki Pedro ag tŷ nén tó mũ mēg mũ.

⁷ Kŷ tóg ag mŷ e tĩ. Ag fe tŷ hēn ri ke nĩn kŷ ag tóg: “ha vé, Galiléia tá ke ag vē mŷr,” he mũ. “Galiléia tá ke ag vĩ vyr mŷ vĩ nŷtĩ.

⁸ Hã ra ěg tóg ěg vĩ pē ki ag vĩ jēmēg mũ,” he ag tóg.

⁹ “Ěg kã ù ag tóg Pártia tá kãmũ mũ, kŷ ù ag tóg Média tá kãmũ mũ gé, ù ag tóg ga tŷ Elão tá kãmũ mũ, ù ag tóg ga tŷ Mesopotâmia tá kãmũ mũ, ù ag tóg Judéia tá kãmũ mũ, ù ag tóg Capadócia tá kãmũ mũ, kar kŷ Ponto tá, Ásia tá,

¹⁰ Frígia tá, Panfília tá, Egito tá, ga tŷ Líbia tá, cidade tŷ Cirene ěn mã tá. Û ag tóg cidade tŷ Roma tá kãmũ mũ gé.

¹¹ Û ag tóg tŷ Israel nŷtĩ, kar kŷ ù ag tóg tŷ fóg tŷ Israel jykre han mũ nŷtĩ gé. Û ag tóg goj vāso tŷ Creta tá kãmũ mũ, ù ag tóg ga tŷ Arábia tá kãmũ mũ

gé. Ēg kar tóg ěg vī pē ki ag tỹ Topē kāmén mũ mēg mũ, ag tỹ Topē tỹ nén han ja kāmén mũ ti, Topē tỹ milagre hyn han ja ěn ti,” he ag tóg.

¹² Ājag mỹ e tĩn kỹ ag tóg jagnē mỹ: “ne nē hỹn’?” he mũ. Ag fe tóg jũrũn ke mũ, ag tỹ ge ve ja tũ nỹtĩn kỹ.

¹³ Ū ag tóg hã ra nyg mũ. “Kronkron kỹ ag kãgter mũ mỹr,” he ag tóg.

Pedro tỹ ag mỹ Topē vī tó

¹⁴ Kỹ Pedro tóg ũ tỹ 11 (ke) ag mré jēgnē mũ, kỹ tóg jamã hár(a) ag mỹ: “inh kanhkã’,” he mũ. “Jerusalém tá ke’,” he tóg. “Jēmē há han ra, sỹ ājag mỹ nén tó mũ ti,” he tóg.

¹⁵ “Ājag hã tóg ěg to: kronkron kỹ ag kãgter mũ, he mũ. Hã tũ vē hã ra. 9 horas vē ver, meio dia to hãn sa mỹr,” he tóg. “Ag kronkron kỹ ag tóg rãkãnh kỹ kronkron kỹ kãgter mũgtĩ, ũn kronkron mũ ěn ag,” he tóg. “Hã kỹ ěg tóg kron ja tũ nĩ,” he tóg, Pedro ti.

¹⁶ “Hã ra tóg vãsỹ rán kỹ nĩ, ěg tỹ ũri nén vėg mũ ti. Topē vī tó tĩ tỹ Joel tóg vãsỹ tag tó ja nĩ, ha mē:

¹⁷ “kurã tỹ ěgno to hã sóg inh kuprĩg jēnēnh mũ, vēnh kar mỹ, tĩ tỹ tỹ ājag jagrē nĩ jé,” he ja tóg nĩ, Topē ti. “Kỹ ājag krē ag tỹ fag mré Topē vī mē kỹ tónh ke vē. Kyrũ ag tỹ nén nē venh ke vē. Kófa ag tỹ vēnh pétinh ke vē.

¹⁸ Sỹ inh camarada ag mỹ inh kuprĩg jēnēnh ke vē gé, fag mỹ ke gé. Kỹ fag tóg inh vī tónh ke mũ gé,” he tóg, Topē ti.

¹⁹ “Ājag tỹ nén han vãnh han jé sóg ke mũ gé, ājag mỹ, kanhkã tá, ga tá ke gé, ěprã, kyvėnh mỹr, pĩ mỹr, nĩja mỹr.

20 Kŷ rā tŷ kutyg ke vē, kysā kyvénh ke vē gé. Kar kŷ Topē kurā vē sir, kurā mág ěn ti.

21 Kŷ ũ tŷ Topē mŷ nén kar to vī mŷ ěn kren ke vē sir,” he tóg, Topē ti. Joel tŷ tón hā vē, vāsŷ,” he tóg, Pedro ti.

22 “Inh kanhkā', inh vī jēmē ra,” he tóg. “Nazaré tá Jesus vē mŷr,” he tóg. “Ti hā tóg nén han vānh hyn han ja nŷgtī, Topē jykre hyn han ja tóg nŷgtī, Topē tŷ ti jēnēn kŷ. Hā ra Topē tóg Jesus mŷ tó ja nŷ, ti tŷ milagre ěn hyn han jé. Kŷ tóg ājag rŷnve hyn han, ājag tŷ ve jé, Jesus to jykrén jé. Hā kŷ ājag tóg vé,” he tóg, Pedro ti.

23 “Hā ra Topē tóg ājag mŷ ti fēg sór ja nŷ, Jesus ti. Kŷ tóg to jykrén kŷ ājag mŷ ti fēg ja nŷ. Jāvo ājag tóg ka to ti sa ja nŷ, ti tén ja ājag tóg nŷ. Kŷ ũ tŷ ka to ti sāg mŷ ěn ag jykre vŷ pāno tāvī nŷ.

24 Hā ra Topē tóg ti rŷn mǎn ja nŷ, hā kŷ tóg vēser jagēgtar ěn tŷ tŷ' he ja nŷ ti mŷ. Hā kŷ tóg vēser jamā tá nŷg mág ja tŷ nŷ, Jesus ti,” he tóg, Pedro ti.

25 “Hā kŷ Davi tóg Jesus jo tag tó ja nŷ, kŷ tóg Jesus tŷ ā jóg mré vī ri ke nŷ. Ti to tóg: “ěg jóg!,” he ja nŷ. “Ā vég isóg nŷ nŷ,” he ja tóg nŷ. “Inh pēgja tá ā tóg nŷ nŷ, hā kŷ sóg krónh ke tŷ nŷ,” he ja tóg nŷ, Davi ti.

26 “Hā kŷ inh fe tóg mrin ke mŷ. Vī sér han isóg nŷ nŷ. Iser kŷ inh fár tóg nŷnh ke mŷ, hā ra sóg to krī kufy tŷ nŷ.

27 Inh kuprŷg vŷ vēnh kuprŷg jamā tá nŷnh ke tŷ nŷ. Inh fár vŷ vag ke tŷ nŷ gé, sŷ tŷ ā tŷ kuprēg ja nŷn kŷ,” he ja tóg nŷ, Davi ti, Topē mŷ.

28 “Inh kanhrān ā tóg nŷ nŷ, isŷ kanhkā to ěpry ěn ve há han jé, kanhkā to ěmŷn ěn ti. Isŷ ā mré nŷn kŷ tóg inh mŷ sér tāvī tŷ,” he ja tóg nŷ. Davi tŷ Jesus tón

hã vễ,” he tóg, Pedro ti.

29 “Inh kanhkã’,” he tóg. “Ēg jóg'jóg tỹ Davi kāmén há han jé sóg ke mũ ãjag mỹ,” he tóg. “Vãsỹ ti ter mỹr, kỹ ag tóg vễnh kej tá ti péju, hã ra ěg tóg vég tĩ, ti kej ti, Davi kej ti,” he tóg.

30 “Ă tỹ ga mũ tĩg kỹ tóg hã ra Topě vĩ tó tĩ ja nĩgtĩ, Davi ti. Topě tóg ti mỹ: “ă krě'krě ag kã ũ vỹ tỹ pã'i tỹ rei nĩnh mũ,” he ja nĩgtĩ, Topě ti.

31 Topě vĩ tag kri fi kỹ tóg Cristo rĩr măn ke tó ja nĩgtĩ gé, Davi ti. Hã kỹ tóg ă vĩ ẽn tó ja nĩgtĩ. Cristo pí(jé) vễser jamã tá nĩg mág han', kỹ ti fár vỹ vag ja tũ nĩ gé,” he tóg, Pedro ti.

32 “Cristo vễ, hã vỹ: Jesus, he mũ. Topě vỹ ti rĩn măn, kỹ ěg kar tóg ti ve ja nĩgtĩ,” he tóg.

33 “Topě tóg ti mỹ: “kunĩg, inh pějja tá nĩ,” he ja nĩ, Jesus ti mỹ. Kỹ ěg jóg tóg ti mỹ ă tỹ ěg mỹ nén tó ja fěg, hã vỹ: Topě kuprĩg, he mũ. Hã kỹ tóg ěg mỹ tỹ jagrě han mũ, Topě kuprĩg tỹ, Jesus ti. Hã kỹ ãjag tóg ũri tag vég mũ, tag mễg mũ,” he tóg, Pedro ti.

34 “Davi hã tóg rĩr măn ja tũ nĩ ver, kanhkã ra tóg tãpry ja tũ nĩ ver, ge ra tóg tag tó ja nĩ, ha mễ: “ěg jóg mág vỹ inh Senhor mỹ tag tó ja nĩ, hã vỹ: “nĩ ra ver, inh pějja tá,” he ja tóg nĩ,

35 “sỹ ă kato vãsãnsãn mũ ag tỹ ă jakrěm vin jé, ag sigse jé,” he ja tóg nĩ. Davi tỹ tón hã vễ,” he tóg, Pedro ti.

36 “Jesus tag hã vỹ, ãjag tỹ ka to ũn sãg mũ tag hã vỹ: tỹ ěg Senhor nĩ, he mũ,” he tóg. “Topě vỹ ti to: “tỹ tóg Cristo nĩ,” he mũ. “Tỹ tóg vễnh kar Senhor nĩ,” he tóg. Ēg tỹ vễnh vĩ tag kri finh ke vễ. Ēg povo tỹ Israel tỹ ti ki kanhrãn ke vễ, ěg vĩ tag kri nĩm ke

vē,” he tóg, Pedro ti, ũ tỹ vėnh mǎn kỹ nỹtĩ kar ag mỹ.

³⁷ Ag tỹ ti vĩ jēmē kỹ ti jykre tóg ag kāra rǎ mũ sir. Kỹ ag tóg ti mỹ: “kỹ ěg hỹn hẽ ri kenh mũ, vỹ?” he mũ, Jesus tỹ ũn vin mũ kar ag mỹ ke gé.

³⁸ Kỹ Pedro tóg ag mỹ: “ājag jykre tovǎnh ra,” he mũ. “Kỹ ěg tóg ājag kygpenh ke mũ, Jesus Cristo jiji tó kỹ,” he tóg. “Kỹ Topē tóg ājag mỹ ājag tỹ ti vĩ mranh ja ěn tỹ vėnh pǎte fón ke mũ. Kỹ ājag tóg Topē kuprĩg tỹ jagrē nỹtĩnh mũ gé, Topē tỹ ājag mỹ ti jēnēn kỹ.

³⁹ Ti tỹ ājag hǎ mỹ ti nĩm ke vė inhhǎ, ājag krē mré hǎ ke gé. Ti tỹ ũn mỹ vėnh vĩ jēnēg mũ kar ag mỹ tóg nĩm tĩ, Topē ti, ěg jóg mág ti, ag tỹ ver kuvar há tá mũ hǎ ra,” he tóg, Pedro ti.

⁴⁰ Vĩ tỹ hěn ri ke han tóg, Jesus kāmén kỹ. Ag jyvėn tóg mũ gé, kỹ tóg ag mỹ: “Jesus mỹ: “inh kren han nĩ,” hemnĩ,” he mũ. “Ěg kar vỹ vėnh jykre pǎno han kǎn, ā jykre han vǎnh nỹtĩn kỹ. Kỹ inh kren han nĩ, hemnĩ, Jesus mỹ,” he tóg, Pedro ti.

⁴¹ Ũ tỹ ti vĩ han mũ ag kygpég ag tóg mũ sir. Kurǎ ěn kǎ ũn kygpe kỹ nỹtĩ ag vỹ tỹ ũ tỹ 3 mĩl nỹtĩ hỹn, hěn ri ke mũn.

⁴² Ěn ag vỹ kurǎ kar ki Jesus tỹ ũn vin mũ ag vĩ jēmē jé vėnh mǎn tĩ, jagnē ve jé ke gé. Kỹ ag tóg Jesus jamĩ ko mũ sir. Kỹ ag tóg ti mré vĩ mũ gé, kurǎ kar ki.

Jesus ki ge mũ ag jykre ti

⁴³ Kỹ Jesus tỹ ũn vin mũ ag tóg ěg tỹ nén han vǎnh tỹ hěn ri ke han tĩ nỹtĩgtĩ. Hǎ kỹ vėnh kar tóg Topē kamēg tĩ.

⁴⁴ Jăvo ũ tỹ Jesus ki ge kỹ nỹtĩ ag tóg jagně mré vėnh jykre pir han mũgtĩ. Kỹ ag kuge vỹ jagně tũ ri ke nỹtĩ.

⁴⁵ Ũ ag tóg ģjag kuge ũ vāvăm mũ gé, jănkamy kato, kỹ ag tóg ũn jănkamy tũ ag mỹ vėnh kăpópăm mũ.

⁴⁶ Kură kar ki ag kar tóg Topě jo ģn ra mũ tĩ, ag tỹ ti mré vĩ jé. Ąjag ģn kăki ag tóg Jesus jamĩ ko mũgtĩ gé. Jatun mỹ ag tóg sir jėgiėg mũ. Kỹ tóg ag mỹ sér tĩ sir.

⁴⁷ Kỹ ag tóg Topě mỹ: “há ti nĩ,” he ti gé. Jó vėnh kar tóg ag to há nỹtĩ gé. Kỹ Topě tóg kură kar ki ũ ag mỹ krĩ há nĩm tĩ gé, kỹ ag tóg ti ki ge mũ, ag krenkren jé. Hă kỹ ag tóg koměr hă e nỹtĩ.

3

Ũn grĩ tỹ há' he

¹ Kejėn Pedro tóg João mré Topě jo ģn ra mũ mũ, meio dia păte 3 horas ki. Israel ag tỹ Topě mré vĩ jafă vė, hă vỹ: 3 horas, he mũ.

² Topě jo ģn tá ũ tóg nĩ nĩ, ũn grĩ. Ą mũr mũ kă tóg ge nĩ. Topě jo ģn jănkă tá tóg nĩ nĩ, jănkă sĩnvĩ he mũ ģn tá. Tá tóg: “ĩnh mỹ nén ũ nĩm,” he nĩgtĩ, ũ tỹ Topě jo ģn kăra ge mũ ag mỹ.

Ĕn va ag tóg kămũ mũ, jănkă tá ti nĩm jé. Kỹ João mré Pedro tóg Topě jo ģn tá junjun mũ.

³ Ũn grĩ tỹ Pedro ag ve kỹ tóg ag mỹ nén ũ to vĩ mũ.

⁴ Kỹ Pedro ag tóg ti tugnỹm mũ. Kỹ Pedro tóg ti mỹ: “ėg ki ģvănh ra,” he mũ.

⁵ Kỹ tóg ag ki ģvănh mũ. “Ag hỹn ģnh mỹ jănkamy nĩm ke mũ,” he tóg.

⁶ Hã ra Pedro tóg ti mÿ: “jãnkamy tóg inh mÿ tũ tĩ,” he mũ. “Sÿ nén ma tĩ hã tÿ sóg ã mÿ nĩm mũ, hã vÿ: Jesus Cristo jyjy hã tó kÿ, Nazaré tá ke ên jiji tó kÿ sóg ã mÿ: ha jêg, he mũ, ha mĩ tĩg, he sóg ã mÿ,” he tóg, Pedro ti, ùn grĩ mÿ.

⁷ Kÿ tóg ti pēgja tá ti kãgmĩ kÿ ti fêg mũ.

Kÿ vãhã ti pēn tóg tar' he mũ sir, ti pēn nágán ti.

⁸ Hũm hen kÿ tóg jê nĩ sir. Jêg há' he tóg mũ sir. Mĩ tóg tĩ mũ sir. Ag mré tóg Topê jo ãn kãra rã mũ sir. Tá tóg mĩ tĩ kÿ hũm hũm he mũ. Topê mÿ tóg vĩ há han mũ sir.

⁹ Kÿ vēnh kar tóg ti vég mũ, ti tÿ mĩ tĩg kÿ, ti tÿ Topê mÿ vĩ há han kÿ.

¹⁰ Ag tÿ ti ve kÿ ag tóg ti ki kanhró nÿtĩ. “Topê jo ãn jãnkã tá nĩ ên hã vê mÿr,” he ag tóg mũ. “Jãnkã sĩnvĩ he mũ ên tá nĩ mũn hã vê mÿr,” he ag tóg mũ. “Vēnh kar mÿ: inh mÿ nĩm, he tĩ ên hã vê mÿr,” he ag tóg ti to. Kÿ tóg ag mÿ e tĩ sir. Ag fe tóg jũrũn ke mũ sir, ag tÿ ti ven kÿ.

Pedro tÿ Topê jykre kãmén mũ

¹¹ Hã ra tóg Pedro mré João mré tĩ mũ, ùn grĩ ja ên ti. Hã kÿ vēnh kar tóg ag to vēnh mãn mũ, Topê jo ãn krēm, pã'i tÿ Salomão he mũ ên sala tá. Vēnh kar ag mÿ tóg e tĩ, ùn grĩ ên tÿ há' hen kÿ.

¹² Æ tÿ ùn e ên ag ve kÿ Pedro tóg ag mÿ: “inh kanhkã’,” he mũ. “Æjag fe hã ne tóg jũrũn ke mũ’,” he tóg. “Æg tÿ vēsóg ki ti tÿ há' he tũ vê. Topê tÿ ti tÿ tĩg há' he vê mÿr. Æg tÿ vēnh jykre kuryj han mũ ra êg tóg ge han ki kagtĩg nÿtĩ vê,” he tóg, Pedro ti, ùn e ên ag mÿ.

¹³ “Æg jóg'jóg ve ag vÿ Topê to há ja nÿtĩgtĩ, Abraão ti, Isaque ti, Jacó ti ke gé. Topê ên vê mÿr, ù tÿ ti tÿ

há' he mū ti," he tóg. "Topē ěn vỹ ā kósín tỹ ũn mág han. Ti kósín hā vē, hā vỹ: Jesus, he mū. Hā ra ājag tóg fóg ag mỹ ti fēg ja nĩgtĩ. Fóg tỹ pā'i tỹ Pilatos vỹ: "ti kavān jé sóg ke mū," he mū vē. Hā ra ājag tóg ti mỹ: "nejé," he ja nĩgtĩ.

14 Ũ tỹ vēnh jykre kuryj han mū to ājag tóg: "nejé," he ja nĩgtĩ, Topē tỹ ũn kuprēg mū ěn to, Jesus ěn to. Hā ra ājag tóg ũ tỹ ũn tén mū to: "ti kyvān ra," he ja nĩgtĩ.

15 Ũ tỹ ěg rĩnrĩr han tĩ ěn tén ja ājag tóg nĩgtĩ mỹr. Topē tóg hā ra ti rĩn mān ja nĩ, ti ter mū hā ra, kỹ ěg tóg ti ve ja nĩgtĩ," he tóg, Pedro ti, ũn e ěn ag mỹ.

16 "Kỹ ěg tóg Jesus ki ge mū. Hā kỹ Jesus tóg ũn grĩ ja tag tỹ tar' he mū, ājag tỹ ũn vég mū tag ti, ājag tỹ ũn ki kanhrān mū tag ti. Jesus vỹ ti tỹ ā ki rā han. Kỹ ti tỹ Jesus ki rā kỹ tóg há' he mū sir, ājag rĩnve," he tóg, Pedro ti.

17 "Inh kanhkā," he tóg. "Ājag tỹ ki kagtīg nỹtĩn kỹ, hā kỹ ājag tóg Jesus tén ja nĩgtĩ. Hā kỹ ājag pā'i ag tóg ti tén ja nĩgtĩ," he tóg.

18 "Hā kỹ Topē tóg vāsỹ rán kỹ nĩ ěn han. Topē vĩ tó tĩ ag kar tóg vāsỹ Jesus jagtar ke ti tó ja nĩgtĩ, Topē tỹ ag mỹ: ha tó, hen kỹ. "Topē tỹ ũn jēnēg mū ěn tỹ jagtar ke vē, Cristo ti," he ja ag tóg nĩgtĩ, Topē vĩ tó tĩ ag," he tóg, Pedro ti.

19 "Kỹ ājag jykre tovānh nĩ. Topē jykre ki gemnĩ, Topē tỹ ājag tỹ ti vĩ mranh tỹ tũ' he jé.

20 Hā kỹ ājag tóg tỹ Topē mré ke nỹtĩ, kỹ tóg ājag krĩ tỹ kānhvy' henh ke mū, Topē ti. Kar kỹ tóg ājag mỹ ti jēnē mān mū gé, ti tỹ ājag mỹ ũn jēnēnh ke ěn ti, Cristo ti, hā vỹ: Jesus, he mū," he tóg, Pedro ti.

21 “Ti tỹ kanhkā tá nĩ vĕ ver. Ti tỹ ã kurã pétĕm kỹ tóg vāhã tá vỹn kenh mũ, Topĕ tỹ nĕn kar han mǎn ke kurã ĕn kã,” he tóg.

“Hã kỹ Topĕ tóg vāsỹ ã vĩ tó tĩ ag mỹ tó ja nĩgtĩ, ag tỹ vĕnh kar mỹ ti vĩ tó jé, ti tũ ag kar mỹ.

22 Hã kỹ Moisés vỹ tag tó ja nĩ, ha mẽ: “Topĕ vỹ ãjag mỹ ã vĩ tó tĩ ù jĕnĕnh ke mũ, ãjag mré ke ù, ti tỹ ãjag mỹ Topĕ vĩ tó jé, inh ri kén. Ĕn ti vĩ jĕmĕmnĩ,” he ja tóg nĩgtĩ, Moisés ti,” he tóg, Pedro ti.

23 “Ũ tỹ ti vĩ jĕmĕ jāvānh ĕn ter ke vĕ,” he ja tóg nĩgtĩ, “ĕn pi(jé) tỹ Topĕ tũ nĩ,” he ja tóg nĩgtĩ, Moisés ti,” he tóg, Pedro ti.

24 “Topĕ vĩ tó tĩ ag kar vỹ tó ja nĩgtĩ, ĕg tỹ ũri vĕg mũ tag ti. Samuel vỹ tag tó vén ja nĩgtĩ, kar ti nón ke ag kar tóg tag tó ja nĩ gé vāhã,” he tóg, Pedro ti.

25 “Topĕ vĩ tó tĩ ĕn krĕ vỹ tỹ ãjag nỹtĩ,” he tóg. “Ājag jóg!jóg ve ag hã mré tóg jykrĕn ja nĩgtĩ, Topĕ ti, Abraão hã mré. Hã kỹ tóg Abraão mỹ: “ã kósin ũ hã tugrĩn sóg vĕnh kar to há nĩnh mũ,” he ja nĩgtĩ, Topĕ ti,” he tóg, Pedro ti.

26 “Ājag hã mỹ tóg ã kósin jĕnĕ, ti rĩn mǎn kỹ, Topĕ ti. Ājag hã mỹ tóg tó vén, ãjag tỹ tỹ Israel nỹtĩn kỹ. Ājag hã mỹ tóg tó, ãjag tỹ ãjag jykre pǎno tovānh jé. Ti tỹ ãjag krĩn sór vĕ, ãjag tỹ tovānh jé, ãjag jykre pǎno ĕn ti,” he tóg, Pedro ti, ù tỹ Topĕ jo ĩn krĕm vĕnh mǎn kỹ nỹtĩ ĕn ag mỹ.

4

Pã'i ag tỹ Pedro mré João to jũ

¹ Ag tỹ ver vĕmĕn kỹ nỹtĩ ra Topĕ tũ ki rĩr tĩ ag tóg tá junjun mũ. Topĕ jo ĩn to capitão vỹ ag mré tá jun

mũ gé, Saduceu ag ke gé, ũ tỹ: “ĕg hỹn rĩnrĩr mǎn ke tũ nĩ ha, ĕg ter kar kỹ,” he mũ ĕn ag.

² Pedro ag to ag tóg jũgjũ mũ, ag tỹ: “Jesus vỹ rĩr mǎn,” hen kỹ. “Kỹ ĕg tóg ti ri kén rĩr mǎn mũ gé, ĕg ter kỹ,” he ag tóg, Pedro ag. Hǎ kỹ pǎ'i ag tóg ag to jũgjũ mũ.

³ Hǎ kỹ ag tóg Pedro ag sigség mũ, vĕse jafǎ kǎtá ag tóg ag vǎm mũ, ag tỹ kǎtá nũgnũr pir han jé. Rǎké ti nỹ ha, hǎ kỹ ag tóg: “ha ver kǎtá nũgnũr,” he mũ.

⁴ Hǎ ra ũ tỹ hĕn ri ke ag tóg Pedro ag vĩ mĕ ja nĩgtĩ, kỹ ag tóg sir ti vĩ kri fig mũ. Ũ tỹ 5 mil (ke) ag vĕ, Jesus ki ge kỹ nỹtĩ ag, ĕg tỹ ũn tỹtǎ fag mré tó tũ hǎ ra.

⁵ Tỹ vaj kỹ pǎ'i ag tóg vĕnh mǎn mũ, kófa ag mré hǎ, Topĕ vĩ to professor ag mré hǎ. Jerusalém tá ag tóg vĕnh mǎn mũ.

⁶ Topĕ tũ ki rĩr tĩ to pǎ'i mág jyjy hǎ vỹ: Anás, he mũ. Ag pǎ'i mág ũ jijin hǎ vỹ: Caifás, he mũ. Pǎ'i mág kankhǎ ũ jyjy hǎ vỹ: João, he mũ, kỹ ũ jijin hǎ vỹ: Alexandre, he mũ. Pǎ'i mág mré ke kar ag vỹ tá vĕnh mǎn kỹ nỹtĩ.

⁷ Vĕnh kujy ki ag tóg Pedro ag vin mũ, kỹ ag tóg: “ũ nỹ ājag mỹ vĕnh jykre tag nĩm, ājag tỹ ũn grĩ ĕn tỹ há' he jé?” he mũ. “Ũ jykre tỹ ājag ti tỹ há' hé?” he ag tóg mũ, Pedro ag mỹ.

⁸ Kỹ vǎhǎ Topĕ kuprĩg tóg Pedro krĩn mũ. Kỹ tóg: “ha vé,” he mũ.

⁹ “Nén ũ há to ājag tóg ĕg kugmĩg mũ, ĕg tỹ ũn grĩ tỹ há' he mũ ĕn to,” he tóg. “Kỹ ājag tóg vǎhǎ ĕg jykre jĕmĕ sór mũ ha,” he tóg.

¹⁰ “Ājag mỹ sóg ĕg jykre tónh mũ, Israel kar tỹ ki kanhró nỹtĩ jé,” he tóg. “Jesus tugrĩn tóg há' hé,

Nazaré tá ke ěn tugrĭn tóg tar jě nĭ, ājag tỹ ũ tỹ ka to sĕg mũ ěn hĕ tugrĭn. Topě tóg ti rĭn mĕn ja nĭ, ũ tỹ cruz to ter mũ ěn ti. Ěn vỹ ti tỹ há' hé, ũn grĭ ja ěn ti,” he tóg, Pedro ti.

11 “Jesus ěn hĕ to tag tóg rán kỹ nĭ, Topě vĭ tỹ rán kỹ nĭ ěn ki, ha mĕ: ājag tỹ pó tỹ ĩn han kỹ ājag tóg pó ũ fón, ti tỹ ājag mỹ kórég nĭn kỹ. Hĕ ra Topě tóg pó ěn hĕ tỹ ĩn nũna han mũ,” he ja tóg nĭ, Topě vĭ ki, Jesus to,” he tóg, Pedro ti.

12 “Ũ pi(jé) ěg kren han ke mũ'. Topě tóg Jesus fĕg inhĕ, ti hĕ tỹ ěg kren han jé, ti hĕ tỹ ěprĕ ke ag krenkren han kĕn jé, kanhkĕ krĕm ke kar ěn ag. Ěg kren han ke mũ ũ venh ke tũ ěg nĭ mỹr,” he tóg, Pedro ti, pĕ'i ag mỹ.

13 Pĕ'i ag tỹ Pedro vĭ mĕ kỹ tóg ag mỹ e tĭ. “Ěg kamĕg tũ ag tóg nĭgtĭ mỹr,” he ag tóg, Pedro to, João to ke gé. “Vĕnh rán sĭ ag nỹtĭ vĕ mỹr, escola ki ge mág ja tũ ag nỹtĭ vĕ,” he ag tóg. To jykrĕn kỹ ag tóg ag ki kanhró nỹtĭ. “Jesus mré ke ag vĕ,” he ag tóg mũ, Pedro ag to. Kỹ tóg ag mỹ e tĭ.

14 Hĕ ra ũn grĭ ja tóg tá jĕ ag mré. Kỹ ag tỹ ne tỹ ag kato vĭnh ke tóg tũ tĭ sir.

15 Kỹ ag tóg Pedro ag mỹ: “ha ver kĕpa jĕg,” he mũ. Kỹ pĕ'i ěn ag tóg ver jagnĕ mré to jykrĕn mũ.

16 Kỹ ag tóg: “Ěg hỹn ag tỹ hĕ ri kenh mũ ha'?” he mũ. “Jerusalém tá ke kar vỹ ag tỹ nĕn han mũ ki kanhró kar nỹtĭ. Kỹ ag jykre tóg vĕnh kar mỹ há nỹ. Kỹ ěg tỹ ag to: ag ón vĕ, hen kỹ tóg tỹ ũn nỹ sir,” he ag tóg jagnĕ mỹ.

17 “Ag tỹ hĕ ra vĕnh kar mỹ Jesus tó kỹ tóg tỹ ũ nỹ gé,” he ag tóg. “Kỹ ěg tỹ ag mỹ: ha tó mĕn tũg, henh ke vĕ,” he ag tóg. “Ājag tỹ ti tó mĕn kỹ ěg tóg ājag vóg

kónān ke mū ha, he jé ěg tóg ke mū ag mý,” he ag tóg jagně mý.

¹⁸ Ký ag tóg Pedro ag jé prěr mǎn mū. Ký ag tóg: “Ker ũ mý tó mǎn hě’,” he mū. “Ker Jesus tý vī mǎn hě’,” he ag tóg mū ag mý.

¹⁹ Hã ra Pedro tóg João mré ag mý ke mū. “Topě tóg ěg mý: “ha vėnh kar mý tó,” he ja nĩ. Ājag tóg hã ra: “ker tó hě’,” he mū. Ěg hýn ũ tý hě vī han mū’, Topě vī vó, ājag vī vó?” he tóg ag mý. “Ne ný hýn Topě mý há nĩnh mū?” he tóg. “Ěg mý tó,” he tóg.

²⁰ “Ěg pi(jé) tó tūg mū’, ěg tý nén vég mū ti, Jesus tý ěg mý nén tó ja ěn ti,” he tóg ag mý, Pedro ti.

²¹ Hã ra pã’i ag tóg: “ker tó hě’, ker tó hě’,” he mǎn mū gé. Ký ag tóg ag kygvāg mū sir. Ājag tý ag vóg kónān há ra ag tóg ag vóg kónān tū nĩ, vėnh kar tý ag to há nýtĩn ký, vėnh kar tý Topě to: “há ti nĩ, ti hã ne tóg ũn grĩ ěn tý há’ he mū’,” hen ký.

²² Hã ra ũn grĩ ja ěn tóg tĩ nĩ sir. 40 anos kǎfór han tóg, ký Topě tóg ti tý há’ hé.

Jesus mré ke ag tý Topě mré vī

²³ Pedro ag tý kygvar ký mū ký ag tóg ājag mré ke ag to mū mū. Ký ag tóg pã’i tý ājag mý nén tó ěn kāmén mū, kófa ag tý: “ker Jesus tó hě’,” he mū ěn ti.

²⁴ Ký vėnh kar ag tóg tag jēmě ký Topě mý vī há han mū, jagně mré. Ký ag tóg: “ěg jóg mág’,” he mū. “Tý ā tóg vėnh kar kri ke nĩ,” he ag tóg mū. “Kanhkã han ā mýr, ga ti, goj ti ke gé, mĩ mū ag kar ke gé,” he ag tóg.

²⁵ “Ěg jóg’jóg tý Davi krĩn ja ā tóg nĩgtĩ, ā camara da ěn ti. Ā kuprĩg tý ā tóg ti krĩn ja nĩ. Ký tóg

Jesus tó ja nĩgtĩ, kũ tóg: “fóg kar ag ne tóg jũgũ mũ, kanhgág ag ke gé,” he ja nĩ. “Inh kanhkã tỹ Israel ag ne tóg nén ũ tũ to jykrén!,” he ja tóg nĩ.

²⁶ “Nação kar ag pã'i ag vỹ vėnh génh kũ nỹtĩ, ěg pã'i ag ke gé, Topě kato tēgtē jé, Topě tỹ ũn kuprēg mũ ěn ag kato,” he ja tóg nĩgtĩ, Davi ti,” he ag tóg, Topě mỹ.

²⁷ “Hã ra tóg ki hã tó ja nĩ. Ěmã tag ki ag tóg vėnh génh kũ nỹtĩ, ã kósin kato, ã tỹ ũn kuprēg mũ ěn kato, ũn kuryj nĩ ěn kato, hã vỹ: Jesus, he mũ,” he ag tóg. “Pã'i mág tỹ Herodes vỹ ti kato tē mũ gé, pã'i tỹ Pilatos ke gé, ag tỹ ũ to: Põncio, he mũ ěn, fóg ag kar, Israel ag kar ke gé,” he ag tóg. “Tag ag kar vỹ vėnh génh kũ nỹtĩ, ã kósin kato,” he ag tóg.

²⁸ “Ă tỹ nén to jykrén mũ han ag tóg mũ sir, ã kato tēgtē mũ tag ag. Vãsỹ ã tóg to: ge tĩ jé tóg ke mũ, he ja nĩgtĩ,” he ag tóg, Topě mỹ.

²⁹ “Pã'i ag tỹ ěg mỹ nén tó mẽ ã tóg, ag tỹ ěg mỹ: ker tó hě', he mũ tag ti. Kũ ěg tỹ tar' hemnĩ, ěg tỹ ag kamēg tũ nĩn jé, ěg tỹ ã vĩ tó jé, ěg tỹ tỹ ã camarada nỹtĩn kũ,” he ag tóg, Topě mỹ.

³⁰ “Kũ ěg mré milagre hyn han nĩ gé. ũn kagyga ag tỹ há' hemnĩ, ěg tỹ nén han vãnh han nĩ, ěg tỹ ã mỹ to vĩn kũ, ěg tỹ ã kósin tỹ Jesus jyjy tó kũ, ěg tỹ ũn kuryj nĩ ěn tó kũ,” he ag tóg, Topě mỹ.

³¹ Ag tỹ ti mré vĩ kar kũ ga tóg jũrũn ke mũ sir, ag tỹ tá nỹtĩ hã ra. Kũ Topě kuprĩg tóg ag krĩn mũ gé. Kũ ag tóg mũmēg vãnh kũ Topě vĩ kãmén mũ sir.

Jesus ki ge kũ nỹtĩ ag jykre pir

³² ũ tỹ Jesus ki ge kũ nỹtĩ ag tóg jykre pir han kũ nỹtĩ. ũ pi(jé) ã kuge to: “isũ vė,” he tĩ'. Ājag kuge

kar to ag tóg: “ĕg tũ vĕ,” he tĩ.

³³ Jesus tỹ ũn vin mũ ag tóg ĕg Senhor tỹ Jesus rĩr mǎn tugtó mũ, to tar pĕ nỹtĩn kỹ. Kỹ Topĕ tóg ag ki rĩr há han mũ gé sir.

³⁴ Ag mré ke ũ pi(jé) jagǎgtar nỹtĩ! Ag kǎmĩ ũ tóg ĕpỹ nỹtĩ, kar ũ tóg ĩn nỹtĩ gé. Ājag tũ ĕn funfón ag tóg mũ, kỹ ag tóg ti kaja ma kǎmũ mũ.

³⁵ Jesus tỹ ũn vin mũ ag mỹ nĩm jé, jǎnkamy ti. Kỹ ũn jagǎgtar ag tóg jǎnkamy ĕn to Ājag tỹ nén ve sór mũ ĕn mǎn mũ sir.

³⁶ Kỹ ũ tóg nĩ gé, ti jiji hǎ vỹ: José, he mũ. Jesus tỹ ũn vin mũ ag tóg ti to: Barnabé, he tĩ, hǎ vỹ: vĕnh jyvĕn krĕ, he mũ, hǎ vỹ: Barnabé, he mũ. Levi kósin'kósin ũ vĕ. Goj vǎso tỹ Chipre tá ke vĕ.

³⁷ Ĕn hǎ vỹ ĕpỹ nĩ, kỹ tóg Ā japỹ fón mũ, kỹ tóg Jesus tỹ ũn vin mũ ag mỹ ti kaja ma kǎtĩ mũ. Kỹ ag tóg jagnĕ mỹ kǎnhkrég mũ sir.

5

Ananias fag tỹ Topĕ mỹ ón

¹ Kỹ ũ tóg nĩ gé, ti jyjy hǎ vỹ: Ananias, he mũ. Jǎvo ti prũ fi jiji hǎ vỹ: Safira, he mũ. Ĕn vỹ tóg Ā japỹ fón mũ gé.

² Kỹ tóg Ā prũ fi mỹ: “ti kaja vĕnh kǎpóv péju kỹ ĕg tóg nĩm mũ,” he mũ. Ti vĕnh kǎpóv ũ tỹ tóg Jesus tỹ ũn vin mũ ag mỹ nĩm mũ. “Ĕg japỹ kaja kar hǎ vĕ,” he tóg mũ ag mỹ, ón kỹ.

³ Kỹ Pedro tóg ti mỹ: “Satanás hǎ ne tóg Ā krĩn ja nĩ!,” he mũ. “Hǎ kỹ Ā tóg Topĕ kuprĩg mỹ ón. Hǎ kỹ Ā tóg ti kaja vĕnh kǎpóv péju kỹ nĩm ja nĩ!,” he tóg. “Hǎ ra Ā tóg ti tỹ Ā krĩn mũ ra: “nejé,” he ja tũ nĩ, Satanás mỹ,” he tóg.

⁴ “Ā japỹ vĕ (mỹr), ha mẽ,” he tóg. “Kỹ ti kaja vỹ tóg tỹ ã tũ nĩ gé sir,” he tóg. “Kỹ ã tỹ ma kãtĩ tũ nĩ hã ra tóg tỹ nĕn ù tũ nĩ vĕ,” he tóg. “Hã ra ã tóg ã ón ke to jykrĕn ja nĩgtĩ, ã tỹ ti kaja to ón jĕ,” he tóg. “Hã kỹ ã tóg ĕg mỹ ón, hã ra ã tóg Topĕ hã mỹ ón mũ,” he tóg, Pedro ti.

⁵ Ananias tỹ ti vĩ mẽ kỹ tóg kutĕ mũ, ti ter vĕ sir. Û tỹ mĕg mũ ag kar mỹ tóg e tĩ, kỹ ag fe tóg jũrũn ke mũ.

⁶ Kỹ kyrũ ag tóg jĕgjĕg nĕgnĕ kỹ ag tóg ti fi han mũ. Kỹ ag tóg ti va mũ mũ, kỹ ag tóg ti kĕnh mũ sir.

⁷ 3 horas tũg kỹ ti prũ fi tóg mĩ kãtĩ mũ gé. Hã ra fi tóg ã mén ter mẽ ja tũ nĩ ver.

⁸ Kỹ Pedro tóg fi mỹ: “ãjag mỹ ti kaja tag to fón, ãjag japỹ ti?” he mũ fi mỹ.

Kỹ fi tóg: “hỹ, ti kaja tag to ĕg tóg fón,” he mũ, ón kỹ.

⁹ Kỹ Pedro tóg fi mỹ: “ãjag ne tóg jagnĕ mré to jykrĕn ja nĩ gé,” he mũ. “Topĕ kuprĩg mỹ ãjag ón mỹr. Û tỹ ã mén kĕnh mũ ag vỹ mĩ kãmũ jĕg. Ā va ag tóg mũnh mũ gé,” he tóg fi mỹ, Pedro ti.

¹⁰ Kỹ fi tóg kutĕ kỹ hun ke mũ gé sir. Kyrũ ag tỹ junjun kỹ ag tóg fi ter vĕg mũ gé, kỹ ag tóg fi kĕnh mũ mũ gé, fi mén mré.

¹¹ Kỹ Jesus ki ge kỹ nỹtĩ kar ag fe tóg jũrũn ke mũ, ù tỹ mĕg mũ kar ag ke gé.

Hã kỹ Ananias fag tóg Topĕ mỹ ón tugrĩn kãgter mũ. Kỹ tóg vĕnh kar mỹ e tĩ sir.

Ag tỹ Jesus tỹ ùn vin mũ ag vóg kónãn

¹² Jesus tỹ ùn vin mũ ag tóg nĕn ve vãnh tỹ hĕn ri ke hyn han mũgtĩ, vĕnh kar mỹ. Jesus ki ge kỹ nỹtĩ

kar ag vỹ kurã kar ki vẽnĥ mãn tĩ, pã'i tỹ Salomão he mũ ěn sala tá, Topẽ jo ĩn krẽm.

13 Jesus ki ge tũ ag tóg venĥ kãmũ tũ nĩgtĩ, ag tỹ ag kamẽg kỹ. Hã ra tóg vẽnĥ kar mỹ há tĩ sir, Jesus ki ge kỹ nỹtĩ ag jykre ti.

14 Kurã kar ki ũ tóg to jykrẽn ke mũ, Jesus ki rã jé, ũ tỹ hẽn ri ke ag, fag ke gé. Hã ki ag tóg e nỹtĩ sir, Jesus ki ge mũ ěn ag.

15 Kejẽn ag tóg ũn kagyga gé kãmũ mũ gé vãhã, ěpryn kri, ěmĩn kri. Tá ag tóg cama kri nỹtĩ, nỹg jafãn ki. Kỹ ag tóg Pedro jãvãnh mũ. “Ti kãnhvæg tỹ ěg mũ tĩg kỹ ũ tóg hẽn ri ke mũn tỹ há' henĥ ke,” he ag tóg.

16 ũ tỹ hẽn ri ke ag tóg Jerusalém tá vẽnĥ mãn mũ, ěmã kar tá kãmũ ěn ag. ũn kagyga ag gé(g) ag tóg kãmũ mũ, ũn jagrẽ kórég ag ke gé. Kỹ ag tóg há' he kãn mũ sir.

17 Kỹ Topẽ tũ ki rĩr tĩ to pã'i mág tóg jũ tãvĩ nĩ, ti mré ke kar ag ke gé, Saduceu he mũ ěn ag kar.

18 Kỹ ag tóg Jesus tỹ ũn vin mũ ag sigség mũ, vẽnse ja mág tá.

19 Hã ra kuty tá Topẽ tỹ jẽnẽ jafã tóg tere kỹ vẽnse ja jãnkãn nugnón mũ, rugróm tóg mũ. Ag gé(g) tóg tĩ mũ, ag kygvãn kỹ, kỹ tóg ag mỹ:

20 “ha mũ jẽg, Topẽ jo ĩn ra, ãjag tỹ vẽnĥ kar mỹ Topẽ vĩ tó jé, Topẽ tỹ ěg rĩnrĩn mãn ke ěn ti,” he mũ, Topẽ tỹ jẽnẽ jafã ti, ag mỹ.

21 Ag tỹ ti vĩ mẽ kỹ ag tóg kusã pẽ ki Topẽ jo ĩn ra mũ mũ, tá Topẽ vĩ tó jé. Hã ra Topẽ tũ ki rĩr tĩ to pã'i mág tóg ã mré ke ag jẽgnẽg mũ, ag tỹ kófa ag jé prěr jé, vẽnĥ jyvẽn tĩ kar ěn ag, povo tỹ Israel to pã'i ag

ke gé. Kǵ ag tóg vĕse ja ra ũ jĕgnĕg mǔ, ag tǵ vĕsigse ag tatĩ kāmǔ jé.

²² Polícia ag tǵ tá junjun mǔ ra ag tóg vĕse ja kátá tǔgtǔ nǵtĩ. Kǵ ag tóg vǵnvǵn ke mǔ.

²³ Kǵ ag tóg: “vĕse ja tóg nĩfénh kǵ jĕ nĩ, nĩfénh jĕfa tǵ,” he mǔ. “Kǵ ũ tǵ ki rĩr mǔ ag tóg tá nǵtĩ gé, ti jĕnkĕn tá. Ēg tǵ nón mǔ ra tóg kuprĕ jĕ nĩ,” he ag tóg mǔ, pĕ'i ag mǵ.

²⁴ Topĕ jo ĩn to capitĕo tǵ mĕ kǵ tóg ti mǵ e tĩ, Topĕ tǔ ki rĩr tĩ to pĕ'i mág ag mǵ ke gé. Kǵ tóg ag krĩ tǔ tĩ sir.

²⁵ Kǵ ũ tóg tá jun kǵ: “Topĕ jo ĩn krĕm ag nǵtĩ, ĕjag tǵ ũn sigsĕg mǔ ag,” he mǔ. “Tá ag tóg vĕnh kar mǵ Topĕ vĩ tó nǵtĩ,” he tóg.

²⁶ Kǵ capitĕo tóg polícia ag mré tĩ mǔ, ag tatĩ kāmǔ jé. Komĕr hĕ ag tóg vĩ mǔ, ag mré. “Ēg vĕsĕnsĕn kǵ ũ tǵ ag vĩ mĕg mǔ ag tóg hĕn ri ke mǔn ĕg pin ke mǔ, pó tǵ,” he ag tóg, polícia ag.

²⁷ Apóstolo ag tǵ ag mré junjun kǵ ag tóg pĕ'i ag jo ag vin mǔ. Kǵ Topĕ tǔ ki rĩr tĩ to pĕ'i mág tóg ag mǵ.

²⁸ “ĕjag mǵ ĕg tóg: ker ĕn jiji tó mĕn hĕ', he ja nĩgtĩ,” he mǔ. “Ge ra ĕjag tóg Jerusalĕm tá ke kar ag mǵ tugtó ja nĩgtĩ, ĕn vĩ ti,” he ag tóg, Jesus vĩ to. “ĕjag hǵn ti ter to ĕg jagĕgtar han sór mǔ,” he ag tóg, pĕ'i ag.

²⁹ Kǵ Jesus tǵ ũn vin mǔ ag kar tóg ag mǵ tag tó mǔ, ha mĕ. Pedro tóg ag mǵ tag tó mǔ, ha mĕ: “Topĕ tǵ ĕg mǵ nĕn tó mǔ ĕn han jé ĕg tóg ke mǔ (mǵr),” he tóg. “Ēprĕ ke ag tǵ ĕg mǵ: “ke tǔg nĩ,” he mǔ hĕ ra ĕg tóg ti tǵ ĕg mǵ nĕn tó mǔ ĕn han mǔ,” he tóg.

30 “Ēg jóg'jóg ag vỹ Topě to há nýtĩgtĩ. Ag tỹ ũ to há nýtĩ ěn vỹ Jesus ti rĩn mǎn ja nĩgtĩ, ājag tỹ ũn tén mũ ěn ti, ka to ũn sǎg mũ ěn ti,” he tóg.

31 “Kỹ Topě tóg ti tỹ pǎ'i mág han mũ, ti tỹ ěg kren han tĩ han kỹ, ti tỹ ti mỹ: “kunĩg, inh pějia tá nĩ,” hen kỹ. Jesus tỹ tóg ěg kar krĩn sór mũ, ěg povo tỹ Israel kar tỹ vėnh jykre pǎno tovǎnh jé, ti tỹ ag tỹ ā vĩ mranh tỹ vėnh pǎte fón jé,” he tóg.

32 “Nén kar ěn ve ja ěg tóg nĩgtĩ, hǎ kỹ ěg tóg ti vĩ tó mũ sir. Kỹ Topě kuprĩg tóg ěg kanhrǎn mũ gé. Topě vỹ ũ tỹ ti vĩ han mũ kar ag mỹ ā kuprĩg jėnėg mũ,” he tóg, Pedro ti.

33 Pǎ'i ag tỹ ti vĩ mě kỹ ag fe tóg gỹm ke mũ, kỹ ag tóg ag kǎgtén ke to jykrén mũ, Jesus tỹ ũn vin mũ ěn ag.

34 Kỹ vǎhǎ ũ tóg jėg nė mũ, Fariseu ũ, ti jyjy hǎ vỹ: Gamaliel, he mũ. Topě vĩ to professor ũ vė, kỹ vėnh kar mỹ tóg há nỹ, ti jykre ti. Kỹ tóg: “ver ag kǎpan nĩ,” he mũ.

35 Ag mũ kar tóg ag mỹ: “inh kanhkǎ',” he mũ. “To jykrén nĩ ver, ājag tỹ han tũ jé,” he tóg.

36 “Pedro ag jo ke ũ tóg jė ja nĩ gé, ti jiji hǎ vỹ: Teudas, he mũ. Ti hǎ ne tóg vėsỹ tỹ pǎ'i mág han ja nĩ, kỹ ũ tỹ 100 tỹ 4 ag vỹ ti nón mũ ja nĩgtĩ sir. Ti tén ja ag tóg nĩ jāvo, pǎ'i ag, kỹ ũ tỹ ti vĩ han mũ ag tóg tǎmĩ mũ ja nĩ, kỹ tóg tũ' he mũ,” he tóg.

37 “Kar kỹ ũ vỹ jė ja nĩ gé, ti jyjy hǎ vỹ: Judas, he mũ. Galiléia tá ke ěn vė. Ag tỹ vėnh kar jyjgi ránrán mũ ra tóg tá jė ja nĩ, Judas ěn ti, kỹ ũ tỹ hėn ri ke ag tóg ti nón mũ ja nĩgtĩ gé. ěn tén ja ag tóg nĩ gé, pǎ'i ag, kỹ ũ tỹ ti vĩ han mũ ag tóg krig' ke ja nĩ, vėnh pĩpin kỹ,” he tóg.

38 “Isỹ nén to jykrén hã vễ, ha mẽ: Pedro ag tovãnh nĩ ver,” he tóg. “Ag mỹ: ha mũ jễg, hemnĩ ver,” he tóg. “Ag tũ tỹ tỹ ẽprã ke ag jykre nĩn kỹ tóg tũ' henh ke mũ (mỹr), vễsóg ki, ha mẽ,” he tóg.

39 “Ti tỹ hã ra tỹ Topẽ jykre nĩn kỹ ăjag tóg tỹ tũ' henh ke tũ nĩ,” he tóg. “Ăjag tỹ ge ra ag to jũ nỹtĩn kỹ ăjag tóg vãhã Topẽ kato tẽ mũ,” he tóg, Gamaliel ti.

40 Kỹ ag tóg ti mỹ: “hej,” he mũ. Kỹ ag tóg Jesus tỹ ãn vin mũ ag jé prẽr mãn mũ. Ag mrãnmrãn ag tóg mũ. Kỹ ag tóg: “ker Jesus tó mãn hẽ',” he mãn mũ ag mỹ. Kỹ ag tóg: “ha mũ jễg ge,” he mũ.

41 Kỹ ag tóg mũ mũ, Jesus tỹ ãn vin mũ ag. Ag mỹ tóg sér tĩ, ha mẽ. Ag tỹ Jesus ri ke jagẽgtar mũ ra tóg ag mỹ sér tĩ, ag tỹ Jesus ri kén jagãgtar ke ki krỹg kỹ.

42 Kurã kar ki ag tóg Topẽ jo ãn tá Jesus tó tĩ, ti to: “Topẽ vỹ ti jẽnẽ,” hen kỹ. Vẽnh kar ãn tá ag tóg ti kãmén mũ gé, ã tỹ ag kógfyn kỹ. To ag tóg krónh ke tũ nĩgtĩ sir.

6

Ag tỹ ã tỹ 7 (ke) ag vin

1 Kỹ ã tỹ hẽn ri ke ag tóg Jesus ki ge mũ. ã ag tóg Grego vĩ tó tĩ, Jesus mré mũ ã ag. Kỹ ã ag tóg Hebreu vĩ tó tĩ gé, ti mré mũ ã ag. Ag e nỹtĩn kỹ ã tỹ Grego vĩ tó mũ ag tóg kejẽn vĩ kónãn mũ, Hebreu vĩ tó tĩ ag kato. “ã tỹ Hebreu vĩ tó mũ ag vỹ ẽg ki króm tũ nỹtĩ (mỹr),” he ag tóg. “Ag kã ãn mên ter ja fag vỹ kurã kar ki vễjẽn há vếg tĩ, ag tỹ fag mỹ vin kỹ,” he ag tóg. “Hã ra ẽg kã ãn mên ter ja ẽn fag kã ag tóg jatun nỹtĩ, fag tỹ ag vĩ tó tũ nĩn kỹ. Hã kỹ fag tóg jagãgtar nỹtĩ, ẽg mré ke fag,” he ag tóg.

² Kÿ ù tÿ 12 ag tóg mĕg mũ, Jesus tÿ ùn vin mũ ag. Kÿ ag tóg Jesus mré mũ kar ag jé prĕr mũ. Kÿ ag tóg: “Ēg tũ hă vĕ, hă vÿ ĕg tÿ tÿ Topĕ vĭ tó ti nÿ,” he mũ. “Ēg tÿ vĕjĕn ki rĭr kÿ ĕg tóg kutar nÿtĭ, kÿ ĕg tóg ĕg tÿ nĕn han ke ki rĭr há han ke tũ nĭ gé,” he ag tóg.

³ “Kÿ ù tÿ 7 (ke) ag vin nĭ, ùn kăme kórég tũ ag, ùn jykre há ag, ù tÿ Topĕ kuprĭg tÿ jagrĕ nĭ ĕn ag,” he ag tóg. “Ēn mÿ ĕg tóg vĕnh rănhrăj ĕn nĭm mũ, ag tÿ vĕjĕn ki rĭr jé,” he ag tóg.

⁴ “Ēg hă tóg hă ra Topĕ mré vĭ kÿ nÿtĭ, ti vĭ tó kÿ nÿtĭ. Ēg tÿ nĕn han ken hă vĕ,” he ag tóg, Pedro ag.

⁵ Ag vĭ vÿ vĕnh kar mÿ há nĭ ha, kÿ ag tóg Estêvão fĕg mũ sir, ù tÿ Jesus ki ră kÿ jĕ ĕn ti, kÿ Topĕ kuprĭg vÿ tÿ ti jagrĕ nĭ. Ti mré ag tóg Filipe fĕg mũ gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tÿ Antioquia tá ke tag ti, fóg tÿ Israel jykre han mũ tag ti.

⁶ Ēn ag vin ag tóg mũ, Jesus tÿ ùn vin mũ ag jo. Kÿ ag tóg ag to Topĕ mré vĭ mũ, ag nĭgé tÿ ag mĕ kÿ. Hă kÿ ag tóg ag mÿ vĕnh rănhrăj ĕn nĭm mũ, ag tÿ vĕjĕn ki rĭr jé.

⁷ Kÿ Topĕ vĭ tóg vĕnh kar kri rŭm ke mũ sir. Û tÿ Jesus mré mũ ag vÿ tóg hĕn ri ke nÿtĭ, Jerusalém tá. Kÿ Topĕ tũ ki rĭr tĭ ù ag tóg Jesus vĭ kri fi kÿ ti ki ge mũ gé sir.

Ag tÿ Estêvão se

⁸ Estêvão vÿ hă ra krĭ há nĭ, Topĕ tÿ ti mÿ vĕnh jykre nĭm kÿ. Kÿ tóg ĕg tÿ nĕn han vănh tÿ hĕn ri ke hÿn han mũ, vĕnh kar mÿ.

⁹ Kÿ Israel ag vĕnh kanhrăn jafă ù tá ag tóg ti vĭ kafăn mũ, ùn kygvăn kÿ nÿtĭ he mũ ĕn ag, cidade tÿ

Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Ásia tá ke ag ke gé. Ēn ag kar vỹ ājag tỹ Estêvão mré vĩn kỹ ti vỹ kafãn mũ.

¹⁰ Hã ra ag tỹ ti vỹ kafãn ke tóg tũ tĩ, ti krĩ há nĩn kỹ, ti tỹ Topẽ kuprĩg tỹ jagrẽ nĩn kỹ.

¹¹ Kỹ ag tóg ũ ag krĩn mũ, ag tỹ ti kato vỹ jé, Estêvão kato. Kỹ ag tóg: “ti vỹ mẽ ěg (mỹr),” he mũ. “Moisés kato vỹ kónãn tóg (mỹr), Topẽ kato ke gé,” he ag tóg ón kỹ, Estêvão to.

¹² Hã kỹ vẽnħ kar tóg ti to jũgũ mũ, Estêvão to, kófa ag mré hã, Topẽ vỹ to professor ag mré hã. Kỹ ag tóg ti kãgmĩ kỹ ti ség mũ. Kỹ ag tóg pã'i ag jo ti pére kãmũ mũ.

¹³ Ũ tỹ ón kỹ ti kato vĩnh ke mũ ag jé ag tóg prěr mũ gé, pã'i ag. Kỹ ag tóg ti kato: “Topẽ jo ĩn kato tóg vỹ kónãn tĩ, Topẽ tỹ ěg mẽ nén tó ja ti kato ke gé,” he mũ ón kỹ. “Hã ra tóg ã vỹ kónãn to krónħ ke tũ nĩgtĩ,” he ag tóg ón kỹ, Estêvão to.

¹⁴ “Ti vỹ mẽ ěg (mỹr),” he ag tóg. “Jesus kãmén tóg tĩgtĩ, Nazaré tá ke ěn ti,” he ag tóg. “Topẽ jo ĩn kókén jé tóg ke mũ, Jesus ti,” he tóg nĩgtĩ, Estêvão ti, kỹ tóg Moisés tỹ ěg mẽ vẽnħ jykre nĩm mũ ěn tỹ tũ' he sór mũ gé, ěg mẽ vẽnħ jykre ũ nĩm kỹ,” he ag tóg. Ag tỹ Estêvão to ón hã vẽ.

¹⁵ Kỹ pã'i kar ag tóg ti tugnỹm mũ, hã ra ti ve tóg sir Topẽ tỹ jẽnẽ jafã ve ri ke nĩ, Estêvão ti.

7

Estêvão tỹ vẽnħ kãmén

¹ Kỹ Topẽ tũ ki rĩr tĩ to pã'i mág tóg ti mẽ: “Ki hã ke mẽ?” he mũ.

2 Kÿ Estêvão tóg ag mÿ: “ijóg’,” he mÿ. “Inh kanhkã’,” he tóg. “Ëg jóg tÿ Topê vÿ tóg vênh kar káfór nÿ,” he tóg. “Ti hã ne ëg jóg’jóg tÿ Abraão mré vÿ ja nÿgtÿ, ti tÿ ver ga tÿ Mesopotâmia tá nÿ ki, ti tÿ ver ãmã tÿ Harã ra tÿ tÿ ki.

3 Kÿ tóg ti mÿ: “ã jamã tá kutê,” he ja nÿ. “Ã kanhkã ag kar ré kÿ tÿg,” he ja tóg nÿ ti mÿ. “Ga ù ra tÿg, isÿ tá ã mÿ: tag kã nÿmnÿ, he jé,” he ja tóg nÿ ti mÿ, Topê ti.

4 Hã kÿ tóg ga tÿ Caldéia tá kãkutê mÿ, Hãra tá ãmã jé, Abraão ti. Ti panh ter kar kÿ Topê tóg ti mÿ: “ga tag ra tÿg sir,” he mÿ.

Ëg jamã hã vë, Abraão jamã ja ti,” he tóg, Estêvão ti, pã’i ag mÿ.

5 “Ge ra Topê tóg Abraão mÿ ga ãn nÿm ja tÿ nÿ, ãpÿ pir mré tó kÿ. Ti mÿ tóg hã ra: “ã tÿnh ke vë, kar kÿ, ã krê tÿnh ke vë gé,” he ja nÿ, Topê ti. Hã ra tóg ver kósin ja tÿ nÿ, Topê tÿ ti mÿ: “ã krê tÿnh ke vë,” he mÿ ra.

6 Kÿ Topê tóg ti mÿ: “ã krê ag tÿ fóg ù ag mré mÿnh ke vë, fóg ãn jamã tá,” he mÿ. “Fóg ãn ag tÿ camarada han ke vë, ag vóg kónã jé ag tóg ke mÿ, prÿg tÿ 100 tÿ 4 ki,” he tóg, Abraão mÿ, Topê ti.

7 “Hã ra ù tÿ ag vóg kónã mÿ ãn ag vóg kónã jé sóg ke mÿ gé, kar kÿ,” he tóg, Topê ti. “Isÿ ag vóg kónã kar kÿ ã krê ag tóg tá kãpanh mÿ. Kÿ ag tóg ga tag ki isÿ ti han mÿ,” he tóg, Topê ti. Ti tÿ Abraão mÿ ken hã vë,” he tóg, Estêvão ti.

8 “Kÿ tóg ti mÿ vênh jÿkre nÿm mÿ, ti tÿ ã krê ag gré junun fár kÿm jé. Kÿ ti sinal vë sir. Kar kÿ Abraão tóg Isaque han mÿ. Ti tÿ kurã tÿ 8 han kÿ tóg ti mÿ kÿm mÿ. Isaque tÿ Jacó han kÿ tóg ge han

mũ gé, kŷ Jacó tóg ge han mũ gé, ti tŷ ã krê tŷ 12 ên ag han kŷ, êg tŷ ù to: êg jóg'jóg kar, he mũ ên ag,” he tóg.

⁹ “Hã ra êg jóg'jóg ên ag tóg ãjag jãvy tŷ José to jũgũ nŷtĩ, ãjag tŷ ti tũ to én kŷ. Hã kŷ ag tóg ti vêne he mũ, José ti, ù tŷ ga tŷ Egito ra mũ mũ ag mŷ. Hã ra Topê tóg ti ki rĩr mũ.

¹⁰ Kŷ tóg ti jy nĩgãn mũ, ti tŷ vênh jagtar vэг mũ ra. Ti jykre há nĩn kŷ tóg Egito tá ke ag pã'i mág mŷ há tĩ, ag tŷ ù to: Faraó, he mũ ên mŷ. Hã kŷ tóg ti tŷ pã'i mág han mũ, Faraó ti, José ti tŷ. Ti tŷ tóg pã'i mág han mũ, ti tŷ Egito tá ke kar ag ki rĩr jé, Faraó mré ke kar ag ki rĩr jé gé sir.

¹¹ Kejên tóg prŷg han mũ, ga tŷ Egito mũ hã, ga tŷ Canaã mũ hã ke gé. Kŷ vênh kar tóg kókĩnkĩr mũ, prŷg kã. Kŷ êg jóg'jóg ên ag tóg kókĩnkĩr mũ gé.

¹² Kŷ ù tóg Jacó mŷ: “Egito tá ti vėjên nĩ inhhã,” he mũ. Kŷ tóg êg jóg'jóg ag jěgněg mũ, Jacó ti, ag tŷ Egito ra mũ vén jé.

¹³ Ag tŷ ra mũ mãn kŷ José tóg vãhã ag mŷ: “inh hã vê,” he mũ, ã kãke ag mŷ. Hã kŷ Faraó tóg José kanhkã ki kanhró nĩ gé sir.

¹⁴ Kŷ José tóg ã panh tŷ Jacó jé prěr mũ, ti tŷ vênh kar tatĩn kãtĩg jé. Û tŷ 70 kri 5 ag vê, ti kanhkã ag.

¹⁵ Kŷ Jacó tóg Egito ra tĩ mũ. Tá tóg ter mũ kejên. Kar kŷ êg jóg'jóg ag vŷ tá kãgter kãn mũ gé.

¹⁶ Êmã tŷ Siquém tá ag tóg kénh kŷ nŷtĩ, Abraão vŷ tóg vênh kej ên to jãnkamy nĩm ja nĩ, Emor krê ag mŷ, êmã tŷ Siquém tá,” he tóg, Estêvão ti.

¹⁷ “Vãhã tóg kurã pétêm ke mũ sir, Topê tŷ Abraão mŷ: “ã krê mŷ sóg ga ên nĩm mũ,” he mũ kurã ti. Kŷ ag tóg Egito tá vênh grun mũ.

18 Kejēn ũ tá pã'i tóg tỹ pã'i jě, Egito tá. Hã ra tóg José mẽ ja tũ nĩ, pã'i tag ti.

19 Ĕn tóg ěg kanhkã ag kã'ug mũ, ag lograr ke tóg mũ, ěg jóg ag vóg kónãn tóg mũ gé. Kỹ tóg ag mỹ: “ãjag krě kãsir ag vãm ra, ag kãgter jé,” he mũ, pã'i ěn ti,” he tóg, Estêvão ti.

20 “Ti tỹ tag tó kar vãhã Moisés tóg mur mũ, kỹ tóg Topẽ mỹ há tĩ. Hã ra ti han mũ fag tóg kysã tăgtũ hã ki ti ki rĩr mũ.

21 Kysã tăgtũ tũg kỹ fag tóg sir ti fón mũ. Hã ra Faraó ěn kósin fi tóg ti ve kỹ ti vãg mũ, ti jě'ỹn jé. Kỹ tóg fi kósin ri ke nĩ, Moisés ti.

22 Kỹ tóg nén kar ki kanhrãn mũ, Egito tá vėnh jykre kar ěn ki. Kỹ ti jykre vỹ vėnh jykre tỹ hėn ri ke nĩ, kỹ ti vĩ vỹ vėnh vĩ tỹ hėn ri ke nỹ gé, Moisés ti,” he tóg, Estêvão ti.

23 “Vãhã tóg prỹg tỹ 40 han mũ, Moisés ti. Kỹ tóg ã kanhkã pẽ ag to jykrén mũ, povo tỹ Israel to, ag tỹ nén han mũ venh tũg jé.

24 Kỹ tóg ũ vėg mũ. Egito tá ke ũ vėg tóg mũ, Moisés ti. Ti tỹ Israel vóg kónãn vėg tóg mũ, nén ũ tũ to. Kỹ tóg ti to jũ kỹ Israel ěn kajãm mũ, ti tén tóg mũ, Egito tá ke ěn ti.

25 “Inh kanhkã ag hỹn isỹ nén han mũ to jykrén mũ,” he tóg. “Hã kỹ ag tóg ki kanhró nỹtĩ, Topẽ tỹ inh tugrĩn ag kren han ke ti,” he tóg, Moisés ti. Hã ra ag tóg to jykrén tũ nỹtĩ, ti kanhkã ag,” he tóg, Estêvão ti.

26 “Tỹ vaj kỹ tóg ag to tĩg mãn mũ, ã kanhkã ag to. Kỹ ũn régre ag tóg jagně to jũ nỹtĩ, Israel ag. Kỹ Moisés tóg ag tỹ jagně to há han sór mũ. Hã jé tóg

ag mÿ: “tÿ ājag tóg jagnē kanhkā nÿtĩ vē,” he mũ.
 “Ājag tÿ ne jé jagnē vóg kónān sór nē?” he tóg.

27 Ũ tÿ ā régre vóg kónān mũ ěn tóg ti vóg kÿ ti
 mÿ: “ā pi(jé) tÿ ěg pā'i nĩ,” he mũ. “Ā pi(jé) ěg jyvĕn
 mũ’,” he tóg.

28 “Ā hÿn isén sór mũ, ā tÿ rāké tá Egito tá ke ěn
 tén ri ke han sór ā hÿn mũ,” he tóg ti mÿ,” he tóg,
 Estêvão ti.

29 “Kÿ Moisés tóg ā tÿ ti vĩ mē kÿ tóg vĕnh péju kÿ
 tĩ mũ. Kÿ tóg ga tÿ Midiã ra tĩ mũ. Povo ũ ag mĩ tóg
 tĩ mũ gé. Tá tóg prÿg kÿ kósin régre han mũ.

30 Prÿg tÿ 40 tÿg kÿ Topē tÿ jĕnē jafā vÿ ti mÿ vĕnh
 ven mũ, ti tÿ ěmā tũ ja mĩ tĩ mũ ra, krĩ tÿ Sinai tá.
 Vānh grug ki tóg ti vég mũ, Moisés ti, Topē tÿ jĕnē
 jafā ěn ti.

31 Ti tÿ ti ve kÿ tóg ti mÿ e tĩ. Kÿ tóg ra tĩ mũ, ti ve
 há han jé. Kÿ tóg vĕnh vĩ mĕg mũ. Topē vĩ vē.

32 Kÿ tóg ti mÿ: “tÿ sóg ā jóg'jóg ag Topē nĩ,” he
 mũ, “Abraão Topē, Isaque Topē, Jacó Topē,” he tóg,
 vĕnh vĩ ti.

Hã ra Moisés tóg jÿrÿn ke mũ, ti kamĕg kÿ. Kÿ tóg
 tá ěvānh jāvānh nĩ.

33 Hã ra Topē tóg ti mÿ: “ā pĕn né kunũ ra, ā pĕn
 to ró ti,” he mũ. “Inh jo ā tóg jĕ nĩ (mÿr), hã ra sóg
 vĕnh kar káfór nĩ. Hã kÿ kunũ,” he tóg, Topē ti.

34 “Egito tá ke ag tÿ isũ ag vóg kónān vég isóg nĩ
 nĩ. Ag vĕkrĕnrĕr mĕg sóg nĩ nĩ. Kÿ sóg tĕre, sÿ ag
 kygvān jé. Hã kÿ sóg ā jĕnĕg mũ, ga tÿ Egito ra, ā
 tÿ ag kygvān jé. Ha tÿg,” he tóg, Topē tÿ jĕnē jafā ti,
 Moisés mÿ,” he tóg, Estêvão ti.

35 “Moisés ěn hã jĕnē ja tóg nĩ, Topē ti, ti tÿ ā
 kanhkā ag kren han jé, ti tÿ tÿ pā'i nĩ jé. Hã to Topē

tỹ jĕnĕ jafã tóg ti mỹ vĕnh ven, vĕnh gru ki. Hã ra ti kanhkã ag tóg ti to é he ja nĩgtĩ, ti mỹ: “ã pi(jé) tỹ ĕg pã'i nĩ,” hen kỹ, “ã pi(jé) ĕg jyvĕn mũ!,” hen kỹ.

³⁶ Moisés tóg sir ĕg tỹ nĕn han vĕnh hyn han, ga tỹ Egito tá, goj kafã tũ tá ke gé, goj kusũg he mũ ĕn tá ke gé. Kỹ ag tóg ĕmã tũ mĩ mũ mũ, prỹg tỹ 40 ki, ti kanhkã ag. Kỹ Moisés vỹ ag jo tĩ mũ, ti tỹ ga tỹ Egito tá ag kãpan kỹ. Hã ra tóg ag mũn ki ĕg tỹ nĕn han vĕnh hyn han mũ gé,” he tóg, Estêvão ti.

³⁷ “Moisés tóg ã kanhkã ag mỹ, povo tỹ Israel ag mỹ tóg tag tó ja nĩ: “Topĕ vỹ ãjag mỹ ã vĩ tó tĩ ũ jĕnĕnh mũ, ãjag mré ke ũ, ti tỹ ãjag mỹ Topĕ vĩ tó jé inh ri kĕn,” he ja tóg nĩgtĩ, Moisés ti.

³⁸ Moisés ĕn hã ne tóg povo tỹ Israel ag mré ĕmã tũ mĩ tĩ ja nĩgtĩ. Ag tỹ kejĕn pãnónh tỹ Sinai tá nỹtĩn kỹ tóg Topĕ tỹ jĕnĕ jafã mré vĩ mũ, Moisés ti. Kỹ tóg ti mỹ vĕnh vĩ nĩm mũ, Topĕ ti, ĕg tỹ ti vĩ ĕn han kỹ ĕg tỹ ĕg rĩr krỹg ja tũ ve jé. Kỹ Moisés tóg ĕg jóg'jóg ag mỹ vĕnh vĩ ĕn tugtó mũ. Hã ra tóg ĕg mỹ tó mũ gé,” he tóg, Estêvão ti.

³⁹ “Moisés vĩ han vĕnh ag nỹtĩ, ĕg jóg'jóg ag. Kỹ ag tóg ti tovĕnh kỹ ga tỹ Egito ra mũ mĕn sór mũ, kyrãgrã kỹ.

⁴⁰ Kỹ ag tóg Moisés jãvy tỹ Arão mré vĩ mũ. Kỹ ag tóg ti mỹ: “ĕg mỹ vĕnh kãgrã tỹ topĕ han, retrato tỹ, ĕg tỹ vĕnh jo ag gé(g) mũ jé,” he ag tóg.

Hã ra Moisés vỹ ver pãnónh tỹ Sinai kri nĩ nĩ.

Kỹ ag tóg Arão mỹ: “Moisés tóg ĕg jo tĩg ja nĩ,” he mũ. “ĕg kãpan ja tóg nĩ, ga tỹ Egito tá, hã ran hĕ ra vyr hỹn'?” he ag tóg ti mỹ. Kỹ tóg ag mỹ: “hej,” he mũ.

41 Kǵ ag tóg monh sǐ kǎggran mǔ. Kǵ ag tóg ti kǎggrá ěn mǵ ag tóg ājag mĕg kugprũn mǔ, retrato ěn mǵ. Ag tǵ han mǔ tóg ag mǵ sǐnvĩ tĩ. Kǵ tóg ag mǵ sér tĩ sir.

42 Hǎ ra Topĕ tóg vĕnh kaja jé ag tovǎnh mǔ gé, hǎ kǵ ag tóg rǎ to jǎnjǎn mǔ, kysǎ to (mǵr), krĩg kar to (mǵr). Hǎ kǵ Topĕ vĩ tó tĩ ũ tóg ag to rǎn mǔ gé, kǵ tóg: “Israel’,” he mǔ. “Ājag tǵ ěmǎ tũ ja mĩ mũn kǵ ājag tóg inh mǵ nén ũ pũn ja tũ nĩgtĩ (mǵr),” he tóg. “Prǵg tǵ 40 ki ājag tóg ěmǎ tũ ja mĩ mǔ ja nĩgtĩ,” he tóg, “hǎ ra ājag tóg topĕ ũ ag mǵ kugprũn ja nĩgtĩ, inh mǵ pũn tũ nĩn kǵ,” he tóg, Topĕ ti, ǎ vĩ tó tĩ tǵ.

43 “Topĕ tǵ Moloque ĩn sǐ va ājag tóg mǔ ja nĩgtĩ, krĩg kǎggrá ke gé, hǎ vǵ: Renfǎ, he mǔ, krĩg retrato ěn ti,” he tóg. “Vĕnh kǎggrá ěn to ājag tóg jǎnjǎn ja nĩgtĩ,” he tóg. “Hǎ kǵ sóg ājag vóg kónǎn kǵ Babilônia tá ke ag jĕgnĕnh mǔ, ag tǵ ājag tatĩn mǔ jé, cidade tǵ Babilônia mǎ ra,” he tóg, Topĕ ti, ǎ vĩ tó tĩ tǵ,” he tóg, Estĕvǎo ti.

44 “Ĕg jóg ag tǵ ěmǎ tũg ja mĩ mũn kǵ ag tóg kur tǵ Topĕ pĕ jo ĩn han ja nĩ, ag tǵ tá Topĕ tũ han jé, ti ĩn tá. Topĕ vǵ Moisés mǵ tó ja nĩ, ti tǵ kur tǵ Topĕ jo ĩn han jé, kǵ tóg ti tǵ nén han ke ven ja nĩ ti mǵ.

45 Ag krĕ tóg sir ag ri kén ĩn tǵ kur ěn ma mǔ ja nĩgtĩ gé, ag tǵ Topĕ tǵ ājag mǵ ěmǎ tó mǔ ěn ra mũn kǵ. Moisés ter kar Josué tóg sir ag jo tĩ mǔ, kǵ ag tóg ga ěn ra mǔ mǔ. Hǎ ra Topĕ tóg ga ěn tá ke ag kǎpan mǔ, ĕg jóg!jóg ag jo.

Kejĕn Davi tóg tǵ ag pǎ'i nĩ sir, prǵg tǵ hĕn ri ke kar kǵ. Hǎ ra ĩn tǵ kur ěn tóg ver jĕ nĩ.

46 Topĕ vǵ Davi to há nĩ. Kǵ Davi tóg ti mǵ: “sǵ ǎ mǵ ĩn há han há tóg tĩ vĕ,” he mǔ. “ǎ hǎ ne tóg tǵ

ijóg'jóg tỹ Jacó Topě nĩ,” he tóg. “Kỹ tóg ã tỹ ãn tỹ kur krēm nĩn kỹ inh mỹ há tũ nĩ,” he tóg ti mỹ, Davi ti.

47 Hã ra Davi tóg han tũ nĩ ver. Ti kósin tỹ Salomão tóg ãn ãn han mũ,” he tóg, Estêvão ti.

48 Kỹ tóg ag mỹ: “hã ra vãnh kar kãfór ãn tóg ãg tỹ ti jo ãn han mũ ãn krēm nĩ tũ nĩgtĩ (mỹr),” he mũ. “Hã kỹ Topě vĩ tó tĩ ã tóg ti to tag tó ja nĩ, ha mẽ.

49 “Kanhkã tãn vỹ tỹ inh nĩ,” he tóg. “Inh nĩg ja ri ken hã vễ,” he tóg. “Kỹ ga vỹ tỹ isũ nĩ gé. Sỹ tá vãnhkán sór nĩn kỹ sóg kenh ke mũ. Isũ kar vễ. Kỹ ãjag tỹ inh mỹ ãn han sór kỹ ãjag hỹn hễ ri kenh mũ?” he tóg. “Pétẽm ke tũ ãjag nĩnh mũ, ãjag tỹ inh mỹ vãnhkán jafã han ken ki,” he tóg.

50 “Inh hã ne tóg nén kar hyn han ja nĩ inhhã,” he tóg, Topě ti, ã vĩ tó tĩ tỹ,” he tóg, Estêvão ti.

51 Kỹ tóg ag mỹ: “krĩ tũ ãjag nỹtĩ (mỹr),” he mũ. “Ki kanhrãn jãvãnh ãjag tóg nỹtĩ (mỹr),” he tóg. “Kỹ ãjag nĩgrẽg tóg kutu nĩ gé (mỹr), Topě kuprĩg kato ãjag tóg vãsãnsãn nỹtĩ. ãjag jóg'jóg ag mré ãjag tóg ti kato vãsãnsãn nỹtĩ,” he tóg.

52 “ãjag jóg'jóg ag ne tóg Topě vĩ tó tĩ ag kar vóg kónãn ja nĩgtĩ', ag kãgtén ja ag tóg nĩgtĩ'. Hã ra ãn ag tóg ã tỹ vãnh jykre kuryj han mũ ãn kãmén ja nĩgtĩ, hã vỹ: Jesus, he mũ. Ti kãtĩg ke jo ag tóg ti tó ja nĩgtĩ, Topě vĩ tó tĩ ag. Jãvo ãjag tóg ãn kato vĩ ja nĩgtĩ, fóg mỹ. Kỹ ãjag tóg ti tén ja nĩgtĩ, Cristo ti,” he tóg, Estêvão ti.

53 “Topě hã ne ãjag mỹ ã vĩ nĩm ja nĩ', ã tỹ jẽgnẽ jafã ag tỹ. Hã ra ãjag tóg ti vĩ mrynhmranh ja nĩgtĩ,” he tóg. Estêvão tỹ pã'i ag mỹ tón hã vễ.

Ag tỹ Estêvão tén

⁵⁴ Ū tỹ tá nỹtĩ ag tỹ ti vĩ mẽ kỹ ag fe tóg gỹm ke mũ. Kỹ ag tóg ãjag jã tỹ gyngyn he mũ, tỹ ag tóg gangan ke mũ.

⁵⁵ Hã ra Topẽ kuprĩg tóg Estêvão krĩn mũ, kỹ Estêvão tóg kanhkã ki êvãnh mũ. Kỹ tóg Topẽ vég mũ, ti kókov ti. Jesus vég tóg mũ gé, Topẽ pẽgja tá tóg jẽ nĩ, Jesus ti.

⁵⁶ Kỹ tóg: “ha vé,” he mũ. “Kanhkã tá sóg vég mũ,” he tóg. “Kỹ êprã ke fi kósin tóg Topẽ pẽgja tá jẽ nĩ,” he tóg.

⁵⁷ Kỹ ag tóg prẽnprẽn mũ sir, ãjag nĩgrẽg nĩgfénh kỹ. Ti to ag tóg vẽnh génh mũ sir, ag kar ti.

⁵⁸ Kỹ ag tóg ti ség mũ, cidade tỹ Jerusalém tá ag tóg ti kutêm mũ gé. Kỹ ag tóg ti pin mũ, pó tỹ. ãjag kur vãvãm ag tóg mũ, kỹ kyrũ tóg ki rĩr mũ, ag kur ki. Kyrũ ên jiji hã vỹ: Saulo, he mũ.

⁵⁹ Kỹ ag tóg Estêvão pin mũ sir, pó tỹ. Hã ra Estêvão tóg jamã hár(a): “!..inh Senhor'..!” he mũ. “!..Jesus'..!” he tóg. “!..Inh kuprĩg jãvãnh ra..!” he tóg mũ.

⁶⁰ Kỹ tóg ã jakrĩ tỹ jẽ kỹ prẽn mũ, jamã hár(a), kỹ tóg: “!..inh Senhor'..!” he mũ. “!..Ag tỹ inh pin tỹ vẽnh pãte fón ne..!” he tóg mũ. Kar kỹ tóg hun ke mũ sir.

8

Saulo tỹ ag vóg kónãn

¹ Jãvo Saulo ên mỹ tóg há tĩ, ag tỹ ti tén kỹ. Kurã ên kã ag tóg Jesus ki ge mũ kar vóg kónãn jagy han mũ, Jerusalém tá. Ū tỹ vẽnh mãn tĩ ag vóg kónãn ag tóg mũ gé, ũ tỹ Topẽ vĩ mẽ jé vẽnh mãn tĩ ag. Kỹ ag tóg jagãgtar tãvĩ nỹtĩ. Kỹ ag tóg vẽnh kãpugpóv

kān mũ sir. Ga tỹ Judéia kar mũ ag tóg mũ mũ, ga tỹ Samaria mũ ke gé. Hã ra Jesus tỹ ùn vin mũ ag hã tóg Jerusalém tá nỹtĩ nĩ.

² Û tỹ Topẽ to há tĩ ag tóg fe kaj nỹtĩ, Estêvão ter kỹ. Kỹ ag tóg kygfỹ mág kỹ ti kénh mũ.

³ Hã ra Saulo tóg Jesus ki ge kỹ nỹtĩ kar ag vóg kónān jagy han mũ, ù tỹ Topẽ vĩ mẽ jé vènh mǎn tĩ ag. Ti tỹ ag tũg sór vè, Saulo ti. Hã jé tóg ìn kar kǎra rǎ tĩ. Ti tỹ Jesus ki rǎ kỹ jè ù ven kỹ tóg vèse jan kǎtá ti fón ti, ùn gré ag, ùn tǎtá fag ke gé.

Samaria tá Topẽ vĩ tó

⁴ Û tỹ vènh kǎpugpón mũ ãn ag vĩ vènh kar mỹ vènh vĩ sér tugtó mũgtĩ, Topẽ vĩ ti.

⁵ Kỹ Filipe tóg tĩ mũ gé. Ga tỹ Samaria ra tóg tĩ mũ, kỹ tóg cidade ù ki ra mũ, Cristo kǎmén jè.

⁶ Kỹ vènh kar tóg ti vĩ mẽgmẽg mũ. Jẽmẽ há han ag tóg mũ, Filipe vĩ ti. Hã ra Filipe tóg ẽg tỹ nén han vǎnh hyn han mũ gé. Kỹ ag tóg vég mũ. Hã kỹ ag tóg jẽmẽ há han mũ.

⁷ Vènh jagrẽ kórég tỹ hẽn ri ke pan tóg mũ, Filipe ti. Ti tỹ ag pan kỹ ag tóg jamǎ hár(a) prẽr mũ, kỹ ag tóg kǎpa mũ. Û grĩ ag tỹ há' he tóg mũ gé, ùn vagvá ag tỹ ke gé, ùn vygvá ag tỹ.

⁸ Kỹ tóg vènh kar mỹ sér tĩ sir, cidade ãn tá.

⁹ Kỹ Simão tóg nĩ nĩ, cidade ãn tá ke ù. Kujá vè, Simão ãn ti. Kỹ tóg nén vènhmỹ hyn han tĩgtĩ. Kỹ tóg ga tỹ Samaria tá ke ag tỹ ti tỹ nén han ve kỹ tóg ag mỹ e tĩ. Vèso tóg: “ag kǎfór ình nĩ,” he tĩ, ag tỹ ti kamẽg jé.

10 Hã kÿ vĕnh kar tóg ti kamĕg mũ sir, ùn sanh ag, gĩr ag ke gé. Ti to ag tóg: “Topĕ jykre han tóg tĩgtĩ, Topĕ jykre mág (pĕ) ĕn,” he tĩ, Simão ĕn to.

11 Kysã tÿ hĕn ri ke ki tóg nĕn vĕnhmÿ hyn han ti, kÿ tóg vĕnh kar mÿ e tĩ, hã kÿ ag tóg ti kamĕg tĩ sir.

12 Vãhã ag tóg Filipe vĩ kri fig mũ, Samaria tá ke ag, ti tÿ Jesus Cristo tón kÿ. Topĕ tÿ tÿ ĕg pã'i nĩ kãmĕn tóg mũ, Filipe ti. Û tÿ ã vĩ kri fig mũ ag kygpég tóg mũ, ùn gré ag, ùn tãtã fag ke gé.

13 Kÿ Simão ĕn tóg ti vĩ kri fig mũ gé, kujá ĕn ti. Kÿ Filipe tóg ti kypég mũ gé. Kÿ tóg Filipe mré nĩ nĩ. Kÿ tóg Filipe tÿ ĕg tÿ nĕn han vãnh hyn han mũ vég mũ, Topĕ jykre tÿ. Kÿ tóg ti mÿ e (pĕ) tãvĩ tĩ sir, Simão mÿ.

14 Kÿ vãhã Jesus tÿ ùn vin mũ ag tóg kejĕn mĕg mũ, Samaria tá ke ag tÿ Topĕ vĩ kri fig mũ ĕn ti. Jerusalém tá ag tóg mĕg mũ, kÿ ag tóg João mré Pedro jĕnĕg mũ, ag tÿ ve jé.

15 Pedro ag tÿ tá junjun kÿ ag tóg ag to Topĕ mré vĩ mũ, Samaria tá ke ag to, Topĕ tÿ ã kuprĩg tÿ ag jagrĕn jé.

16 Tá ke ù tóg tÿ jagrĕ tũ ja nĩ ver. Kygpe kÿ ag nÿtĩ inhhã, Jesus jiji tó kÿ, ĕg Senhor jyjy tó kÿ.

17 Kÿ Pedro ag tóg ãjag nĩgĕ tÿ ag mĕgmĕg mũ, kÿ Topĕ kuprĩg tóg ag kãra rã mũ.

18 Hã ra Simão tóg vég mũ, Jesus tÿ ùn vin mũ ag tÿ nĕn han mũ ti. Ag tÿ ù mĕ kÿ Topĕ kuprĩg tóg ag kãra rã mũ. ĕn vég tóg mũ, Simão ti. Kÿ tóg ag mÿ jãnkamy ven mũ, Pedro ag mÿ.

19 Kÿ tóg ag mÿ: “inh mÿ vĕnh jykre tag nĩm nĩ, jãnkamy tag to,” he mũ. “Sÿ ù mĕ kÿ Topĕ kuprĩg tóg

ag kĀra rānh ke mŭ. Sŷ vĕnh jykre ĕn ki kanhrān hÁ tóg tĭ,” he tóg.

²⁰ Hā ra Pedro tóg ti mŷ: “ā jānkamy mré ā nŭgme ki kutĕnh mŭ,” he mŭ. “Topĕ tŷ nĭm ja vĕ (mŷr), hā ra ā tóg jānkamy ti mĀn sór mŭ, vĕnh jykre ti,” he tóg.

²¹ “Ā pi(jé) Topĕ jykre tag ki kanhró nĭnh mŭ', kŷ Topĕ tóg ā mŷ nĭm ke tŭ nĭ,” he tóg. “Ā jykre pijé kuryj nŷ', Topĕ mŷ,” he tóg.

²² “Ā jykre pāno tag tovānh ra,” he tóg. “Topĕ mré vĭ. Hĕn ri ke mŭn tóg ā mŷ vĕnh pāte fón mŭ, ā tŷ vĕnh jykre pāno to jykrén mŭ tag ti,” he tóg. Pedro tĭ.

²³ “Fe kórég tĀvĭ ā nĭ (mŷr), kŷ ā jykre vŷ pāno nŷ gé sir,” he tóg, Pedro tĭ.

²⁴ Kŷ Simāo tóg ti mŷ: “iso Topĕ mré vĭ, inh jagtar jĕg tŭ nĭ jé, ā tŷ inh mŷ tó mŭ tag ti,” he mŭ.

²⁵ Hā ra Pedro ag tóg mŭ mĀn gé, ag tŷ ĕg Senhor tŷ Jesus vĭ tó kar kŷ. Ājag tŷ nĕn ve ja ĕn tó kĀn ag tóg, Jesus tŷ nĕn han ja tĭ. Kŷ ag tóg Jerusalém to vŷnvŷn ke mŭ sir. Ag mŭ kŷ ag tóg ga tŷ Samaria mĭ Topĕ vĭ hÁ tugtó mŭ gé.

Filipe tŷ ũn kypég mŭ

²⁶ Hā ra Topĕ tŷ jĕnĕ jafĀ tóg Filipe mŷ vĭ mŭ, kŷ tóg: “kanhkĀ tĀpér ra tĭg, ĕpŷy jagma tĭg, ĕmĭn jagma,” he mŭ. Jerusalém tán kĀtĭ, Gaza mĭ, hā ra tóg ĕmĀ tŷ fĭn kutĕ mŭ. ĕpŷy ĕn jagma tĭg, ĕmĭn ĕn jagma,” he tóg mŭ, Topĕ tŷ jĕnĕ jafĀ ti.

Kŷ tóg tĭ mŭ sir, Filipe tĭ.

²⁷ Tá jun kŷ tóg ga tŷ Etióbia tá ke vég mŭ, pĀ'i fi rānhŷ han tĭ ti, pĀ'i tŷ rainha fi tŷ nĕn ũ kar vég tĭ

ti, ũn kurĩ ěn ti. Pã'i fi jijin hã vỹ: Candace, he mũ. Fi krẽm pã'i ěn tóg Jerusalém ra tĩg ja nĩ, ũn kurĩ ěn ti. Tá tóg Topẽ kurã mág ve ja nĩ, festa mág ti, Jerusalém tá.

²⁸ Hã ra tóg ã jamã ra vỹn ke mũ sir, carroça kãmĩ. Tĩg kỹ tóg Topẽ vĩ to ke mũ, Isaías tỹ rá ěn ti. Vãsỹ Topẽ vĩ to tĩ vẽ, hã vỹ: Isaías, he mũ.

²⁹ Kỹ Topẽ kuprĩg tóg Filipe mỹ: “carroça kukãm tĩg,” he mũ.

³⁰ Kỹ Filipe tóg fũrũn tĩ mũ, kỹ tóg ti tỹ vẽn rá to ke mẽg mũ, Isaías tỹ rá ěn to, vãsỹ Topẽ vĩ to tĩ tỹ rá ěn to. Kỹ tóg ti mỹ: “ã mỹ ã tỹ nẽn to ke mũ tag ki kanhró nĩ?” he mũ.

³¹ Hã ra tóg: “vó,” he mũ. “Ũ tóg inh mỹ kãmén ja tũ nĩ ver,” he tóg. “Ã mỹ inh mỹ kãmén ke tũ nĩ?” he tóg. “Tãpy ra, inh mré nĩ jé,” he tóg. Kỹ tóg ke mũ, Filipe ti.

³² Ti tỹ ken hã vẽ, ha mẽ: “ovelha ri ke han tóg, ũ ěn ti. Ovelha pére ěg mũgtĩ, ti tãnh jé, hã ra tóg vĩ tũ nĩgtĩ (mỹr). Cordeiro ri ke han tóg mũ gé. Ěg tỹ ti kyki ronh mũ ra tóg jatun mỹ jé nĩ gé (mỹr).

³³ Ũ ěn tỹ Topẽ vĩ mranh tũ hã ra ag tóg ti vóg kónãn, ag tỹ ti jyvẽn tũ ra. Ti mré ke ag jykre pãno tó kãn ke tũ ěg tóg nĩgtĩ (mỹr). Ti tén ja ag tóg (mỹr), kỹ tóg ter mũ sir,” he tóg, vẽn rá ti.

³⁴ Kỹ ũn kurĩ ěn tóg Filipe mỹ: “ũ to ke nẽ hỹn'? Topẽ vĩ to tĩ tỹ ne tó nẽ hỹn'?” he mũ. “Inh mỹ tó,” he tóg. “Ti tỹ vẽso ke mỹ', ũ to ke mỹ vó?” he tóg.

³⁵ Kỹ Filipe tóg ti mỹ vẽn rá tag kãmén mũ sir. Jesus kãmén tóg mũ. Tĩ mỹ tóg vẽn vĩ há ěn tó mũ, Jesus to.

³⁶ Ge ag tóg mũ mũ, ěpry jagma, ěmĩn jagma. Kĩ ag tóg goj tá junjun mũ. Kĩ ũn kurĩ ěn tóg: “tag ki tóg goj nĩ,” he mũ. “Ă tỹ ki inh kype jé tóg há nĩ, he tóg.

³⁷ Kĩ Filipe tóg ti mỹ: “ă tỹ ă fe tỹ ti ki rã kĩ nĩ nĩn kĩ tóg há nĩ,” he mũ.

Kỹ tóg: “ti ki sóg rã kĩ nĩ,” he mũ. “Jesus tóg tỹ Topê kósın nĩ (mỹr), Jesus Cristo ti,” he tóg, ũn kurĩ ti.

³⁸ Kĩ tóg carroça tĩn ti mỹ: “ver krỹg hé,” he mũ. Kĩ tóg Filipe mré goj ra tére mũ, kĩ tóg kăra rã mũ, ũn kurĩ ti. Kĩ Filipe tóg ti kypég mũ sir.

³⁹ Ag tỹ goj kătá kăjăpry kĩ Filipe tóg tũ' he mũ, Topê kuprĩg tỹ ti ma tĩg kĩ. Kĩ ũn kurĩ tóg ti ve măn tũ nĩ sir. Hă ra tóg tĩ mũ, ă jamăn ra. Ti mỹ tóg sér tĩ sir.

⁴⁰ Hă ra Filipe tóg cidade tỹ Azoto tá nĩ nĩ. Kĩ tóg tĩg kĩ Jesus vĩ tó tĩ mũ, ěmă kar mĩ. Kĩ tóg kejěn cidade tỹ Cesaréia tá jun mũ, Jesus kăme sér tó jé.

9

Saulo tỹ Jesus ki rã

(Hk 22.6-16; 26.12-18)

¹ Hă ra Saulo tóg ver ũ tỹ ěg Senhor tỹ Jesus mré mũ mũ ag vóg kónăn sór mũ. Ag to tóg krĩ rỹ nĩ ver. Ti tỹ ag kăgtén sór vě. Hă to tóg Topê tũ ki rĩr tĩ to pã'i mág to tĩ mũ.

² Kĩ tóg ti mỹ permissăo to vĩ mũ, ti tỹ cidade tỹ Damasco ra tĩg jé. Tá tóg permissăo ěn tỹ pã'i ag mỹ ven sór mũ, ag tỹ ti mỹ: “ha ag venh tĩ gé,” he jé. Ti tỹ Jesus mré tĩ mũ ũ ve kĩ tóg ti se sór tĩ. Jerusalém ra tóg ag tatĩ tĩg sór tĩ, ti tỹ ũn ség mũ ag, ũn gré ag, ũn tătá fag ke gé.

³ Hă jé tóg Damasco ra tĩ mũ. Ti tỹ kakó ke mỹr hă jēngrē tar tóg vēnh ven mũ, kanhkă tá. Ră kăfór tóg nĩ, hă ra tóg Saulo ki kómkóm ke mũ sir.

⁴ Kỹ Saulo tóg kutē mũ, ga kri tóg tá' ke mũ. Kỹ tóg vēnh vĩ mẽg mũ. Kỹ tóg: “Saulo', Saulo',” he mũ. “Ă tỹ ne jé isũ ag vóg kónăn nē?” he tóg, vēnh vĩ ti.

⁵ Kỹ Saulo tóg ẽg Senhor mỹ: “ă tỹ ù nē?” he mũ.

Kỹ tóg ti mỹ: “tỹ sóg Jesus nĩ, ă tỹ ùn vóg kónăn sór tĩ ẽn vĩ tỹ inh nĩ,” he mũ.

⁶ “Jēg nē ra, cidade tag ki rã, tá ù tóg ă mỹ tónh mũ, ă tỹ nén han ke ti,” he tóg, vēnh vĩ ti.

⁷ Ti mré mũ ag vĩ vēnh vĩ tag mẽg mũ gé, hă ra ag tóg nén ù vég tũ nĩ. Kỹ ag kăne tóg jũrũn ke mũ.

⁸ Kỹ Saulo tóg jēg nē mũ sir. Kỹ tóg tãmĩ ẽvãnh sór mũ, hă ra tóg nén ù vég tũ nĩ. Kỹ ag tóg ti nĩg kăgmĩ kỹ ti pére mũ mũ, cidade tỹ Damasco ra.

⁹ Kură tăgtũ ki tóg ẽvãnh tũ nĩ, kỹ tóg jēg tũ (pě) nĩ gé, kron tũ (pě) ti nĩ gé, Saulo ti.

¹⁰ Damasco tá ke ù tóg nĩ nĩ, ti jyjy hă vĩ: Ananias, he mũ. Jesus mré tĩ ù vế. Kỹ Jesus tóg ti mỹ vēnh ven mũ. Kỹ tóg: “Ananias',” he mũ.

Kỹ Ananias tóg ẽg Senhor ti mỹ: “inh hă vế,” he mũ.

¹¹ Kỹ Jesus tóg ti mỹ: “jēg nē ra,” he mũ. “Ễmĩn kuryj he mũ ẽn ra tĩg. Judas he mũ ẽn ỉn kăra rã. Tá ù tóg nĩ nĩ, ti jiji hă vĩ: Saulo, he mũ. Cidade tỹ Tarso tá ke vế. Ẽn mré vĩmnĩ,” he tóg. “Ha vé, inh mré tóg vĩ nĩ,” he tóg.

¹² “Kỹ tóg ù vég nĩ nĩ, ti jyjy hă vĩ: Ananias, he mũ. Ẽ hă vế. Ẽ tỹ ti ỉn kăra rãnh ke vế. Ẽ tỹ ă nĩg tỹ ti mẽnh ke vế. Kỹ tóg ve măn ke mũ, ă tỹ ti mẽn tỹ.

Tag vég tóg nĩ nĩ, Saulo ti,” he tóg, Jesus ti, Ananias mĩ.

13 Kĩ Ananias tóg ěg Senhor ti mĩ: “vĕnh kar tóg ti kāmén tĩ hã ra, ã tỹ inh mĩ tó mũ tag ti,” he mũ. “Jerusalém tá tóg ã tũ ag vóg kónãn,” he tóg.

14 “Kĩ tóg permissão ma kãtĩ mũ, Topĕ tũ ki rĩr tĩ to pã'i mág tỹ ti mĩ han kũ. Kĩ tóg ũ tỹ ã mré vĩ mũ kar sigse sór mũ, cidade tag ki,” he tóg, Ananias ti, Jesus mĩ.

15 Kĩ ěg Senhor tỹ Jesus tóg ti mĩ: “ti venh tĩg,” he mũ. “Ti kuprĕg isóg (mỹr), ti tỹ ijiji tó jé, fóg ag kar mĩ, kanhgág ag kar mĩ ke gé, povo tỹ Israel ag mĩ ke gé,” he tóg.

16 “Ti mĩ sóg ven mũ, ti tỹ isugrĩn jagtar ke ti,” he tóg, Jesus ti.

17 Kĩ Ananias tóg tĩ mũ. Ti tỹ ĩn ěn tá jun kũ tóg ã nĩgé tỹ ti mĕg mũ, kũ tóg ti mĩ: “Saulo’,” he mũ. “Régre’,” he tóg mũ. “Ěg Senhor vỹ inh jĕnĕ, Jesus mỹr, sỹ ã ve jé,” he tóg. “Ti ve ã (mỹr), ěpry kri, ã tỹ tag ki jun mũn kã,” he tóg. “Hã kũ sóg kãtĩ mũ, ã tỹ ve mãn jé, Topĕ kuprĩg tỹ tỹ ã jagrĕ nĩ jé,” he tóg, Ananias ti.

18 Kĩ tóg vãhã ti kanĕ tá pa mũ, pirã fár ri ke. Kĩ tóg ve há' he mãn mũ sir. Kĩ tóg jĕg nĕ mũ sir. Kĩ tóg ti kypég mũ sir, Ananias ti.

19 Kĩ tóg jĕg mũ gé sir, hã kũ tóg tar' he mũ sir. Damasco tá tóg nĩ nĩ ver, Jesus mrĕ mũ tĩ ag mré.

20 Kĩ tóg vĕsỹmĕr Jesus kāmén mũ, Israel ag vĕnh kanhrãn jafã krĕm. “Tỹ tóg Topĕ kósin nĩ,” he tóg mũ, Jesus to.

21 Ũ tỹ ti vĩ mĕg mũ kar ag mĩ tóg e tĩ. “Jerusalém tá tóg ag vóg kónãn, ũ tỹ Jesus tó mũ ag,” he ag tóg.

“Kỹ tóg tag ki jun mũ gé, ag sigse jé, Topě tũ ki rĩr tĩ tỹ pã'i mág ag mỹ ag tatĩ tĩg jé,” he ag tóg, Saulo to. Kỹ tóg ag mỹ e tĩ, ti tỹ Jesus to: Topě kósın vĕ,” hen kỹ.

²² Hã ra Saulo tóg fe tar nĩ. Kỹ tóg Israel ag kanhrãn mũ, cidade tỹ Damasco tá. Ag mỹ tóg Jesus kãmén mũ. “Tỹ tóg Cristo nĩ, Jesus ti,” he tóg, ag mỹ Topě vĩ kãmén kỹ. Kỹ tóg ag tỹ ti vĩ kafãn sór mũ hã ra ag mỹ vĕnhmỹ tĩ sir.

Saulo tỹ cidade tỹ Jerusalém ra tĩg

²³ Kurã tỹ hĕn ri ke tũg kỹ Israel ag tóg kejĕn jagnĕ mré jykrén mũ, Saulo tén ke to.

²⁴ Hã ra Saulo tóg mĕg mũ, ag tỹ ti to jykrén ĕn to. Cidade ĕn to ró jãnkã tá ag tóg vājig nỹtĩ, ti jo, kurã kar ki, kuty tá ke gé, ag tỹ hĕn ri ke mũn tá ti tén jé. Kỹ tóg mĕg mũ sir, Saulo ti.

²⁵ Kỹ ti mré ke ag vỹ kuty tá kĕj kãkã ti nĩm kỹ ti térem mũ, cidade ĕn to ró to. Kỹ tóg Jerusalém ra tĩ mũ.

²⁶ Ti tỹ Jerusalém tá jun kỹ tóg Jesus mré mũ ag mré nĩ sór mũ, Jesus mré mũ tĩ ag mré. Hã ra ag tóg ti kamĕg mũ. “Ti ón hỹn,” he ag tóg ti to, ti tỹ ag vóg kónãn jan kỹ.

²⁷ Kỹ Barnabé tóg ti mré vĩ kỹ Jesus tỹ ũn vin mũ ag to ti pére tĩ mũ. Kỹ tóg ag mỹ ti tỹ Jesus ve ja ĕn kãmén mũ, ĕpry jagma. “Kỹ Jesus tóg ti mré vĩ ja nĩ gé,” he tóg. “Kar tóg Damasco tá ke ag mỹ Jesus kãmén ja nĩ gé, ti tỹ mũmĕg tũ nĩn kỹ,” he tóg, Barnabé ti.

²⁸ Kỹ Saulo tóg ag mré tĩ nĩ ver, Jerusalém tá. Tá tóg Jesus kãmén mũ gé, ti tỹ mũmĕg tũ nĩn kỹ.

29 Kĩ tóg Israel ag mré vĩ mũ gé, ù tỹ Grego vĩ tó mũ ag mré ke gé. Ag tỹ ti vĩ kafān kũ tóg ag mré vĩ mũ. Hã ra ag tóg ti tén ke to jykrén mũ, Saulo tén ke to.

30 Kũ Jesus mré ke ag tóg mẽg mũ gé, ag tỹ Saulo tén ke to jykrén mũ ěn to. Kũ ag tóg cidade tỹ Cesaréia ra ti pére mũ mũ. Tá junjun kũ ag tóg cidade tỹ Tarso ra ti jĕnĕg mũ.

31 Jesus ki ge kũ nỹtĩ ag kar vỹ jatun mỹ nỹtĩ nĩ sir, ù tỹ Topĕ vĩ mẽ jé vĕnh mǎn tĩ ěn ag. Jatun mỹ ag tóg nỹtĩ sir, ga tỹ Judéia tá, ga tỹ Galiléia tá ke gé, ga tỹ Samaria tá ke gé. Kũ ag tóg jatun mỹ vĕnh kanhrǎn mũ, Topĕ jykre tỹ. Topĕ vĩ ki ag tóg króm mũ, Topĕ kamĕg kũ. Topĕ kuprĩg vỹ ag krĩn mũ. Kũ ag krĩ vỹ kǎnhvy' he mũ. Kũ ag tóg e nỹtĩ gé sir.

Enéias

32 Kejĕn Pedro tóg vĕnh kar ag vegvenh tĩ mũ. Kũ tóg cidade tỹ Lida ra tĩ mũ gé, tá Topĕ tũ ag vegve jé.

33 Tá ù tóg nỹ nĩ, ti jijin hã vỹ: Enéias, he mũ. Grĩn kũ tóg nỹ nĩ, ã cama kri. 8 anos han tóg, grĩ nỹ ki.

34 Kũ Pedro tóg ti mỹ: “Enéias,” he mũ. “Jesus Cristo vỹ ã han,” he tóg. “Jĕg nĕ ra, ã cama fi han ra,” he tóg.

35 Kũ tóg vĕsỹmĕr jĕg nĕ mũ. Kũ cidade tỹ Lida tá ke kar ag vỹ ti vég mũ, cidade tỹ Sarona tá ke kar ag ke gé. Kũ ag tóg ti ve kũ Jesus ki ge mũ gé sir.

Dorcas fi

36 Cidade tỹ Jope tá ù fi tóg nĩ nĩ, Jesus mré tĩ mũ fi, fi jiji hã vỹ: Tabita, he mũ, hã vỹ: Dorcas, he mũ, fi jyjy ti, fóg tỹ Grego vĩn ki. ěn fi hã vỹ nĕn kar há han mũ. Ěn jagǎgtar fag mỹ fi tóg nĕn vin tĩ.

37 Kejēn fi tóg kaga nỹ nĩ, kỹ fi tóg ter mũ sir. Kỹ fag tóg fi kupe kỹ ĩn to jãpry jafã tá fi fig mũ, kynh mỹ.

38 Jo Jope tóg Lida kakó kã nĩ, hã ra Pedro tóg Lida tá nĩ nĩ. Kỹ Jope tá ke ag tóg ti ki kanhró nỹtĩ, Pedron ki, Jesus mré mũ ag.

Kỹ ag tóg ũn régre ag jěgněg mũ, ag tỹ ti mỹ: “kur kãtĩg mẽ han,” he jé.

39 Kỹ Pedro tóg vėsỹmér tĩ mũ. Kỹ tóg tá jun mũ. Hã ra Dorcas fi tóg ĩn to jãpry jafã tá nỹ nĩ, ter kỹ. Pedro jun kỹ ag tóg ĩn to jãpry jafã to jãpry mũ, ti mré. Kỹ ũn mén ter ja ěn fag kar vỹ ti to kãmũ mũ. Kygfỹ fag tóg mũ. Ti mỹ fag tóg kur venven mũ, fi tỹ fag mỹ kugrỹn ja ti, camisa, vestido ke gé, vėnh kri fě ke gé. Dorcas fi tóg fag mỹ kugrỹn mẽ han ja nĩgtĩ.

40 Kỹ Pedro tóg vėnh kar mỹ: “ha pa jěg,” he mũ. Kỹ tóg ã jakrĩ tỹ jěg kỹ Topě mré vĩ mũ. Kỹ tóg vėser fi mỹ: “Tabita', nĩ ra,” he mũ. Kỹ fi tóg mrin ke mũ. Kỹ fi tóg nĩ mũ, fi tỹ Pedro ven kỹ.

41 Kỹ tóg fi nĩgé kãgmĩ kỹ fi fěg mũ. Kỹ tóg vėnh kar jé prěr mũ, Topě tũ kar, ũn mén ter ja ěn fag mré hã. Kỹ tóg fag mỹ fi ven mũ.

42 Kỹ Jope tá ke kar ag vỹ měg mũ sir, fi rĩr mãn ěn ti. Kỹ ũ tỹ hěn ri ke ag vỹ Jesus ki ge mũ sir.

43 Kỹ Pedro tóg cidade tỹ Jope tá nĩ nĩ ver, Simão he mũ ěn mré, ũ tỹ nén fár tỹ tãnãj ke tĩ ěn mré.

10

Capitão tỹ Cornélio

¹ Cidade tỹ Cesaréia tá ù tóg nĩ nĩ, ti jiji hã vỹ: Cornélio, he mũ. Soldado tỹ 100 to pã'i vẽ, ag tỹ ù to: ga tỹ Itália tá ke ag, he mũ ěn to capitão vẽ.

² Ěn vỹ Topě to há nĩ, kỹ tóg Topě kaměg tĩ. Ti mré ke kar vỹ ge nỹtĩ gé. Povo tỹ Israel ag kãmĩ ùn jagãgtar ag jagãgtãn tóg tĩgtĩ, ti tỹ tỹ Israel ag mré ke tũ hã ra. Topě mré tóg vĩ tĩ gé.

³ Ěn tóg nén nẽ vég mũ, 3 horas ki, ã nũr tũ ra. Kỹ tóg Topě tỹ jẽnẽ jafã jun vég mũ. Kỹ tóg ti mỹ: “Cornélio,” he mũ, Topě tỹ jẽnẽ jafã ti.

⁴ Ti tỹ ti ve kỹ ti fe tóg jũrũn ke mũ, kỹ tóg: “ne nẽ?” he mũ.

Hã ra tóg ti mỹ: “Topě vỹ ã vĩ měg mũ (mỹr),” he mũ. “Ă tỹ ùn jagãgtar ag mỹ nén nĩm tĩ vég tóg mũ gé,” he tóg. “Hã kỹ tóg ã to jykrén mũ,” he tóg.

⁵ “Kỹ ù jěgněmnĩ, ag tỹ Jope ra mũ jé. Tá ù tóg nĩ nĩ, ti jiji hã vỹ: Simão, he mũ, kỹ ti jyjy ù hã vỹ: Pedro, he mũ. Ěn jé prěrmnĩ,” he tóg.

⁶ “Simão mré tóg nĩ nĩ, ù tỹ nén fár tỹ tãnãj ke tĩ ěn mré, kỹ ti ãn vỹ goj kafã tũ fyr tá jẽ nĩ,” he tóg.

⁷ Kỹ Topě tỹ jẽnẽ jafã tóg tĩ mũ, ti mỹ tó kar kỹ. Kỹ capitão ěn tóg ã camarada régre ag jé prěr mũ, soldado pir mré, ù tỹ Topě kaměg mũ ěn ti. Û tỹ ã rãnrãj han mũ ěn jé tóg prěr mũ.

⁸ Kỹ tóg ag mỹ ã tỹ nén ve ja tó mũ, kỹ tóg cidade tỹ Jope ra ag jěgněg mũ.

⁹ Tỹ vaj kỹ ag tóg cidade ěn to hã nỹtĩ, meio dia ki. Kỹ Pedro tóg ãn kri kyjer ěn ra tãpny mũ, Topě mré vĩ jé.

¹⁰ Kỹ tóg kókĩr mũ. Kỹ tóg fag mỹ vějén to vĩ mũ. Fag tỹ ver ti mỹ han mũ ra tóg nén nẽ vég mũ, Pedro ti.

11 Kĩ tóg ag tỹ kanhkā nón mũ vég mũ. Tá nén ù tóg kátére mũ. Kĩ tóg tỹ kur mág ve nĩ. Ti péno kygje kũ tóg ga kri kátére mũ, kur ti.

12 Hã ra bicho kar tóg kur ên kãki nỹtĩ nĩ, fa tỹ 4 (ke) kar tóg nỹtĩ, ù tóg ã nug kri mũgtĩ gé, sēsĩ kar ke gé, jēsĩ kar.

13 Kĩ vẽnĩ vĩ tóg mẽ há tĩ, kũ tóg: “tág’,” he mũ. “Tãnh kũ kó, vỹ,” he tóg.

14 Kĩ Pedro tóg ãg Senhor ti mỹ: “nejé,” he mũ. “Nén ù jěggry ko ja tũ sóg nĩ (mỹr),” he tóg. “Ëg povo jykre tũ vẽ, ãg tỹ bicho ên kon kũ,” he tóg.

15 Kĩ tóg ti mỹ vĩ mãn mũ sir jãvo, vẽnĩ vĩ ti, kũ tóg: “Topẽ tóg hã ra to: há ti nĩ, he mũ. Kĩ jěggryg tũg nĩ,” he tóg.

16 Ge tãgtũ han tóg, kũ nén nẽ ên tóg vég tũ’ he mũ sir, kanhkā tá.

17 Hã ra tóg Pedro mỹ e tĩ. Ti tỹ to jykrén tũ tóg tĩ, ti tỹ vég mũ to. Ti tỹ ver to jykrén mũ ra ag tóg junjun mũ, Cornélio tỹ ùn jěgnẽg mũ ag. Û tóg ag mỹ: “ĩn ên vẽ,” he ja nĩ.

18 Kĩ ag tóg tá junjun mũ. Ró to jěgjẽ kũ ag tóg jamã hár(a) ke mũ, kũ ag tóg: “Simão Pedro ag mỹ ki nỹtĩ?” he mũ.

19 Hã ra Pedro tóg ver ã tỹ vég mũ ên to jykrén nĩ nĩ. Kĩ Topẽ kuprĩg tóg ti mỹ ke mũ. “Ha vé, ùn régre ag vỹ ã jé prěr mũ,” he tóg.

20 “Jěg nẽ ra, kátére ra, tũg ra ag mré,” he tóg. “To jykrén tũg. Isỹ ag jěgnẽ vẽ,” he tóg, Pedro mỹ, Topẽ kuprĩg ti.

21 Kĩ Pedro tóg ag to kátére mũ, kũ tóg ag mỹ: “inh hã vẽ,” he mũ. “Inh jé prěr ja ãjag tóg nĩ,” he tóg. “Ãjag tỹ ne to kãmũ nẽ?” he tóg ag mỹ.

22 Kǵ ag tóg ti mǵ: “Cornélio tǵ ěg jěgně vě,” he mǵ. “Capitão vě, Cornélio ti. Ũn jykre kuryj vě, kǵ tóg Topě kaměg tǵ,” he ag tóg. “Israel kar ag tóg ti to há nǵtǵ, ti to ag tóg vǵ há han tǵ. Topě tǵ jěně jafǵ vǵ ti mǵ ke ja nǵ, ti tǵ ǵ jé prěr jé, ǵ tǵ ti ĩn ra tǵg jé, ǵ tǵ ti mǵ Topě kāmén jé,” he ag tóg, Pedro mǵ.

23 Kǵ Pedro tóg ag mǵ: “kǵge jěg ra,” he mǵ. Kǵ ag tóg tá nǵgnūr mǵ. Tǵ vaj kǵ tóg ag mré tǵ mǵ. Kǵ Jope tá ke ũ ag tóg ti mré mǵ mǵ gé, Jesus mré ke ũ ag.

24 Tǵ vaj kǵ ag tóg Cesaréia tá junjun mǵ. Tá Cornélio tóg ag jávǵnh mǵ. Hǵ kǵ tóg ǵ kanhkǵ ag kar kógfyn ja nǵ, ag mǵ věnh vǵ jěně ja tóg nǵ, ǵ mré ke kar ag mǵ. Kǵ ag tóg kāmǵ ja nǵ, kǵ ag tóg tá nǵtǵ sir.

25 Pedro tǵ tá jun kǵ Cornélio tóg ti kato tě mǵ, kǵ tóg ti jo mǵg ke mǵ. “Ti hǵn tǵ Topě nǵ,” he tóg, hǵ kǵ tóg ti jo mǵg ke mǵ, Cornélio ti.

26 Hǵ ra Pedro tóg ti fěg mǵ, kǵ tóg: “ke tǵg ra,” he mǵ. “Tǵ sóg ěprǵ ke nǵ gé,” he tóg ti mǵ.

27 Kǵ tóg ti mǵ vǵ há han mǵ. Kǵ tóg kǵra rǵ kǵ ũn e ag vég mǵ, ũn věnh mǵn kǵ nǵtǵ ag, Pedro ti.

28 Kǵ tóg ag mǵ: “Israel ag vǵ fóg mré nǵ tǵ nǵgtǵ (mǵr),” he mǵ. “Ěg jykren hǵ vě,” he tóg. “Kǵ ěg tóg fóg ĩn kǵra rǵ tǵ nǵgtǵ gé (mǵr) sir. Tag ki kanhró ǵjag tóg nǵtǵ,” he tóg. “Hǵ ra Topě tóg inh kanhrǵn, ǵ jykre tǵ. Kǵ sóg věnh kar ĩn kǵra rǵnh mǵ, jěggry tǵ nǵn kǵ,” he tóg.

29 “Hǵ kǵ sóg jatun mǵ kǵtǵg, věsǵmér, ǵjag tǵ inh jé prěr kǵ. Kǵ sǵ ǵjag ki jěměnh há tóg tǵ. ǵjag tǵ hě ri ke jé inh jé prěr ně?” he tóg ag mǵ, Pedro ti.

30 Kǵ Cornélio tóg ti mǵ: “4 dias vē ha ũri,” he mǵ, “kǵ sóg Topě mré vǐnh ke nǐ nǐ, jěg tǔ nǐn kǵ. 3 horas vē. Inh ĩn krēm sóg Topě mré vǐnh ke nǐ nǐ, kǵ sóg ũ vég nǐ nǐ. Ti kur tóg kókov nǐ.

31 Kǵ tóg inh mǵ: “Cornélio!,” he mǵ. “Topě vǵ ã vǐ mēg mǵ. ã tǵ ũn jagēgtar mǵ nén vin ěn ve tóg. To tóg jykrén, Topě ti,” he tóg.

32 “Kǵ Jope ra ũ jěně. Tá Simão jé prēr, ũ tǵ Pedro he mǵ ěn ti. Nén fár tǵ tânāj ke tǐ ěn ĩn krēm tóg nǐ nǐ, hǎ vǵ: Simão, he mǵ. Tǐ ĩn vǵ goj kafā tǔ fyr tá jě nǐ,” he tóg inh mǵ, Topě tǵ jěně jafā ti,” he tóg, capitão ti.

33 “Kǵ sóg vēsǵmér ã to ũ ag jěgně. Kǵ ã tóg kǎtǐ mǵ. Kǵ tóg há tǐ, ã kǎtǐg ti. Hǎ to ěg tóg vēnh mǎn, Topě jo. Topě tǵ ã mǵ nén tó ja kǎmén ra ěg mǵ. ěg tǵ mēnh há tóg tǐ vē,” he tóg, Cornélio ti, Pedro mǵ.

Pedro tǵ Cornélio mǵ Topě vǐ tó

34 Kǵ Pedro tóg ag mǵ kǎmén mǵ, kǵ tóg: “vǎhǎ tóg sǵ to jykrén mǵ,” he mǵ. “Topě mǵ nén ũ tǔ vē, Israel he mǵ ěn ag, fóg he mǵ ěn ag ke gé, kanhgág ag ke gé, Israel jykre han tǔ kar ag,” he tóg.

35 “Ũ tǵ ti kamēg mǵ vǵ ti mǵ há nǵtǐ, Topě mǵ, ũ tǵ vēnh jykre kuryj han mǵ ag kar, povo kar kǎmǐ,” he tóg.

36 “Povo tǵ Israel mǵ tóg ã vǐ ěn jěně ja nǐ, Topě ti. ěg mǵ tóg tó, ěg tǵ jatu nǵtǐ jé, ti tǵ Jesus Cristo tigrǐn ěg to há nǐn kǵ. Jesus ěn vǵ tǵ vēnh kar Senhor nǐ,” he tóg.

37 “Věnh vǐ ěn mē kǎn ājag tóg huri. Judéia kar mǐ tóg rǔm ke ja nǐ. João tóg vēnh kar mǵ: “ājag jykre

tovānh ra,” he ja nīgtī. Kī tóg ag kygpe ja nī. Kar kī Jesus tóg Galiléia mī tīg vén mū, Nazaré tá ke ěn ti.

38 Kī Topē tóg Jesus mī ā kuprīg jēnē ja nī. Kī tóg ti mī vēnh jykre nīm ja nī. Ga kar mī tóg tīg ja nīgtī. Nén kar há han ja tóg nīgtī. Japo tỹ ũn vóg kónān mū ag tỹ há' he ja tóg nī gé. Topē hā ne ti mré han ja nīgtī hā ra',” he tóg.

39 “Nén kar ěn ve ja ěg tóg nīgtī, ti tỹ nén han mū kar, ga tỹ Judéia tá, Jerusalém tá ke gé. Ěn tỹ ag tóg cruz to ti sa ja nīgtī, ti tén ja ag tóg nīgtī.

40 Kurā tāgtū tūg kī Topē tóg ěn rīn mān ja nīgtī, kī tóg vēnh ven ja nīgtī,” he tóg, Pedro ti.

41 “Hā ra vēnh kar vỹ ti ve ja tū nī. Ěg hā mī tóg vēnh ven ja nī. Hā to Topē tóg ěg kuprēg ja nīgtī. Ti mré ěg tóg jēn ja nīgtī, kron ja nīgtī gé, ti tỹ ā ter kar rīr mān kī,” he tóg, Pedro ti.

42 “Kī tóg ěg mī: “vēnh kar mī inh kāmén nī,” he ja nīgtī. “Topē vỹ ti tỹ vēnh kar káfór han, hemnī,” he ja tóg nī ěg mī. “Kī tóg vēnh kar tỹ nén han mū venh ke mū sir. Ũ tỹ ũri rīnrīr mū ag kar tỹ nén hyn han mū ve jé tóg ke mū, ũn ter mū ag kar tỹ nén hyn han mū kar ke gé, hemnī,” he ja tóg nīgtī ěg mī, Jesus ti,” he tóg, Pedro ti.

43 “Vāsỹ Topē vī tó tī ag kar vỹ ti kāmén ja nīgtī, kī ag tóg: “ũ tỹ ti ki rā mū mī tóg vēnh pāte fón ke mū, Topē ti, ti tỹ ti vī mranh mū ti,” he ja nīgtī. “Cristo tigrīn tóg vēnh pāte fón ke mū,” he ja ag tóg nīgtī, Topē vī tó tī ag,” he tóg, Pedro ti.

Topē kuprīg tỹ tỹ ag jagrē nī

44 Pedro tỹ ver tag tó kī vāhā Topē kuprīg tóg ag ki rā mū, ũ tỹ ti vī mēg mū ag ki.

⁴⁵ Kŷ Israel ag tŷ Jesus ki ge kŷ nŷtĩ ag mŷ tóg e tĩ, ũ tŷ Pedro mré kāmũ ag mŷ. “Topě kuprĩg tóg tŷ ag jagrě nĩ,” he ag tóg. “Ag tŷ tŷ fóg nŷtĩ ra tóg ag ki rã mũ,” he ag tóg.

⁴⁶ “Věnh vĩ ũ tugtó ag mũ (mŷr),” he ag tóg. “Věnh vĩ ěn ki ag tóg Topě mŷ: há ã tóg nĩ, he mũ,” he ag tóg.

⁴⁷ Kŷ Pedro tóg: “ũ tóg ag to: ag kygpenh ke tũ ěg nĩ, henh ke tũ nĩ (mŷr),” he mũ. “Topě kuprĩg tŷ ag jagrě nŷtĩ. Ěg ki rã ri ke han tóg ag ki, Topě kuprĩg ti. Kŷ ěg hŷn ag kygpenh mũ ha,” he tóg, Pedro ti.

⁴⁸ Kŷ tóg ũ mŷ: “ag kygpe ra ge, Jesus Cristo jiji tó kŷ,” he mũ sir.

Ājag kygpe kar kŷ ag tóg Pedro mŷ: “ver ěg mré nĩ,” he mũ. Kŷ tóg ag mré nĩ sí han kar kŷ tĩ mũ sir.

11

Pedro tŷ Jerusalém tá ã tŷ nén han mũ tó

¹ Kŷ Jesus tŷ ũn vin mũ kar ag vŷ jěměg mũ, fóg ag tŷ Topě vĩ kri fig mũ ti. Judéia kar mĩ ag tóg jěměg mũ, Jesus mré ke kar ag.

² Kŷ Pedro tóg Jerusalém ra tĩ mũ. Kŷ tá Jesus ki ge mũ ag tóg ti mré vĩ mũ. Ti mré vĩ mũ ag tóg: “věnh kar vŷ ājag gré junjun fár kym ke mũ, ěg jykre han jé, ag tŷ Topě jykre han sór kŷ,” he ag tóg tĩ. Ěn ag vŷ Pedro mŷ vĩ mũ,

³ kŷ ag tóg: “ũn fár kym ja tũ ag mré ã tóg jěg mũ (mŷr), ag ĩn ki,” he mũ.

⁴ Kŷ Pedro tóg ag mŷ nén kar ěn kāmén mũ,

⁵ kŷ tóg: “cidade tŷ Jope tá sóg nĩ ja nĩ, kŷ sóg Topě mré vĩ nĩ ja nĩgĩ. Ti mré vĩ kŷ sóg nén ně vég mũ,” he tóg. “Nén gé(g) tĩg jafã vě, kur mág ri ke. Tĩ péno

kygje tóg kanhkā tá kátére mū. Kŷ tóg inh ki jun mū.

⁶ Kŷ sóg kākī ēvānh mū, kŷ sóg bicho kar vég mū, fa tŷ 4 ke ti nŷtī, nēn tān ag mré hā, ag nug kri mū tī ag mré hā, sēsī kar mré hā, jēsī kar.

⁷ Kŷ sóg vēnh vī mēg mū, kŷ tóg: “tág', vŷ,” he mū. “Tānh kŷ kó,” he tóg.

⁸ Kŷ sóg ti mŷ: “nejé,” he mū. “Nén ū jēggry ko ja tū sóg nī,” he sóg ti mŷ. “Ēg jykre tū vē, ěg tŷ bicho ěn kon kŷ,” he sóg ti mŷ.

⁹ Kŷ tóg inh mŷ tó mǎn mū gé, kanhkā tá vēnh vī ti, kŷ tóg: “Topē tóg hā ra to: há tī nī, he mū. Kŷ jēggry tūg nī,” he tóg, kanhkā tá.

¹⁰ Ge tāgtū han tóg, kŷ nén nē ěn tóg vég tū' he mū sir, kanhkā tá.

¹¹ Kŷ vēšymér ūn tāgtū ag vŷ tá nŷtī, inh nī ěn rā. Cidade tŷ Cesaréia tá ag kāmū ja nīgtī, fóg tŷ iso ag jēgnēn kŷ.

¹² Kŷ Topē kuprīg tóg inh mŷ: “ha jatun mŷ ag mré tīg,” he mū. Kŷ tag ag tóg inh mré mū mū, ū tŷ 6 (ke) tag ag, Jesus mré ke tag ag. Kŷ ěg tóg ěn ĩn kāra ge mū sir.

¹³ Kŷ tóg ěg mŷ ā tŷ Topē tŷ jēnē jafā ve ja tó mū. Ti ĩn kātá tóg nēji jē ja nī, Topē tŷ jēnē jafā ti. Kŷ tóg nēji ti mŷ: “Jope ra ū jēgnē,” he mū. “Tá Simão jé prēr, ū tŷ Pedro he mū ěn,” he ja tóg nēji ti mŷ.

¹⁴ “Ēn vŷ ā mré vīnh mū. Ti vī tŷ ā tóg kren ke mū, ā mré ke kar fag ke gé,” he ja tóg nēji nī ti mŷ, Topē tŷ jēnē jafā ti,” he tóg, Pedro ti.

¹⁵ “Kŷ sóg ag mŷ kāmén mū. Isŷ tó sī han mū ra Topē kuprīg tóg ag ki rā mū. Ti tŷ ěg ki rā ri ke han tóg mū, kurā ěn kǎ.

16 Kǵ sóg Jesus vī to jykrén mǔ, ti tǵ ěg mǵ: João tóg goj tǵ ag kygpe ja nǵgtǵ, hǵ ra Topě kuprǵg tóg ag kǵra rǵnh mǔ, tǵ vĕnh kype ri ke vĕ sir, he ěn to,” he tóg, Pedro ti.

17 “Kǵ Topě vǵ ag jagrĕn mǔ, ǵ kuprǵg tǵ, ti tǵ ěg jagrĕn ri ke vĕ, ěg tǵ Jesus Cristo ki ge kǵ. Hǵ kǵ sóg Topě kato tĕ jǵvǵnh ja nǵ,” he tóg, Pedro ti.

18 Ag tǵ tag mĕ kǵ ag krǵ tóg kusa' he mǔ. Kǵ ag tóg: “Topě vǵ fóg ag krǵn mǔ gé, ag tǵ ǵjag jykre tovǵnh jĕ, ag tǵ ěg rǵr krǵg ja tǔ ve jĕ,” he ag tóg mǔ.

Antioquia tá ke ag tǵ Topě vī kri fi

19 Ag tǵ Estĕvǵo tĕn kar kǵ Jesus ki ge kǵ nǵtǵ ag tóg hĕn ra mǔ mǔ, ag tǵ ag vóg kónǵnh kǵ. Kǵ ag tóg ga tǵ Fenícia ra mǔ mǔ, goj vǵso tǵ Chipre ra, cidade tǵ Antioquia ra ke gé. Ag mǔn kǵ ag tóg Israel ag hǵ mǵ Topě vī tó mǔ.

20 Kejĕn Chipre tá ke ũ ag tóg cidade tǵ Antioquia ra mǔ mǔ, Cirene tá ke ag ke gé. ěn ag tóg fóg tǵ Grego vī tó mǔ ag mǵ Jesus Cristo kǵmĕn mǔ, vĕnh vī sér tag ti.

21 Kǵ Topě tóg ag mré ag krǵn mǔ. Kǵ ũ tǵ hĕn ri ke ag tóg Jesus ki ge mǔ, Topě jykre han jĕ.

22 Kǵ Jerusalĕm tá ke ag tóg mĕg mǔ, fóg ag tǵ Jesus vī kri fig mǔ ti. Jerusalĕm tá Jesus ki ge kǵ nǵtǵ ag tóg mĕg mǔ gé, ũ tǵ tá Topě vī mĕ jĕ vĕnh mǵn tǵ ag. Kǵ ag tóg Barnabé jĕnĕg mǔ, ti tǵ Antioquia ra tǵg jĕ.

23 Tǵ tǵ tá jun kǵ ti fe tóg mrin ke mǔ, Topě tǵ ag jagǵgtǵnh kǵ. Kǵ tóg ag jyvĕn mǔ, ag tǵ Jesus ki rǵ to krónh ke tǔ nǵn jĕ, ag tǵ fe tar nǵtǵn jĕ.

24 Barnabé vǵ tǵ ũn vī há nǵ, Topě kuprǵg vǵ tǵ ti jagrĕ nǵ. Kǵ ti jykre kar tóg Jesus ki rǵ ja nǵ. Kǵ ũ tǵ

hĕn ri ke ag vỹ Jesus ki ge mũ gé sir, ti tỹ ag jyvĕn kỹ.

²⁵ Kỹ Barnabé tóg cidade tỹ Tarso ra tĩ mũ, Saulo jăvănĥ jé, tá.

²⁶ Ti tỹ ti ve kỹ tóg ti pére tĩ mũ, Antioquia ra. Kỹ ag tóg prỹg pir han, Antioquia tá. Jesus ki ge kỹ nỹtĩ ag tỹ vĕnh măn kỹ ag tóg ag kanhrăn tĩ, Barnabé ti, Saulo ti ke gé. Kỹ ũn e vỹ Barnabé ag vỹ jĕmĕg tĩ. Kỹ ag tóg Antioquia tá ag tóg ũ tỹ Jesus mré mũ ag to: “Cristo mré ke ag,” he vén. Kỹ ag jiji vĕ sir, hă vỹ: Cristo mré ke ag, he mũ.

²⁷ Kejĕn Jerusalém tá ke ũ ag tóg Antioquia tá junjun mũ, Topĕ vỹ tó tĩ ag.

²⁸ Ag kă ũ jijin hă vỹ: Ágabo, he mũ. Ĕn vỹ kejĕn Topĕ kuprĩg tỹ ti krĩn kỹ: “kejĕn ĕg tóg prỹg venh mũ, kănhmar,” he mũ, “ga kar mĩ hă,” he tóg. Kỹ tóg Clăudio tỹ pă'i tỹ imperador nĩn kỹ tóg ge nĩ.

²⁹ Kỹ ag tóg prỹg nĩnh ken kỹ Jesus mré mũ ag tóg Judéia tá ke ag to jykrén mũ sir. Kỹ ag tóg: “ĕg hỹn ag mỹ nĕn ũ jĕnĕnh mũ, ag tỹ kon jé,” he mũ. Kỹ vĕnh kar vỹ ag tũ kju vin han mũ, ag tỹ Judéia tá Jesus mré ke ag mỹ jĕnĕ jé.

³⁰ Kỹ ag tóg Barnabé jĕnĕg mũ, Saulo ke gé, ag tỹ gé(g) mũ jé, kófa ag mỹ vin jé, ũ tỹ Jesus ki ge kỹ nỹtĩ ag ki rĩr tĩ ag mỹ. Kỹ ag tóg ke mũ sir.

12

Ag tỹ Pedro se

¹ Kejĕn pă'i tỹ rei tỹ Herodes vỹ Jesus ki ge kỹ nỹtĩ ũ ag sigség mũ, ag vóg kónăn jé.

² Kŷ tóg soldado jĕnĕg mŭ, ti tŷ Tiago tén jé, João kĕke ĕn. Kyfé téj tŷ tóg ti tén mŭ, rógro téj tŷ, soldado ti, Herodes tŷ ti jĕnĕn kŷ.

³ Kŷ tóg Israel ag mŷ há tŷ, ti tŷ Tiago tén kŷ. Kŷ Herodes tóg Pedro kĕgmĭg mŭ gé sir. Festa kĕki tóg ti kĕgmĭg mŭ. Festa ĕn ki ag tóg pĕo jĕgĭã tŷ ko tŷ, Israel ag. Ag jykre vĕ.

⁴ Soldado ag tŷ Pedro ve kŷ ag tóg vĕse ja kĕki ti fón mŭ. Soldado tŷ 16 ag vŷ ti ki rŷr mŭ, ũ tŷ 4 tŷ ti ki rŷr nŷtŷn kŷ ũ tŷ 4 ũ ag nŷtĭg ja ki nŷtŷ ke tŷ, jagnĕ ri kĕn. “Festa tŷ Pĕscoa kar kŷ sóg ag mŷ ti ven mŭ, ag tŷ ti vóg kónĕn jé,” he tóg, Herodes ti.

⁵ Kŷ Pedro tóg se kŷ jĕ nŷ. Hĕ ra Jesus ki ge kŷ nŷtŷ ag tóg ti jo Topĕ mré vŷ kŷ nŷtŷ, ag tŷ to krónh ke tŷ nŷn kŷ.

Pedro tŷ kavar nŷ

⁶ Tŷ vaj kŷ Herodes vŷ ag mŷ ti ven sór mŭ. Tŷ kuty ĕn kĕ Pedro tóg soldado régre ag kju ki nŷr mŭ. Ferro régre tŷ tóg se kŷ nŷ ag mré. Soldado ũ ag tóg vĕse ja jĕnkĕ ki rŷr mŭ.

⁷ Kŷ vĕhĕ Topĕ tŷ jĕnĕ jafĕ tóg ti mré jĕ nŷ, kŷ tóg ĩn ĕn krĕm jĕngrĕ nŷ, kuty hĕ ra. ĕn tóg Pedro ki pérĕn ke mŭ, ti kĕvy ki. Ti rŷn tóg mŭ, kŷ tóg ti mŷ: “kur nŷ,” he mŭ. Kŷ ti nŷgé se ja tóg varan ke mŭ, ferro ĕn ti. Kŷ tóg kavar kŷ nŷ nŷ, kyvar kŷ, Pedro ti.

⁸ Kŷ Topĕ tŷ jĕnĕ jafĕ tóg ti mŷ: “vĕsóg fŷ ra,” he mŭ. “Ā pĕn né tu ra gé, Ā pĕn to ró ti,” he tóg. Kŷ tóg ke mŭ sir. Kŷ tóg ti mŷ: “Ā kur rŷ tu kŷ inh nón kĕtĭg,” he mŭ.

⁹ Kŷ tóg kĕkutĕ mŭ. Ti nón tóg tŷ mŭ, Pedro ti. Hĕ ra tóg ti mŷ tŷ nĕn ũ ve jĕ, ti tŷ vég mŭ ti. Ti mŷ tóg

tỹ ti vĕnhpĕti ve tĩ, Topĕ tỹ jĕnĕ jafĕ tỹ nĕn han mũ ti.

¹⁰ Jĕnkĕ ki rĩr vĕn mũ ĕn pĕtĕn ag tóg mũ, jĕnkĕ ki rĩr mũ ũ ke gé. Kỹ ag tóg jĕnkĕ mág tá junjun mũ, ferro tỹ han kỹ jĕ ĕn, kyfé tỹ han kỹ jĕ ĕn, ũn tỹ cidade to nón mũ ĕn. Jĕnkĕ ĕn vỹ vĕsógki rĕm ke mũ ag jo. Kỹ ag tóg kĕpa mũ sir. Ēpry jagma ag tóg mũ mũ, ĕmĩn jagma. Kỹ vĕhĕ Topĕ tỹ jĕnĕ jafĕ tóg tĩ mũ sir.

¹¹ Kỹ vĕhĕ Pedro tóg mrin ke mũ, kỹ tóg: “vĕhĕ sóg ki kanhró nĩ,” he mũ. “Topĕ vỹ ĕ tỹ jĕnĕ jafĕ jĕnĕ ja nĩ, kỹ tóg inh kren han mũ, pĕ'i tỹ Herodes jo. Israel kar ag tóg inh jagtar nĩnh ke jĕvĕnh mũ, hĕ ra sóg venh ke tũ nĩ,” he tóg, Pedro ti.

¹² To jykrĕn kỹ tóg Maria fi ĩn ra tĩ mũ, João mỹnh ĕn fi, ag tỹ ũ to: Marcos, he mũ ĕn mỹnh fi. Fi ĩn krĕm ag tóg vĕnh mĕn kỹ nỹtĩ nĩ, Topĕ mrĕ ag vỹ nỹtĩ nĩ, ũ tỹ hĕn ri ke ag.

¹³ Kỹ tóg ĩn to ró jĕnkĕ tỹ tórón' tórón' ke mũ. Kỹ fi camarada fi tóg venh kĕtĩ mũ. Fi jyjy hĕ vỹ: Rode, he mũ.

¹⁴ Kỹ fi tóg Pedro vỹ ki kanhró nĩ, hĕ ra fi tóg ti mỹ nón tũ nĩ, róm tũ fi nĩ, jĕnkĕ ti, fi fe tỹ mrin ke mũ ra. Fi tỹ ĩn kĕra rĕn kỹ fi tóg vĕnh kar mỹ: “Pedro vỹ ró to jĕ,” he mũ.

¹⁵ Kỹ ag tóg fi mỹ: “krĩ vĕnhmỹ ĕ nĩ,” he mũ. Hĕ ra fi tóg: “ti hĕ vĕ,” he mũ. Kỹ ag tóg fi mỹ: “ti ki rĩr tĩ ĕn vĕ hỹn,” he mũ.

¹⁶ Kỹ Pedro tóg ver re tá jĕ nĩ, jĕnkĕ tỹ tórón' tórón' ke mĕn kỹ. Kỹ ag tóg ti mỹ róm mũ, jĕnkĕ ti. Ti vĕg ag tóg mũ sir, kỹ tóg ag mỹ e tĩ.

¹⁷ Kỹ Pedro tóg ag mỹ ĕ nĩgĕ tỹ ge mũ, ag tỹ katy' he jĕ. Kỹ tóg ag mỹ Topĕ tỹ ti kavĕn tó mũ sir, Topĕ

tỹ ti kyvān kỹ. Topě tỹ vĕse ja kĀtá ā kutēm kāmén tóg mũ sir. Kỹ tóg ag mỹ: “Tiago mỹ kemnĩ, Jesus mré ke kar ag mỹ ke gé,” he mũ. Kỹ tóg Jerusalém tá kutē kỹ ěmā ũ ra tĩ mũ sir.

¹⁸ Tỹ vaj kỹ soldado ag fe tóg jũrũn ke mũ. “Pedro hỹn hĕ kĀtá vyr, ti hỹn ne kĀtá vyr?” he ag tóg mũ, ti jāvānh kỹ.

¹⁹ Kỹ Herodes tóg ũ ag jĕgnĕg mũ gé, ti kĀgmĩ jé. Hā ra ag tóg ti vég tũ nĩ gé. Kỹ Herodes tóg Pedro ki rĩr mũ ag ki jĕmĕg mĀn mũ. Kar kỹ tóg soldado ũ ag mỹ: “ag kĀgtén ra, ti ki rĩr mũ ag,” he mũ. Kỹ ag tóg ag kĀgtén mũ sir.

Kar kỹ Herodes tóg Judéia tá kutē kỹ cidade tỹ Cesaréia ra tĩ mũ sir, tá nĩ jé.

Herodes ter

²⁰ Herodes tóg cidade tỹ Tiro tá ke ag to jũ mũ, cidade tỹ Sidom tá ke ag to ke gé. Ěn ag tóg Herodes nĩgia tá junjun mũ. Kỹ ag tóg pĀ'i sĩ mré vĩ mũ, ti jiji hā vỹ: Blasto, he mũ. Herodes vỹ ti tỹ pĀ'i han ja nĩ. Ěn mỹ ag tóg to vĩ mũ, ti tỹ ag jagfy vĩ jé, pĀ'i tỹ Herodes mré, ti tỹ ti fe tỹ há' he jé. Herodes krĕm ke ag tóg ag mỹ vĕjĕn vĕne he ja nĩgtĩ, Tiro tá ke ag mỹ, Sidom tá ke ag mỹ ke gé. Herodes tỹ ag to jũ nĩn kỹ ag tóg tá vĕjĕn ve mĀn tũ nĩ sir. Hā kỹ ag tóg ti fe tỹ há' he sór mũ, ti tỹ ag mỹ vĕne he mĀn jé.

²¹ Kỹ Herodes tóg ag mỹ kurā nĩm mũ. Kỹ tóg ā kur sĩnvĩ ěn tu mũ, pĀ'i kur ěn ti. Kỹ tóg ā nĩgia kri nĩ kỹ ag mỹ vĩ mág han mũ.

²² Kỹ vĕnh kar tóg ti to: “ĕprā vĕnh vĩ pijé’,” he mũ. “Tỹ tóg Topě vĩ mĕ tĩ, ti vĩ ti,” he ag tóg mũ.

²³ Kỹ vĕsỹmér Topě tỹ jĕnĕ jafā tóg ti vóg kónān mũ sir, ti tỹ ag mỹ: “vó,” he tũ nĩn kỹ. “Inh pi(jé) tỹ

Topě nĩ,” he ja tũ tóg nĩ, hã kǵ tóg ti vóg kónãn mũ sir. Kǵ ti nug ga vỹ ti kagrãg mũ, hã kǵ tóg ter mũ.

Barnabé tỹ Saulo mré Topě vỹ tónh tǵ

²⁴ Jó ũ tỹ hěn ri ke ag vỹ Topě vỹ mēg mũ, kǵ ag tóg Jesus ki ge mũ.

²⁵ Kǵ Barnabé vỹ Saulo mré ãjag tỹ nén gé(g) kãmũ mũ ěn vin mũ, Jerusalém tá ke ag mǵ. Prǵg nĩn kǵ Jesus ki ge kǵ nǵtĩ ag tóg Jerusalém tá ke ag mǵ vėjěn jėgně ja nĩgtĩ. Ag mǵ vėjěn ěn vin kǵ ag tóg vỹnvỹn ke mũ sir, Barnabé ti, Saulo ti ke gé. João pére ag tóg mũ mũ, Marcos he mũ ěn ti.

13

¹ Antioquia tá ũ ag tóg nǵtĩ, Topě vỹ tó tĩ ũ ag, Jesus jykre tỹ vėnh kanhrãn nǵtĩ ag ke gé. Jesus ki ge kǵ nǵtĩ ag mré ag tóg nǵtĩ, ũ tỹ vėnh mãn tĩ ag mré, ag tỹ Topě vỹ mē jé. Kǵ ũ jijin hã vỹ: Barnabé, he mũ, kar ũ jyjyn hã vỹ: Simão Negro, he mũ. Ũ tóg tỹ Lúcio nĩ, Cirene tá ke tag ti. Kǵ ũ tóg tỹ Manaém nĩ, pã'i tỹ Herodes mré mog mũ tag ti. Kǵ ũ tóg tỹ Saulo nĩ gé.

² Kejěn ag tóg jagně mǵ Topě jykre tó mũ, ag tỹ jėg tũ nĩn kǵ. Kǵ Topě kuprĩg tóg ag mǵ: “Barnabé fėg ra, Saulo mré,” he mũ, “ag tỹ inh rãnrãj han jé, isỹ nén to jykrén mũ ěn ti, ag tỹ inh jykre tó jé, vėnh kar mǵ,” he tóg, Topě kuprĩg ti.

³ Kǵ ag tóg jėg tũ nĩn kǵ Topě mré vỹ mãn mũ. Ājag nĩgé tỹ ag tóg ag mēg mũ, ag kyměn ag tóg mũ, kǵ ag tóg: “ha mũ jėg ge,” he mũ. Hã kǵ Topě kuprĩg tóg ag jėgněg mũ sir.

Kujá tỹ Elimas

4 Topē kuprīg tỹ ag jēgnēn kỹ ag tóg cidade tỹ Selêucia ra mũ mũ. Tá junjun kỹ ag tóg goj vāso tỹ Chipre ra mũ mũ, canoa mág kāmĩ.

5 Kỹ ag tóg cidade tỹ Salamina tá junjun mũ. Tá ag tóg Topē vĩ kāmén mũ, Israel ag tỹ vēnh kanhrãn jafã kâtá. João Marcos vỹ ag mré tĩ mũ gé. Ag camarada vỹ, João Marcos ti.

6 Goj vāso mũ ag tóg pa mũ. Kỹ ag tóg cidade tỹ Pafos tá junjun mũ, Topē vĩ kāmén kỹ. Tá ù tóg nĩ nĩ, kujá ù. Ón kỹ tóg Topē vĩ tó sór mũ. Israel ù vỹ, ti jiji hã vỹ: Bar Jesus, he mũ.

7 Governador mré tóg nĩ nĩ. Governador jyjy hã vỹ: Sérgio Paulo, he mũ. Krĩ há ti nĩ, Sérgio Paulo ti. Kỹ tóg Barnabé jé prēr mũ, Saulo jé ke gé, ti tỹ Topē vĩ jēmẽ sór kỹ.

8 Kỹ kujá ěn tóg ag vĩ kato tẽ mũ, governador tỹ Topē vĩ kri fig tũ nĩ jé. Kujá ěn jiji ù hã vỹ: Elimas, he mũ, hã vỹ: kujá, he mũ, ti jyjy ti.

9 Kỹ vāhã Topē kuprīg tóg Saulo krĩn mũ. Saulo jiji ù hã vỹ: Paulo, he mũ.

Kỹ Topē kuprīg tỹ ti krĩn kỹ Paulo tóg kujá ěn ki kanẽ jũ han kỹ ti ki ěvãnh mũ,

10 kỹ tóg: “tỹ ã tóg ùn ón mé nĩ,” he mũ. “Jykre pãno ã nĩ (mỹr),” he tóg. “Japo kósin vỹ tỹ ã nĩ (mỹr), vēnh jykre kuryj kato tẽ ã nĩ (mỹr),” he tóg. “Topē japry vỹ kugryj nỹtĩ, ti jamĩn ti, hã ra ã tóg tỹ pãno ke sór tĩ (mỹr), kỹ ã tóg vēnh jykre pãno to krónh ke tũ nĩgtĩ (mỹr),” he tóg.

11 “Ha vé, Topē vỹ ã vóg mũ, kỹ ã tóg kyvãn ha,” he tóg. “Rã venh ke tũ ã nĩnh mũ, kurã tỹ hẽn ri ke ki,” he tóg, Paulo ti.

Kỹ tóg vēsỹmér ti mỹ kuty' he mũ. Kyvó tóg nĩ sir. Kỹ tóg jēmĩg mũ. Û jé tóg prēr mũ, ti tỹ ti pére tĩg jé.

¹² Governador tỹ tag ve kỹ tóg ti mỹ e tĩ. Kỹ tóg Jesus ki rã mũ. Topẽ jykre tóg ti mỹ tar ja nĩ.

Paulo tỹ cidade tỹ Antioquia tá Topẽ vĩ tó

¹³ Kỹ vāhā Paulo ag tóg Pafos tá pa mũ. Canoa mág kāmĩ ag mũ mũ. Kỹ ag tóg ga tỹ Panfília tá junjun mũ, cidade tỹ Perge tá. Hã ra João Marcos tóg kyrã mũ. Ag ré kỹ tóg Jerusalém ra vỹn ke mũ, João Marcos ti.

¹⁴ Jó ag tóg Perge tá pa mũ, ga tỹ Pisídia ra mũ jé, cidade tỹ Antioquia ra. Tá junjun kỹ ag tóg vēnhkán ke kurã ki ag tóg Israel tỹ vēnh kanhrān jafā kãra ge mũ, tá ag nĩgnĩ mũ gé.

¹⁵ Û tóg tá Topẽ tỹ ěg mỹ vēnh jykre nĩm ja ěn to ke mũ, rán kỹ nĩ ěn to. Ti tỹ ěg jyvẽn tó tóg mũ gé, vāsỹ Topẽ vĩ tó tĩ ag tỹ rán ja ěn ti. Kar kỹ pã'i ag tóg Paulo ag jé prēr mũ. Kỹ ag tóg: “kanhkā',” he mũ. “Ājag tỹ ěg jyvẽn sór nỹtĩn kỹ tóg há tĩ,” he ag tóg.

¹⁶ Kỹ Paulo tóg jěg nē mũ. Ā nĩgé tỹ tóg ag mỹ ge mũ, ag tỹ katy' he jé. Kỹ tóg ag mỹ: “ha mẽ, Israel kar',” he mũ. “Jēmẽ ra ha, ù tỹ Topẽ kaměg mũ kar, ājag tỹ tỹ fóg nỹtĩ ra,” he tóg.

¹⁷ “Israel ag vỹ Topẽ kaměg tĩ. Topẽ tag tóg ěg jóg'jóg ag kuprěg ja nĩ. Ag tỹ tóg povo mág han, ag tỹ ver Egito tá ke ag mré nỹtĩn kỹ. Tá tóg ag kãpan mũ, ã jykre tar ěn tỹ, Topẽ ti,” he tóg.

¹⁸ “Ag to tóg fen mág mũ, Topẽ tag ti, ag tỹ ěmã tũg ja mĩ mũn kỹ, prýg tỹ 40 ěn ki.

¹⁹ Povo tỹ 7 tỹ tóg tũ' he mũ, ga tỹ Canaã tá. Kỹ tóg ěg jóg'jóg ag mỹ ag ga fig mũ, tỹ ag tũ nĩ jé.

20 Kǵ tóg ag mǵ pā'i ag vin mǵ gé, ag jyvĕn jafā ag, 100 tǵ 4 kri 50 anos ki. Kar kǵ Samuel vǵ tǵ Topĕ vǵ tó tǵ nǵ gé.

21 Kǵ ag tóg pā'i mág tǵ rei ve sór mǵ. Kǵ ag tóg Topĕ mǵ to vǵ mǵ. Hā kǵ Topĕ tóg Saulo fĕg mǵ, Quis kósin ĕn. Benjamim krĕ'krĕ ũ vĕ, Saulo ti. 40 anos ki tóg tǵ pā'i mág tǵ rei nǵ.

22 Ti tǵ ĕn kutĕm kar tóg Davi fĕg mǵ, Topĕ ti. Davi to tóg vǵ há han mǵ, Topĕ ti, kǵ tóg: “Davi ve sóg, Jessé kósin,” he mǵ. “Nĕn há han tóg tǵgtǵ. Kǵ sóg ti to há nǵ. ĕn hā vǵ inh jykre kar han mǵ,” he tóg, Topĕ ti, Davi to,” he tóg, Paulo ti.

23 “Davi kósin ũ vĕ, hā vǵ: Jesus, he mǵ. Topĕ vǵ vāsǵ ti kātǵ ke tó ja nǵgtǵ. Kǵ tóg vāhā Jesus jĕnĕ ja nǵ, ĕg povo tǵ Israel to, ti tǵ ĕg kren han jé.

24 João vǵ ti kātǵ ke jo vĕnh kar mǵ: “ājag jykre tovānh ra,” he ja nǵgtǵ, “isǵ ājag kygpe jé,” he ja tóg nǵgtǵ, ĕg povo tǵ Israel kar mǵ.

25 João rānhraj tǵ tǵ' hĕnh ken kǵ tóg ag mǵ: “iso ājag tóg Cristo he sór mǵ,” he ja nǵgtǵ, João ti. “Hā tǵ vĕ,” he ja tóg nǵgtǵ. “Inh pi(jé) tǵ Cristo nǵ,” he ja tóg nǵgtǵ. “Ha vé, inh nón tóg kātǵ, inh Senhor ti, hā vǵ: Jesus, he mǵ. Sǵ tǵ ti camarada nǵnh ke vĕ vĕ, sǵ ti pĕn né kunǵ jé, ti pĕn to ró ti, hā ra sóg tǵ ti krĕm ke pĕ jĕ,” he ja tóg nǵ, João ti,” he tóg, Paulo ti.

26 “Inh kanhkā',” he tóg. “Abraão krĕ',” he tóg. “Ū tǵ Topĕ kamĕg mǵ', fóg kāmǵ,” he tóg. “Topĕ vǵ ĕg hā mǵ vĕnh vǵ tag jĕnĕ, ĕg krenkren jé,” he tóg.

27 “Jerusalém tá ke ag vǵ Jesus ki kagtǵ ja nǵtǵgtǵ. Ti tǵ tǵ Topĕ kósin nǵn ki kagtǵ ja ag tóg nǵtǵgtǵ, ag pā'i ag ke gé. Hā kǵ ag tóg vāsǵ rán kǵ nǵ ĕn han. Vĕnhkán ke kurā ki ag tóg vég tǵ, Topĕ vǵ tó tǵ ag tǵ

nén rán ja ti. Hã ra ag tóg sir ag tỹ nén tó mũ ãn ki króm, ãjag tỹ Jesus to: ter jé tóg ke mũ, hen kỹ.

28 Nén ù kórég han ja tũ ti nĩ, kỹ ti ter ke tũ vễ vễ, hã ra ag tóg Pilatos mỹ: “ẽg tỹ ti tén há tóg tĩ vễ,” he ja nĩgtĩ.

29 Ag tỹ ti to rán ja ãn ki króm kãn kỹ ag tóg cruz ãn to ti térem ja nĩgtĩ, vễnh kej kátá ag tóg ti fón ja nĩgtĩ.

30 Hã ra Topẽ tóg ti rĩn mãn ja nĩgtĩ, ti ter mũ ra.

31 Kỹ tóg ã mré ke ag mỹ vễnh ven ja nĩgtĩ sir, Jesus ti, ù tỹ ti mré Jerusalém ra mũ ja ag mỹ, Galiléia tá kãmũ kỹ. ãn ag tóg ti kãmén mũ sir, vễnh kar mỹ.

32 Vễnh vĩ tag tó ẽg tóg mũ,” he tóg, Paulo ti.

33 “Èg jóg'jóg ag vỹ Topẽ vĩ ãn mẽ ja nĩgtĩ. Hã ra tóg ùri han mũ, Topẽ ti, ã tỹ vẫsỹ nén tó ja ãn ti. Èg jóg'jóg ag krẽ'krẽ ag mỹ tóg han mũ, ti tỹ vẫsỹ nén tó ja ãn ti, Topẽ ti. Hã kỹ tóg Jesus rĩn mãn, ti ter kỹ. Kỹ tóg ti mỹ: “tỹ ã tóg inh kósin jẽ. ùri sóg ã han,” he ja nĩgtĩ, Topẽ ti, Jesus mỹ. Topẽ mỹ jãn jafã ki tóg rán kỹ nĩ, jãn tỹ 2 ki,” he tóg, Paulo ti.

34 “Hã ra tóg ti tỹ ti rĩn mãn ke tó ja nĩgtĩ gé, ti mur ke to hã. Ti vag ke tũ ãn tó ja tóg nĩgtĩ gé, kỹ tóg: “sỹ Davi mỹ nén tó ja ãn ki króm jé sóg ke mũ,” he ja nĩgtĩ. “Ãjag mỹ sóg han mũ, sỹ ti mỹ nén tó ja ãn ti,” he ja tóg nĩgtĩ, Topẽ ti,” he tóg, Paulo ti.

35 “Kỹ tóg tag tó ja nĩgtĩ gé: “ã tũ vỹ vag ke tũ nĩ,” he ja tóg nĩgtĩ gé, Topẽ ti,” he tóg, Paulo ti.

36 “Hã ra Davi vỹ ter ja nĩgtĩ, ã jóg'jóg ag nón. Kỹ tóg vag ja nĩnhhã. Topẽ tỹ ti mỹ nén tó jan ki króm ja tóg nĩgtĩ, Davi ti. ã mré ke ag mỹ tóg han, Topẽ tỹ

ti mÿ nén tó ja ti. Hã ra tóg ter ký vag ja nÿgtĩ inhhã, Davi ti.

³⁷ Ti jãvo tóg vag ja tũ nĩ inhhã, Jesus ti, Topẽ tÿ ti rĩn mãn ký,” he tóg, Paulo ti.

³⁸ “Ha vé, inh kanhkã’,” he tóg. “Jesus tag tugrĩn Topẽ vÿ ãjag mÿ vènh pãte fón sór mũ, ãjag tÿ ti vĩ mranh ja ti. Hã ký sóg ãjag mÿ tó mũ,” he tóg.

³⁹ “Ãjag tÿ Moisés vĩ mẽg mũ ra ãjag jykre tóg kuryj ja tũ nĩ ver. ãjag tÿ hã ra Jesus ki ge ký tóg ke mũ sir, Topẽ ti. ãjag kugrynh tóg mũ sir.

⁴⁰ Hã ra ti to é he tũg nĩ. Ke tũ nĩ mũ ra ãjag tóg venh ke mũ, vãsÿ nén rán ký nĩ ãn ti, Topẽ vĩ tó tĩ tÿ nén tó ãn ti,

⁴¹ hã vÿ: “iso ãjag tóg é he mũ (mÿr),” he mũ. “Sÿ nén han ke ve jé ãjag tóg ke mũ, ký ãjag kanẽ jur ke mũ, ãjag fe tóg jũrũn kenh ke mũ gé,” he ja tóg nÿgtĩ, Topẽ ti. “Ãjag tÿ kri finh ke tũ vè vè, ã tÿ ãjag mÿ tó mũ ra. Hã ra ãjag tóg venh ke mũ,” he ja tóg nÿgtĩ, Topẽ vĩ tó tĩ ti,” he tóg, Paulo ti.

⁴² Ag tÿ Paulo vĩ mẽ kãn ký ag tóg ĩn ãn kãtã pa mũ. ĩn kãtã pa ký ag tóg ti mÿ: “vènh kãn ke kurã ã tá ãg mÿ kãmén mãn nĩ,” he mũ.

⁴³ Ký Israel tÿ hèn ri ke ag tóg Paulo ag nón mũ mũ. Fóg ag tóg ag nón mũ mũ gé, fóg tÿ Israel jykre han mũ ag, ã tÿ Topẽ kamẽg mũ ag. Ký Paulo ag tóg ag jyvèn mũ, ag tÿ Topẽ to jykrén ký nÿtĩ jé, ag tÿ ti tÿ ãg jagãgtãn to jykrén ký nÿtĩ jé.

⁴⁴ Vènhkãn ke kurã ã tá cidade ãn tá ke kar ag vÿ vènh mãn mũ, Topẽ vĩ jẽmẽ jé.

⁴⁵ Ký Israel ag tóg ãn e ãn vèg mũ. Ký ag tóg jũgũ mũ, vènh kar tÿ Paulo ag to há nÿtĩn ký. Hã ký ag

tóg Paulo vĩ kafãn mũ sir, ti tỹ ag mỹ Topẽ vĩ tón kỹ. Tì to ag tóg vĩ vĩ he mũ gé.

46 Hã ra Paulo ag tóg ag kamẽg tũ nĩ. Ag mỹ ag tóg: “ãjag hã mỹ ẽg tóg tó vén, Topẽ vĩ ti,” he mũ, “tì tỹ ẽg mỹ: Israel ag mỹ tó vén, hen kỹ. Hã ra ãjag tóg mẽ jãvãnh nỹtĩ,” he ag tóg. “Ëg rĩr krỹg ja tũ venh ke tũ ãjag nĩ, ãjag tỹ mẽ jãvãnh nỹtĩn kỹ,” he ag tóg. “Hã kỹ ẽg tóg sir fóg ag hã mỹ tónh ke mũ, Topẽ vĩ ti,” he ag tóg.

47 “Topẽ vĩ ẽg mỹ: “ãjag tỹ sóg néj gru ri ke han mũ,” he mũ, “fóg kar ag tỹ ãjag ki Topẽ ve jé, kanhgág ag ke gé. Æjag ki ag tóg mẽnh ke mũ, Jesus tỹ ag krenkren han ke ti, ga fyn ja mũ hã,” he ja tóg nĩ ẽg mỹ, Topẽ ti,” he ag tóg, Paulo ag.

48 Fóg ag tỹ tag mẽ kỹ tóg ag mỹ sér tĩ sir. Kỹ ag tóg Topẽ vĩ to há nỹtĩ, ti mỹ vĩ há han kỹ. Kỹ ag tóg Jesus ki ge mũ, Topẽ tỹ ùn kuprẽg mũ ag, ag tỹ ẽg rĩr krỹg ja tũ ve jé.

49 Kỹ ga ẽn tá ke kar ag vĩ Topẽ vĩ jẽmẽg mũ.

50 Hã ra Israel ag tóg ùn tãtã há ù fag mré vĩ mũ, fóg tỹ Israel jykre han mũ fag. Pã'i ag mré ag tóg vĩ mũ gé. Paulo ag kato ag tóg vĩ mũ. Kỹ ag tóg ag vóg kónãn mũ. “Ha mũ jẽg, ẽmã ù ra,” he ag tóg mũ sir, ag vóg kónãn kar kỹ.

51 Kỹ Paulo ag tóg ãjag pẽn kykũnhkũnh mũ, ag mỹ: “Topẽ tovãnh ãjag huri,” he jé. Kỹ ag tóg cidade tỹ Icônio ra mũ mũ sir.

52 Jesus mré mũ ag mỹ tóg hã ra sér tĩ. Topẽ kuprĩg vĩ tỹ ag jagrẽ nĩ, kỹ tóg ag mỹ sér tĩ sir.

14

Cidade tỹ Icônio tá Topẽ vĩ tó

¹ Ag tỹ cidade tỹ Icônio tá junjun kỹ ag tóg sir Israel tỹ vãnh kanhrăn jafã kăra ge mũ. Kỹ ag tóg ag mỹ Topê vĩ kămén mũ. Kỹ Israel tỹ hên ri ke ag tóg Jesus ki ge mũ gé, fóg tỹ hên ri ke ag ke gé, ù tỹ Grego vĩ tó mũ ẽn ag.

² Kỹ Israel ag tóg, ù tỹ Jesus ki ge jăvănĥ ag tóg fóg ag krĩn kónăn mũ sir, Jesus mré ke ag to.

³ Hă ra Paulo ag tóg tá nỹtĩ mág han mũ. Kỹ ag tóg Topê vĩ tó mũ, ag tỹ ag kamêg tũ nĩn kỹ, Topê vĩ kri fi kỹ. Kỹ Topê tóg ag mỹ ă jykre fig mũ, ag tỹ ẽg tỹ nén han vãnh hyn han jé. Hă kỹ vãnh kar tóg Topê jykre ki kanhró nỹtĩ sir.

⁴ Kỹ vãnh kar tóg vãnh kăpugpóv kỹ nỹtĩ nĩ. Û ag tóg Israel ag to há nỹtĩ, jó ù ag tóg Jesus tỹ ùn vin mũ ag tó há nỹtĩ.

⁵ Kỹ Israel ag tóg fóg ag mré jykrén mũ, fóg tỹ pã'i ag mré, ag tỹ Paulo ag vóg kónăn jé, ag tỹ pó tỹ ag pĩn jé.

⁶ Kỹ Paulo ag tóg jêmêg mũ, kỹ ag tóg cidade ù ra mũ mũ, cidade tỹ Listra ra, cidade tỹ Derbe ra ke gé. Ga tỹ Licaônia tá ti nỹtĩ, cidade tag ti.

⁷ Cidade ẽn mũ mũn kỹ ag tóg tá Jesus vĩ há tugtó mũ sir.

Ag tỹ cidade tỹ Listra tá Paulo vóg kónăn

⁸ Cidade tỹ Listra tá ke ù tóg nĩ nĩ, ùn tĩg vãnh. Ti pẽn vĩ grĩ nỹtĩ. Ge pẽ tóg nĩ, ă mur mũn kă. Pẽn krój tóg nĩ.

⁹ Ẽn tóg sir Paulo vĩ mêg mũ. Kỹ Paulo tóg ti tugnỹm mũ. Kỹ tóg ti tỹ Jesus vĩ kri fig mũ vэг mũ, Jesus tỹ ti tỹ há' he jé.

¹⁰ Kĩ tóg jamã hár(a) ti mĩ ke mũ, kĩ tóg: “jêg nê ra,” he mũ. “Vênhrã hã jêg,” he tóg ti mĩ, Paulo ti. Kĩ tóg vâhã hũm he mũ. Kĩ tóg mĩ tĩ mũ.

¹¹ Kĩ tóg vênh kar ên mĩ e tĩ, ag tỹ Paulo tỹ nén han mũ ven kũ. Kĩ ag tóg ãjag vĩ ki jagnê mĩ ke mũ, vĩ tỹ Licaônica he mũn ki. Jamã hár(a) ag tóg: “topê ag vỹ êg tá junjun,” he mũ. “Êg ri ke ag nỹtĩ, topê ag, kũ ag tóg êg tá re mũ,” he ag tóg, Paulo ag to.

¹² Kĩ ag tóg Barnabé to: Júpiter, he mũ. Paulo to ag tóg: Mercúrio, he mũ sir, ti vĩ mág to. Ón kũ ag topê jygji vê, hã vỹ: Júpiter, Mercúrio, he mũ.

Hã ra Paulo ag tóg ag vĩ ki kagtĩg nỹtĩ.

¹³ Júpiter jo ĩn vỹ cidade fyr tá jê nĩ, kũ ti tũ ki rĩr tĩ tóg tá nĩ gé. Kĩ tóg monh gé(g) tĩ mũ, ka fej tỹ coroa ke gé, Júpiter tũ ki rĩr tĩ ên ti. Cidade to ró jãnkã mãra tóg gé(g) tĩ mũ. Tá tóg monh kugprũn sór mũ, Barnabé mĩ, Paulo mĩ ke gé. Ón kũ ag tóg Paulo ag to: “topê ag vê,” he mũ, hã kũ ag tóg ag mỹ monh kuprũn sór mũ, tá ke kar ên ag.

¹⁴ Hã ra Paulo ag tóg mêng mũ, kũ ag tóg ãjag kur janjãn mũ, jũgjũ kũ. Ủ tỹ vênh mãn kũ nỹtĩ ag to ag tóg pétê mũ. Prêr kũ ag tóg ag mỹ:

¹⁵ “ne nê?” he mũ. “Tỹ êg êprã ke nỹtĩ, ãjag ri ke,” he ag tóg. “Hã ra êg tóg ãjag mỹ kãmén sór mũ, ãjag tỹ ón kũ topê tag ag tovãnh jé. Topê pê ki gemnĩ, ãn rĩr mũn ki. Kanhkã han tóg, ga ke gé, goj ke gé, mĩ mũ kar ên ke gé, Topê ti,” he ag tóg.

¹⁶ “Vãsỹ Topê tóg nação ag mỹ nén ã to ja tũ nĩgtĩ, kũ ag tóg ãjag jykre mĩ mũgtĩ.

¹⁷ Ge ra tóg ag ki rĩr há han mũ, Topê ti, ag tỹ tag to vâhã ti ki kanhrãn jé. Hã jé tóg ta jênê, kũ ãjag

jakré tóg mogmog mũ. Kĩ ãjag tóg konh ke mũ. Kĩ ãjag fe tóg há' he mũ sir. ãjag mũ tóg sér tĩ sir, ti tỹ ãjag mũ vėjēn han kỹ, Topē ti,” he ag tóg, Paulo ag.

¹⁸ Ag vĩ ki ag tóg ag mũ nén ũ kugprũn tovānh mũ, Paulo ag mũ, vėnh kar ěn ag. Hã ra ag tóg ag mũ nén ũ kugprũn kren ja nĩgtĩ, tá.

¹⁹ Kar kỹ cidade tỹ Antioquia tá ke ag tóg tá junjun mũ, cidade tỹ Icônio tá ke ag ke gé. Israel ag vė, tá junjun mũ ag. Ěn ag vėnh kar krĩn kónān mũ, kỹ ag tóg Paulo pin mũ, pó tỹ. “Ter ti huri,” he ag tóg mũ sir, ti pin kar kỹ. Kỹ ag tóg ti raran mũ sir. Cidade fyr tá ag tóg ti raran kỹ ti fón mũ sir.

²⁰ Kỹ Jesus mré mũ ag tóg ti venh kāmũ mũ, hã ra tóg jėg nē mũ, Paulo ti. Cidade kãra tóg rã mũ.

Tỹ vaj kỹ tóg hã ra cidade tỹ Derbe ra tĩ mũ, Barnabé mré.

²¹ Tá ag tóg Jesus kãme há tó mũ gé, Derbe tá. Kỹ ũ tỹ hēn ri ke ag tóg Jesus ki ge mũ sir.

Paulo ag tỹ cidade tỹ Antioquia ra vỹnvỹn ke

Kar kỹ ag tóg cidade tỹ Listra ra vỹnvỹn ke mũ, cidade tỹ Icônio ra ke gé, cidade tỹ Antioquia ra ke gé, Paulo ag.

²² Vỹnvỹn ke ki ag tóg Jesus mré mũ ag jyvėn mũ sir, ag tỹ Jesus vĩ kri fi to krónh ke tũ nĩn jé, ag tỹ to fe tar nĩn jé ke gé. “Ěg tỹ Topē tỹ tỹ ěg pã'i nĩ ve sór nỹtĩn kỹ ěg tóg ti venh ke jo vėnh jagãgtar jagy venh ke mũ,” he ag tóg, Jesus ki ge kỹ nỹtĩ ag mũ, Paulo ag.

²³ Kỹ ag tóg ag mũ kófa ag kuprėg mũ, ag tỹ Jesus ki ge kỹ nỹtĩ ag ki rĩr jé, ũ tỹ Topē vĩ mẽ jé vėnh mǎn tĩ ag ki. Ag to ag tóg Topē mré vĩ mũ gé, nén ũ ko tũ

nĩn kŷ. Kŷ ag tóg: “Topě vŷ ājag ki rŷr há han mũ,” he mũ. Kŷ ag tóg mũ mũ sir.

²⁴ Kŷ ag tóg ga tŷ Pisídia fŷn pa mũ. Ga tŷ Panfília tá ag tóg junjun mũ.

²⁵ Cidade tŷ Perge tá ag tóg Topě vŷ tó mũ gé sir. Kar kŷ ag tóg cidade tŷ Atália ra mũ mũ.

²⁶ Tá junjun kŷ ag tóg cidade tŷ Antioquia ra mũ mũ gé, canoa mág kāmĩ. Antioquia ěn tá ag tóg pa ja nŷ (mŷr). Tá ke ag tóg ag to Topě mré vŷ ja nŷtŷ, ti tŷ ag jy nŷgān jé, ag tŷ ti rānrāj han kŷ. Věnh rānrāj ěn han kān ag tóg mũ (mŷr) sir, kŷ ag tóg Antioquia ra vŷnvŷn ke mũ.

²⁷ Tá junjun kŷ ag tóg Jesus ki ge mũ kar jé prěr mũ, ag tŷ věnh mǎn jé. Kŷ ag tóg ag mŷ Topě tŷ nén han mũ kar kāmén mũ. “Fóg ag ne tóg Jesus ki ge mũ gé, Topě tŷ ag krŷn kŷ,” he ag tóg mũ ag mŷ.

²⁸ Kŷ ag tóg tá nŷtŷ, kysā tŷ hěn ri ke ki. Jesus mré mũ ag mré ag tóg nŷtŷtŷ.

15

Ag tŷ Topě jykre to jykren

¹ Kejěn Judéia tá ke ŷ ag tóg tá junjun mũ, Antioquia tá. Tá junjun kŷ ag tóg Jesus mré ke ag mŷ kāmén mũ, kŷ ag tóg: “ājag gré junun fár kym nŷ,” he mũ. “Moisés tŷ ěg mŷ nén tó mũ ěn han nŷ. Ke tũ nŷ mũ ra ājag tóg krenkren ke tũ nŷ,” he ag tóg.

² Hǎ ra Paulo ag tóg: “ke tũ vē,” he mũ. Kŷ ag tóg jagně vŷ kafān mũ sir. Kŷ Jesus mré ke kar ag tóg Paulo ag mŷ ke mũ, ag tŷ Jerusalém ra mũ jé. “Tag ag mré mũmnŷ, Jerusalém ra,” he ag tóg. “Tá Jesus tŷ ŷn vin mũ ag mré vŷmnŷ, kófa ag mré. Ag mŷ: ěg

hŷn hē ri kenh mŷ, vēnh gré junun fār kym ke to? hemnī,” he ag tóg.

³ Kŷ Paulo ag tóg: “ēg mŷnh ke nē ha,” he mŷ. Jesus ki ge kŷ nŷtī ag tóg ag mré mŷ sī han, kŷ ag tóg mŷ mŷ. Kŷ ag tóg ga tŷ Fenícia fīn pa mŷ sir, ga tŷ Samaria fīn ke gé. Ag mŷn kŷ ag tóg Jesus mré ke kar ag mŷ fóg ag kāmén mŷ, fóg ag tŷ Jesus ki ge mŷ ag. Kŷ tóg vēnh kar mŷ sér tī sir.

⁴ Hā kŷ ag tóg Jerusalém tá junjun mŷ. Kŷ tá Jesus ki ge kŷ nŷtī ag tóg vēnh mǎn mŷ, Jesus tŷ ūn vin mŷ ag mré hā, kófa ag mré hā. Kŷ ag tóg ag mŷ Topē tŷ nén han mŷ kar tugtó mŷ.

⁵ Hā ra Fariseu ū ag tóg tá nŷtī gé, ū tŷ Jesus ki ge mŷ ag. Ēn ag tóg ag mŷ ke mŷ. “Ēg mŷ tóg há tī, ag tŷ ājag gré junun fār kym kym ken kŷ,” he ag tóg mŷ, fóg ag to. “Ag tŷ Moisés tŷ ēg mŷ vēnh jykre nīm ja ki kanhrān kŷ tóg ēg mŷ há tī,” he ag tóg mŷ sir, Fariseu ag, fóg ag to, ū tŷ Israel jykre han tū ag to.

⁶ Kŷ vāhā Jesus tŷ ūn vin mŷ ag vŷ kófa ag mré vēnh mǎn mŷ, vyr mŷ, to vēmén jé.

⁷ Kŷ ag tóg to vēmén mág han mŷ sir. Kŷ kejēn Pedro tóg jēg nē kŷ ag mŷ: “inh kanhkā’,” he mŷ. “Vāsŷ Topē tóg inh kuprēg ja nī, isŷ fóg ag mŷ Jesus vī há tó jé, ag tŷ jēmē kŷ krenkren jé,” he tóg. “Tag ki kanhró ājag tóg nŷtī,” he tóg.

⁸ “Kŷ Topē tóg ag mŷ ā kuprīg jēnēg mŷ. Ag fe ki kanhró tóg nī, Topē ti, kŷ tóg ag mŷ ti jēnēg mŷ. Hā ki tóg ēg mŷ ven mŷ, ag tŷ Jesus ki ge kŷ nŷtī ti, ēg ri kén,” he tóg.

⁹ “Hā kŷ Topē tóg ag to: vyr mŷ ke ag vē, he tū nīgtī. Ag tŷ ti ki ge kŷ nŷtīn kŷ tóg ag fe tŷ jānhkri’ he mŷ, fóg ag fe tŷ,” he tóg.

10 “Topē tỹ há vĕ (mỹr). To: vĕnhmỹ ti nĩ, he tũg nĩ,” he tóg. “Ag mỹ ãjag tóg vĕnh jykre jagy ěn fi sór mũ, ti tỹ ěg mỹ han jagy ja ra. Ěg jóg'jóg ag mỹ tóg han jagy ja nĩ, kỹ tóg ag mỹ ag tỹ ki króm tũ nĩnh ha mẽ tóg tĩ, ěg mỹ ke gé. Hã ra ãjag tóg ag mỹ fi sór mũ,” he tóg.

11 “Ke tũg nĩ. Jesus tỹ ěg jagãgtãn kỹ tóg ěg kren han mũ, ěg tỹ ti vĩ kri fi kỹ. Kỹ ěg tóg ag ri ke tã vĩ nỹtĩ,” he tóg, Pedro ti.

12 Kỹ vĕnh kar ag tóg ěmĕ kỹ nỹtĩ nĩ. Kỹ ag tóg Barnabé tỹ ag mỹ nén tó mũ mẽg mũ, Paulo tỹ ag mỹ nén kãmén ti ke gé. Ag tỹ ěg tỹ nén han vĕnh hyn han mũ tó ag tóg mũ gé. Ag tỹ Topē jykre ki fóg ag mỹ nén hyn han mũ tó ag tóg mũ gé sir.

13 Ag tỹ tó kãn kỹ Tiago tóg sir ag mỹ: “ha mẽ, inh kanhkã’,” he mũ.

14 “Simão vĩ ěg mỹ tó ja nĩ, Topē tỹ nén han ve ti, Simão tỹ fóg ag mỹ Topē vĩ tó ve ti. Kỹ ag tóg tỹ Topē tũ nỹtĩ sir, fóg tỹ ti vĩ mẽg mũ ag. Jesus mré ke vĩ tỹ ag nỹtĩ, ag tỹ ti ki ge kỹ nỹtĩn kỹ.

15 Hã ra tóg vãsỹ rán kỹ nĩ. Topē vĩ tó tĩ tóg tag rán ja nĩgtĩ, ha mẽ:

16 “kãtĩg jé sóg ke mũ, he tóg, Topē ti. Davi krĕm Israel ag tóg e pĕ ja nỹtĩ ja nĩgtĩ. Hã ra Davi jykre tóg tũ' he mũ. Kỹ tóg ĩn vag ri ke nĩ sir. ĩn tãg han jé sóg ke mũ, hã vĩ: Davi krĕ'krĕ ũ vĩ tỹ pã'i nĩnh mãn mũ, he mũ. Isỹ han ken hã vĕ.

17 Ti tỹ sóg ũn mág pĕ han ke mũ, povo kar kãmĩ ke ag tỹ inh ki ge sór jé, fóg kar kãmĩ ke ag tỹ isũ nỹtĩ jé, kanhgág kar kãmĩ ke ag ke gé, isỹ ũn kuprĕg mũ ag, he tóg.

18 Topē tỹ tón hã vĕ. Ũ tỹ vãsỹ tag kãmén mũ tỹ

tón hã vễ,” he tóg, Topẽ vĩ tó tĩ ti. Hã kỹ ẽg tóg tag ki kanhró tãvĩ nỹtĩ,” he tóg, Tiago ti.

19 “Isỹ nén to jykrén hã vễ, ẽg tỹ ag mỹ ẽg jykre jagy ẽn tó tũ nĩn jé, ù tỹ fóg kar kãmĩ Topẽ jykre han sór mũ ag mỹ, kanhgág ag mỹ ke gé,” he tóg.

20 “Ẽg tỹ ag mỹ tónh ke, ha mẽ: vễnh kãgrá to festa ko tũg nĩ, ã prũ tũ fi mré nỹ tũg nĩ, nén ù tỹ vėsóki ter mũ ko tũg nĩ, nén ù kyvẻnh ko tũg nĩ gé,” he tóg, Tiago ti.

21 “Moisės jykre tugtó ag tóg tĩ, ẽg mré Israel ag, cidade kar ki. Vẻnh kán ke kurã ki ag tóg ti tỹ rán mũ to ke tĩ. Vãsỹ ag tóg ke ja nỹtĩ, kỹ ag tóg ùri ke tãvĩ tĩ gé,” he tóg. “Hã kỹ ù tỹ han sór mũ tóg han tĩ, Moisės jykre ti,” he tóg, Tiago ti.

Apóstolo ag tỹ carta rán mũ

22 Kỹ Jesus tỹ ùn vin mũ ag tóg to jykrén mũ, kófa ag ke gé, Jesus ki ge mũ ag kar ke gé, ù tỹ Topẽ vĩ mẽ jé vẻnh mản tĩ ag. Kỹ ag tóg ù ag kuprẻg mũ, ag tỹ Antioquia ra mũ jé, Paulo mré, Barnabé mré. Ag tỹ ùn kuprẻg mũ ag hã vễ, hã vỹ: Judas, he mũ, ti jiji ù hã vỹ: Barsabás, he mũ. Silas kuprẻg ag tóg mũ gé. Ẽn ag tóg tỹ Jesus mré ke ag pã'i nỹtĩ.

23 Ag mỹ ag tóg vẻnh rán nĩm mũ gé. Ag tỹ rán hã vễ, ha mẽ:

“Jesus tỹ ùn vin mũ ag tỹ rán hã vễ, kófa ag tỹ rán ke gé, Jesus mré ke ag. Ẽg tỹ cidade tỹ Antioquia tá ke ag mỹ rán hã vễ, fóg tỹ Jesus mré ke ag mỹ, ga tỹ Síria tá ke ag mỹ, ga tỹ Cilícia tá ke ag mỹ ke gé. Ậjag mỹ há?

24 Ēg kã ũ ag tỹ ājag tá junjun mẽ ěg tóg. Ājag krĩn ũ han ag tóg mũ, kỹ ājag krĩ tóg kufy' he mũ. Hã ra ěg tóg ag mỹ: ha vẽnĥ jykre tag tó, he ja tũ nĩgtĩ.

25 Kỹ ěg tóg vẽnĥ mãn, ěg tỹ to jykrén jé. Kỹ ěg kar tóg to jykrén kỹ tag ag kuprẽg, ěg tỹ ājag to ag jẽgnẽ jé, ag tỹ Barnabé mré mũ jé, Paulo mré. Ag to ěg há tãvĩ nỹtĩ, Barnabé to, Paulo to ke gé.

26 Ag hã ne tóg fe tũmẽ nỹtĩgtĩ', fe tar kamẽ ag nỹtĩgtĩ'. Kỹ ag tóg ěg Senhor tỹ Jesus Cristo vĩ tó mũgtĩ, ũ tỹ hẽn ri ke tỹ ag tén sór mũ hã ra.

27 Ēg tỹ ag to há nỹtĩn kỹ ěg tóg Judas jẽnẽg mũ, Silas ke gé, ag tỹ ājag mỹ ěg tỹ rán mũ tag ti kãmén jé.

28 Topẽ kuprĩg vỹ ěg mỹ tó, kỹ tóg ěg mỹ há tĩ gé, ěg tỹ ājag mỹ vẽnĥ jykre jagy ěn fig tũ nĩn jé. Tag hã han jé ājag tóg ke mũ, ha mẽ:

29 vẽnĥ kãggrá to festa ko tũg nĩ, nén ũ kyvẽnĥ ko tũg nĩ gé. Nén ũ tỹ vẽnóg ki ter mũ ěn ko tũg nĩ gé. Ājag prũ tũ fag mré nỹ tũg nĩ gé. Ājag tỹ tag ki króm kỹ tóg há tĩ. Jatun mỹ nỹtĩmnĩ." Vẽnhrán hã vẽn.

30 Kỹ ag tóg ag mỹ: "ha mũ jẽg ge," he mũ. Kỹ ag tóg mũ kỹ Antioquia tá junjun mũ. Tá ag tóg vẽnĥ kar jé prěr mũ. Jesus ki ge mũ kar jé ag tóg prěr mũ sir, ag tỹ to vẽnĥ mãn jé. Kỹ ag tóg ag mỹ vẽnĥ rán ěn nĩm mũ.

31 Kỹ ag tóg to ke mũ, vẽnĥ rán to. Kỹ tóg ag mỹ há tĩ, ag tỹ vẽnĥ jyvẽn rá ěn ven kỹ. Kỹ ag krĩ tóg kãnhvy' he mũ sir.

32 Kỹ Judas vỹ Silas mré vẽnĥ kar jyvẽn mũ gé. Topẽ vĩ tó tĩ ag vẽn. Hã kỹ ag tóg ag jyvẽn tỹ hẽn ri ke han mũ. Ag fe tỹ ag tóg tar' he mũ.

³³ Tá ag tóg semana tỹ hěn ri ke han mũ. Kỹ Jesus mré ke ag tóg ag mỹ: “ha jatun mỹ mũ jěg,” he mũ, ag tỹ Jerusalém ra vỹnvỹn ke jé, ũ tỹ ãjag jěgněg mũ ěn to.

³⁴ Hã ra tóg Silas mỹ há nĩ, kỹ tóg tá nĩ nĩ sir, tĩ tũ tóg nĩ sir.

³⁵ Kỹ Paulo tóg Barnabé mré Antioquia tá nĩ nĩ. Topě vỹ tỹ ag tóg ag kanhrãn mũ, kãmén kỹ. Hã ra ũ tỹ hěn ri ke ag tóg ag ri kén Topě vỹ tó mũ gé.

Paulo tỹ ã pir mỹ tĩg, Barnabé tỹ ã pir mỹ tĩg

³⁶ Si há tũ ra Paulo tóg Barnabé mỹ: “mũ nỹ, ěg tỹ ěmã ěn kar mũ mũ mãn jé, ěg tỹ Jesus vỹ tó ja tá,” he mũ. “Isỹ Jesus mré ke ag venh há tóg tĩ. Ag mỹ hěn ri ke mũn mũ há han mũ vỹ? he sóg tĩ,” he tóg, Paulo ti, Barnabé mỹ.

³⁷ Kỹ Barnabé tóg João Marcos pére tĩg sór mũ.

³⁸ Hã ra Paulo mỹ tóg kórég nĩ, Marcos tỹ ag ré kỹ tĩg ja nĩn kỹ, ga tỹ Panfília tá. “Ũ tỹ ěg mré Topě rãnrãj han ja tũ ěn pére sóg tĩg mãn ke tũ nĩ ha,” he tóg, Paulo ti.

³⁹ Hã to ag tóg jagně to jũgjũ mũ. Kỹ ag tóg vėnh kãpugpóv kỹ mũ mũ. Kỹ Barnabé tóg Marcos mré goj vãso tỹ Chipre ra tĩ mũ, canoa mág kãmĩ.

⁴⁰ Jó Paulo tóg Silas kuprěg mũ, ti tỹ ti mré tĩg jé. Kỹ tóg tĩ mũ sir. Jesus mré ke ag tóg Paulo to Topě mré vỹ mũ, ti tỹ ti jy nĩgãn jé.

⁴¹ Kỹ ag tóg ga tỹ Síria mũ pa mũ, ga tỹ Cilícia mũ ke gé. Jesus ki ge mũ kar jyvėn tóg mũ, ã tĩg kỹ, Paulo ti.

16

Timóteo tỹ Paulo mré tĩg

¹ Kŷ Paulo ag tóg cidade tŷ Derbe tá junjun mŷ, cidade tŷ Listra tá ke gé. Kŷ tá ŷ tóg nŷ nŷ, Jesus mré tŷ ŷ, ti jyjy hã vŷ: Timóteo, he mŷ. Ti mŷnh fi ne tóg tŷ Israel nŷ', hã ra fi tóg Jesus ki rã ja nŷgtŷ. Ti panh tóg tŷ fóg tŷ Grego nŷ, Timóteo panh ti.

² Ti to ag tóg vŷ há han mŷ, Jesus mré ka ag, Listra tá ke ag, Icônio tá ke ag ke gé, Timóteo to.

³ Kŷ Paulo tóg ti pére tŷg sór mŷ, kŷ tóg ti gré junun fár kym mŷ, Israel ag tigrŷn. Věnh kar tóg ti panh tŷ tŷ fóg tŷ Grego nŷ ki kanhró nŷtŷ, hã kŷ tóg ti fár kym ja tŷ nŷ. Hã ra ag tŷ ra mŷnh ke tá ag tóg e nŷtŷ, Israel ag, hã kŷ Paulo tóg ti fár kym mŷ sir.

⁴ Kŷ ag tóg cidade ěn mŷ mŷ mŷ. Kŷ ag tóg ag mŷ Jesus tŷ ŷn vin mŷ ag tŷ rá kãmén mŷ sir, kófa ag tŷ Jerusalém tá nén rán ja ti, Jesus mré ke ag mŷ. Ag tŷ nén ki króm ke hã tŷ ag tóg ag mŷ kãmén mŷ.

⁵ Hã kŷ Jesus ki ge mŷ ag tóg tar nŷtŷ sir, Jesus jykren ki. Věnh măn ag tóg tŷ, ag tŷ Topě vŷ mē jé. E ag tóg nŷgtŷ sir, koměr hã.

Paulo tŷ nén nē vég mŷ

⁶ Kŷ Paulo ag tóg ga tŷ Frígia mŷ pa mŷ, ga tŷ Galácia mŷ ke gé. Kŷ ag tóg ga tŷ Ásia tá Topě vŷ tó sór mŷ, hã ra Topě kuprŷg tóg ag mŷn nenh mŷ.

⁷ Kŷ ag tóg ga tŷ Mísia tá junjun mŷ. Kŷ ag tóg ga tŷ Bitínia ra mŷ sór mŷ, hã ra Topě kuprŷg tóg ag mŷn nenh mŷ gé.

⁸ Kŷ ag tóg Mísia jy mŷ kŷ cidade tŷ Trôade tá junjun mŷ.

⁹ Kŷ kutyg kŷ Paulo tóg nén nē vég mŷ. Ga tŷ Macedônia tá ke vég tóg mŷ, ti vėnhpéti ki. Kŷ tóg ti jo jē nŷ. Kŷ tóg ti mŷ: “Macedônia to kãtŷg, ěg

kanhrān jé,” he mū ti mý, ga tỹ Macedônia tá ke ěn ti. Kỹ Paulo tóg rĩr mū sir.

¹⁰ Paulo tỹ nén nẽ ěn ve kar kỹ ěg tóg vēsýmér Macedônia ra mū sór mū sir. “Jesus hỹn ěg mý: ha mū jěg, hé,” he ěg tóg. “Ag mý inh vĩn tó, he ti hỹn, Jesus ti,” he ěg tóg, Paulo tỹ nén nẽ ěn ve kỹ.

¹¹ Kỹ ěg tóg cidade tỹ Trôade ki pa mū. Vēsýmér ěg tóg goj vāso tỹ Samotrácia ra mū mū. Tỹ vaj kỹ ěg tóg cidade tỹ Neápolis ra mū mū.

¹² Tá pa kỹ ěg tóg cidade tỹ Filipos ra mū mū. Ga tỹ Macedônia ki cidade ve vẽ. Ěg tỹ tá junjun vén jan hã vẽ. Fóg tỹ Romano ag jamã ũ vẽ. Tá ěg tóg kurã e sĩ ki nýtĩ nĩ.

Lídia fi tỹ Jesus ki rã

¹³ Věnh kán ke kurã ki ěg tóg cidade to ró māra mū mū, goj ra. “Tán hỹn Topẽ mré vĩ jafã nĩ,” he ěg tóg. Tá ěg tóg nĩgnĩ mū sir. Ũn tātá fag tóg tá nýtĩ nĩ, kỹ ěg tóg fag mré vĩ mū.

¹⁴ Tá ũ fi tóg nĩ nĩ, fi jiji hã vỹ: Lídia, he mū. Negociar he fi nĩ. Kur kósóg tỹ fi tóg negociar he nĩ. Tỹ fi cidade tỹ Tiatira tá ke nĩ. Topẽ kaměg fi tóg tĩ. Ěn fi vỹ Paulo vĩ měg mū sir. Kỹ Topẽ tóg fi mý krĩ há nĩm mū, kỹ fi tóg Paulo vĩ jěmẽ há han mū.

¹⁵ Kỹ ěg tóg fi kypég mū, fi mré ke kar mré hã. Kỹ fi tóg ěg mý: “isỹ Jesus ki rã kỹ jě ve ājag (mýr),” he mū. “Tĩ tỹ ājag mý gen kỹ inh ĩn ki gemnĩ,” he fi tóg. “Tá inh mré nýtĩmnĩ,” he fi tóg. Vĩ ki fi tóg ěg kutān mū. Kỹ ěg tóg ke mū.

Paulo ag tỹ Filipos tá se kỹ nýtĩ

16 Ēg tỹ kejĕn Topĕ mré vī jafā ra mū mǎn kỹ ũ fi tóg ĕg kato tĕ mū. Ũ camarada fi vē. Hā ra fi tóg jagrĕ kórég nī, kỹ fi jagrĕ tóg vēnh kar mỹ ag tỹ nén venh ke tó tĩ. Fi patrāo ag tóg fi tugnĭn jānkamy mág vég tĩ, fi tỹ jānkamy to vēnh kar mỹ ag tỹ nén venh ke tón kỹ.

17 Ēn fi vỹ Paulo nón tĩ mū, ĕg nón, kỹ fi tóg jamā hár(a) prĕr mū, kỹ fi tóg: “Topĕ pĕ camarada ag vē (mỹr),” he mū. “Vĕnh kar kǎfór camarada ag vē mỹr. Ag hā ne tóg ājag mỹ vēnh vī tó tĩ, ājag tỹ to krenkren jé;” he fi tóg ĕg to.

18 Kurā tỹ hĕn ri ke han fi tóg, vī tỹ ge han kỹ. Kỹ tóg Paulo mỹ tỹ ũ nỹ, kỹ tóg kyrā kỹ fi jagrĕ mỹ: “Jesus Cristo jykre tỹ sóg ā mỹ tó mū, ā tỹ fi tovānh jé,” he mū. Kỹ tóg vēsỹmĕr fi tovānh mū sir, fi jagrĕ kórég ĕn ti.

19 Hā ra fi patrāo ag mỹ tóg tỹ ũ nỹ, ag tỹ fi tugrĭn ganho ve mǎn tũ nĭn kỹ. Kỹ ag tóg Paulo ség mū, Silas ke gé. Pā'i ag mỹ ag tóg ag ven mū, cidade kaju ki.

20 Pā'i ag mỹ ag ven kỹ ag tóg: “Israel tag ag ve ra ha,” he mū. “Vĕnh kar jũgjũ han ag tóg mū nī (mỹr), ĕg jamā tag mĩ,” he ag tóg.

21 “Vĕnh jykre vēnhmỹ tó ag tóg mū (mỹr), ĕg tỹ nén han ke tũ tó ag tóg mū (mỹr). Tỹ ĕg tóg Romano nỹtĩ, kỹ ag jykre tóg ĕg mỹ tỹ ũ nỹ,” he ag tóg.

22 Povo ĕn kar tóg ag to kórég nỹtĩ, kỹ ag tóg ag kato vī mū.

Kỹ pā'i ag tóg polícia ag mỹ: “ag kur nũ ra,” he mū. “Ag mrānmrān ra,” he ag tóg mū gé.

23 Ag mrānmrān tỹ hĕn ri ke han ag tóg mū, ka tĕj tỹ. Kar ag tóg vēse ja kǎki ag vām mū. Vĕse ja ki rĩr

tī mǝ ag tóg: “ag nǝgfénh há han nǝ, ag tǝ kĀpa tǝ nǝ jé,” he mǝ.

²⁴ Ag tǝ ti mǝ tag tó to tóg vĕse ja kĵu tá ag vĀm mǝ, vĕse ja mág ĕn kĵu tá. Ka tǝ tóg ag sigsĕg mǝ sir.

²⁵ Meia noite ki Paulo tóg Silas mré Topĕ mré vĭ mǝ. Ti mǝ ag tóg jĀnjĀn mǝ, Topĕ mǝ. Kǝ vĕse ag kar vǝ jĕmĕg mǝ sir.

²⁶ Kǝ vĀhĀ ga tóg jǝrǝn ke mǝ. Vĕse ja krĕm tóg jǝrǝn ke mǝ. Kǝ vĕsǝmĕr jĀnkĀ kar vǝ nognor kĀn tǝ mǝ, rómrom kĀn tóg mǝ. Kǝ vĕse ag kar ĕn ferro tóg kygvar kĀn mǝ, ag se ja ti.

²⁷ Kǝ tóg vĕse ja ki rǝr tǝ nǝnmĀn mǝ gé. hĀ ra vĕse ja jĀnkĀ kar tóg nognor kǝ nǝtǝ nǝ, rómrom kǝ tóg nǝtǝ nǝ. Kǝ ũ tǝ ag ki rǝr tǝ ĕn tóg Ā kyfé téj, Ā rógro ĕn kunǝnh kǝ tóg vĕnh kusón sór mǝ. “Vĕse kar ag hǝn vĕnh pigju kĀn,” he tóg. HĀ kǝ tóg vĕnh kusón sór mǝ.

²⁸ HĀ ra Paulo tóg jamĀ hár(a): “ker vĕnh vóg kónĀn hĕ,” he mǝ. “Ēg kar vǝ ki nǝtǝ,” he tóg.

²⁹ Kǝ tóg néj gru to vĭ mǝ, ũ tǝ ag ki rǝr tǝ ĕn ti. Kǝ tóg Paulo ag se ja kĀra vĕnhvĀg rĀ mǝ, jǝrǝn ke kǝ. Paulo jo tóg mǝg ke mǝ, Silas jo ke gé, ag tǝ ti mǝ ti kĀfór nǝtǝn kǝ.

³⁰ Ag gé(g) tóg tǝ mǝ, vĕse ja kĀtĀ kĀkutĕ kǝ, kǝ tóg ag mǝ: “inh hǝn hĕ ri kĕnh mǝ vǝ?” he mǝ. “Topĕ vĭ mranh sóg, hĀ ra tóg ti tǝ inh kren han há tǝ,” he tóg, ũ tǝ vĕse ja ki rǝr tǝ ĕn ti.

³¹ Kǝ ag tóg ti mǝ: “Jesus Cristo ki rĀ ge,” he mǝ. “Kǝ Ā tóg kren mǝ, Ā mré ke kar ag mré hĀ,” he ag tóg ti mǝ, Paulo ag.

³² Kǝ ag tóg ti mǝ Jesus vĭ kĀmĕn mǝ, ti mré nǝtǝ ag mǝ ke gé.

33 Kŷ tóg ag ki rĭr mŭ vēsŷmér, kuty ke nŷ ra. Ag tŷ ag mrānmrān ja ěn kupég tóg mŭ ag mŷ. Kŷ ag tóg vēnh kaja jé ti kypég mŭ gé, ti mré nŷtĭ ag mré, ag tŷ Jesus ki ge kŷ.

34 Kŷ tóg ā ĩn ra ag tatĭn tĭ mŭ. Ag jĕn tóg mŭ. Ti fe tóg mrin ke mŭ sir, ti tŷ Jesus ki rā kŷ. Ti mré nŷtĭ ag kar mŷ tóg sér tĭ gé sir, ũ tŷ vēse ja ki rĭr tĭ ěn mré ke fag mŷ.

35 Tŷ vaj kŷ pā'i ag tóg polícia ag jĕgnĕg mŭ, ũ tŷ vēse ja ki rĭr tĭ ěn mŷ. “Ěn ag mŷ: ha mŭ jĕg, hemnĭ,” he ag tóg ti mŷ.

36 Kŷ ũ tŷ vēse ja ki rĭr tĭ ěn tóg Paulo mŷ ke mŭ. “Pā'i ag vŷ inh mŷ vēnh vĭ jĕnĕ, isŷ ājag mŷ: ha mŭ jĕg, he jé. Hā kŷ jatun mŷ mŭ jĕg,” he tóg, Paulo ag mŷ.

37 Kŷ Paulo tóg ti mŷ: “hā ra ag tóg vēnh ó to ĕg mrānmrān ja nĭ,” he mŭ. “Vĕnh kar vŷ ag tŷ ĕg mrānmrān ve kĕn. Hā ra ag tóg ĕg ki jĕmĕ ja tŭ nĭ, ĕg jyvĕn ja tŭ ag nĭ gé. Tŷ ĕg Romano nŷtĭ, hā ra ag tóg vēse ja kĕki ĕg vĕm. Jó ag tóg vēnh kar vatánh tá ĕg mŷ: ha mŭ jĕg, he sór mŭ. Mŭnh ke tŭ ĕg nĭ. Ag hā tóg kĕmŭnh mŭ, pā'i ag. Ĕg tatĭ ag tóg mŭnh mŭ. Kŷ ĕg mŭnh mŭ ha,” he tóg, Paulo ti.

38 Kŷ polícia ag tóg pā'i ag mŷ tag tó mŭ sir, kŷ tóg ag mŷ e tĭ. Ag tŷ Romano ũ vóg kónĕn ke tŭ vē vē, hā kŷ ag fe tóg jŭrŭn ke mŭ, pā'i ag.

39 “Ĕg mŷ vēnh pĕte fón nĭ, ĕg tŷ ājag se ja ti,” he ag tóg mŭ. Kŷ ag tóg ag tatĭ mŭ mŭ. “Ājag tŷ ĕg jamā ki pa kŷ tóg há tĭ,” he ag tóg mŭ sir ag mŷ.

40 Ag tŷ vēse ja ki pa kŷ ag tóg Lídia fĭ ĩn ra mŭ mŭ sir. Jesus mré ke ag vég ag tóg mŭ. Kŷ ag tóg ag jyvĕn mŭ. Kŷ ag tóg cidade ěn ki pa mŭ sir.

17

Cidade tỹ Tessalônica tá

¹ Kỹ ag tóg cidade tỹ Anfípólís mĩ pa mũ, cidade tỹ Apolônica mĩ ke gé. Kỹ ag tóg cidade tỹ Tessalônica tá junjun mũ. Tá Israel tỹ vãnh kanhrăn jafã tóg nĩ.

² Kỹ Paulo tóg ã tỹ nèn han tĩ ên han mũ sir. Israel tỹ vãnh kanhrăn jafã kăra tóg rã mũ. Ag mré tóg vĩ mũ, vãnh kán ke kurã tăgtũ ki. Topê vĩ tó tóg mũ sir ag mỹ, Paulo ti, văsỹ rán kỹ nĩ ên ti.

³ Ag mỹ tóg Cristo kămén mũ, ti jagtar ti, ti ter kar rĩr măn ja ên ti. “Jesus hã vễ, hã vỹ: Cristo, he mũ,” he tóg. “Cristo tóg văsỹ rán kỹ nĩ, ti jagtar ke ti, ti rĩr măn ke ti ke gé, hã vỹ: Jesus, he mũ,” he tóg, Paulo ti.

⁴ Kỹ tóg ù ag mỹ ge nĩ, Israel kămĩ ù ag mỹ. Kỹ ag tóg Paulo mré mũgtĩ, Silas mré ke gé. Kỹ fóg tỹ Grego he mũ tỹ hên ri ke ag tóg to há nỹtĩ gé sir, ù tỹ Topê kamêg mũ ag, ùn tătá há fag ke gé.

⁵ Hã ra Israel ù ag mỹ tóg tỹ ù nỹ. Hã kỹ ag tóg ùn kórég ag mỹ: “kămũ jêg ra,” he mũ, ùn rănhrăj vãnh ag mỹ. Vãnh génh kỹ ag tóg vãnh kar jũgũ han mũ. Kỹ ag tóg Jasão he mũ ên ãn jy nỹtĩ nĩ sir. Paulo ag kanêg ag tóg mũ, ag jăvãnh kỹ, ag tỹ vãnh kar jũgũ ên ag mỹ ag ven jé.

⁶ Hã ra ag tóg ag vég tũ nĩ, Paulo ag. Kỹ ag tóg Jasão pére mũ mũ, Jesus mré ke ù ag mré ke gé. Pã'i ag mỹ ag tóg ag vìn mũ. Kỹ ag tóg jamã hár(a) prêr mũ. “Û tỹ mundo kar ki vãnh kar jũgũ han mũ ag tóg tag ki junjun mũ (mỹr),” he ag tóg mũ.

⁷ “Jasão tóg ag mỹ: kăge jêg ra, hé. Hã ra ag kar tóg pã'i mág tỹ imperador vĩ mranh ja tĩgtĩ. “Vyr mỹ êg pã'i mág nĩ, hã vỹ: Jesus, he mũ,” he ag tóg.

“Kỹ ãg pi(jé) imperador krēm nýtĩgtĩ’,” he ag tóg, Paulo ag,” he ag tóg mũ. Ag tỹ Paulo to ón hã vê, pã'i ag mỹ.

⁸ Kĩ ù tỹ mēg mũ ag vỹ fe ù nýtĩ sir, cidade ěn tá pã'i ù ag, cidade ěn tá ke kar ag ke gé.

⁹ Kĩ pã'i ag tóg Jasão ag mỹ: “ẽg mỹ jãnkamy nĩm ké, ãg tỹ to ve jé, ãjag tỹ imperador kato tẽnh ke tũ ti,” he ag tóg. Ag tỹ ag mỹ nĩm kar kỹ ag tóg: “ha mũ jẽg (ge),” he mũ sir.

Cidade tỹ Beréia tá

¹⁰ Kutỹ ěn kã Jesus mré ke ag tóg Paulo mỹ: “ha tĩg, cidade tỹ Beréia ra,” he mũ. Silas mỹ ag tóg ke mũ gé. Kĩ ag tóg mũ mũ.

Ag tỹ Beréia tá junjun kỹ ag tóg Israel tỹ vẽnħ kanhrãn jafã kãra ge mũ, ag mỹ Topẽ vĩ tó jé.

¹¹ Beréia tá ke ag tóg jykre há nýtĩ. Ag pi(jé) Tessalônica tá ke ag ri ke nýtĩ'. Kĩ ag tóg Paulo ag vĩ kri fig mũ. Ag mỹ tóg há tĩ sir. Kurã kar ki ag tóg Topẽ vĩ ki estudar he mũ, ag tỹ to: “ki hã tóg tó tĩ,” hen kỹ.

¹² Kĩ ù tỹ hẽn ri ke ag tóg Jesus ki ge mũ, fóg tỹ Grego ag mré hã, ùn tãtã há fag mré hã.

¹³ Kĩ Israel ag tóg mēg mũ, cidade tỹ Tessalônica tá. Paulo tỹ Beréia tá Topẽ vĩ tó mũ mēg ag tóg mũ sir. Kĩ ag tóg Beréia tá junjun mũ, ag tỹ tá vẽnħ kar jũgũ han jé.

¹⁴ Kĩ Jesus mré ke ag tóg Paulo mỹ: “ha tĩg, canoa mág kãmĩ,” he mũ. Hã ra Silas vỹ tĩ tũ nĩ, Timóteo ke gé. Beréia tá ag nýtĩ.

¹⁵ Kĩ ù ag tóg Paulo mré mũ mũ. Cidade tỹ Atenas ra ag tóg ti pére mũ mũ. Ag tỹ tá vỹnvỹn kenh ken kỹ Paulo tóg ag mỹ ke mũ, ag tỹ Silas jé

prēr jé, ag tỹ Timóteo jé prēr jé ke gé, ag tỹ vēsỹmér cidade tỹ Atenas kukãm kãmũ jé.

Cidade tỹ Atenas tá

¹⁶ Kỹ Paulo tóg Atenas tá nĩ nĩ, Silas jāvãnh kỹ, Timóteo jāvãnh kỹ ke gé. Hã ra tóg sir krĩ ù nĩ, ti tỹ tá vãnh kãgrá tỹ hẽn ri ke ven kỹ, ti tỹ ag tỹ to jãn jafã ên ven kỹ.

¹⁷ Kỹ tóg Israel tỹ vãnh kanhrãn jafã ki Israel ag mré vĩ mũ, fóg tỹ Israel jykre han mũ ag mré ke gé. Kurã kar ki tóg cidade kaju tá vãnh kar mré vĩ mũ gé sir, ù tỹ tá nỹtĩ ag mré.

¹⁸ Kỹ ù ag tóg ti mré vĩ mũ, ù tỹ Epicuro tỹ nén rán ja to jykrén mũ ag, ù tỹ Estóico he mũ ag tỹ nén rán ja to jykrén mũ ag ke gé. Kỹ ag tóg ti to: “vĩ mã pẽ tóg nĩ, vĩ kamẽ tóg nĩ,” he mũ. “Ti hỹn tóg ne tó?” he ag tóg. Kỹ ù ag tóg ti to: “topẽ ù tugtó ti hỹn, kór há tá topẽ,” he mũ. Hã ra Paulo tóg Jesus tỹ vême sér tó mũ. Jesus rĩr mãn tó tóg mũ, Paulo ti.

¹⁹ Kỹ ag tóg sór tỹ Areópago ra ti pére mũ mũ. Tá pã'i ag tóg ag jyvẽn tĩ, sór tỹ Areópago tá. Kỹ pã'i ag tóg ti mỹ: “ã tỹ vãnh jykre tag tó mũ kãmén há han ra êg mỹ,” he mũ, ti mỹ.

²⁰ “(Ge) mẽ ja tũ êg nỹtĩ, ã tỹ êg mỹ tó mũ tag ti. Kỹ êg mỹ kãmén há han nĩ,” he ag tóg, pã'i ag.

²¹ Hã ra Atenas tá ke ag tóg vãnh vĩ tãg mẽ to há nỹtĩ, cidade ù tá kãmũ kỹ tá nỹtĩ ag ke gé. Ag tỹ vãnh vĩ tãg mẽ kỹ ag fe tóg mrin ke tĩ.

²² Kỹ Paulo tóg sór tỹ Areópago kri jẽ kỹ ag mỹ: “Atenas tá ke',” he mũ. “Topẽ tỹ hẽn ri ke kamẽg ãjag tóg tĩ (mỹr). Tag ve sóg,” he tóg.

²³ “Ãjag jamã mĩ sóg tĩ, kỹ sóg ãjag tỹ topẽ jo ãn kãsir kar vigvé. Kỹ sóg topẽ jo ãn sĩ ù vé, kỹ tóg to

rán kǵ nĩ, hã vỹ: ěg tỹ topě ki kagtĩg jo ĩn, he mũ, ti rá ti. Topě ěn tó sóg tĩ, ãjag tỹ Topě ki kagtĩg ěn. Ājag tỹ ti ki kagtĩg nĩ ra ãjag tóg ti mỹ nén ũ kugprũn tĩ,” he tóg.

²⁴ “Topě ěn vỹ mundo kar han, mĩ mũ kar ke gé. Kanhkā tân vẽ mỹr, kỹ tóg tỹ ga to pã'i nĩ gé. Hã kỹ tóg ěg tỹ ti jo ĩn han krēm nĩ tũ nĩgtĩ (mỹr),” he tóg.

²⁵ “Kỹ ěg tóg ti ki rĩr ke tũ nĩ gé, ti jagtar tũ nĩn kỹ. Vẽnh kar rĩn tóg nĩgtĩ (mỹr), Topě ti, kỹ tóg vẽnħ kar tỹ hãmhãm ke han tĩ. Vẽnħ kar tỹ nén precisar he kar nĩm tóg tĩ (mỹr),” he tóg.

²⁶ “Kỹ tóg vẽnħ kyvẽnħ pir tỹ ěprã ke kar hyn han, nação kar (mỹr), ga kar mĩ mũ mũ ag (mỹr). Tỹ ěg vẽnħ kyvẽnħ pir nỹtĩ. Kỹ tóg ěg mỹ ěg mur kurã nĩm mũ gé, ěg ter kurã ti ke gé. ěg mỹ tóg ěg jamã nĩm mũ gé, Topě ti,” he tóg.

²⁷ “Vẽnħ kar hyn han tóg, Topě ti, ěg tỹ ti to há nĩn jé, ěg tỹ ti ki kanhró nỹtĩ jé. Kór gy tũ ti nĩ, ti pi(jé) kuvar gy nĩ'. Kakó ti nĩ, Topě ti,” he tóg.

²⁸ “Ti tỹ ěg han vẽ mỹr, hã kỹ ěg tóg rĩnrĩr nỹtĩ nĩ, ti tigrĩn. Ti tignĩn ěg tóg mũgtĩ (mỹr), kỹ ěg tóg ti tigrĩn nỹtĩ gé (mỹr), Topě tigrĩn. Hã kỹ ãjag kãmĩ vẽnħrãn tĩ ag tóg tó ja nĩgtĩ gé, kỹ ag tóg: tỹ ěg Topě krẽ nỹtĩ, he ja nĩgtĩ.

²⁹ ěg tỹ tỹ ti krẽ nỹtĩn kỹ ěg tóg ti ki kanhró nỹtĩ gé. Ouro ri ke tũ ti nĩ, Topě ti. Tĩ pi(jé) prata ri ke nĩ'. Tĩ pi(jé) pó ri ke nĩ'. Tĩ pi(jé) tỹ vẽnħ kãggrã nĩ', retrato ke gé, ti sĩnvĩ ra. ěprã ke tỹ nén to jykrén mũ ri ke tũ ti nĩ, ěg tỹ nén han mũ ri ke tũ ti nĩ. Topě vẽ (mỹr), Topě,” he tóg, Paulo ti.

³⁰ “Hã ra Topě tóg ěg to fe mág mũ, ěg tỹ ti ki kagtĩg nỹtĩn kỹ. Hã kỹ tóg vãhã vẽnħ kar mỹ vẽnħ

vī jēnēg mū, ēg tỹ ēg jykre tovānh jé.

³¹ Kurā nīm tóg huri, kỹ tóg kurā ěn ki ěprā ke jykre kar tugnỹm ke mū. Kurā ěn ki tóg vēnh jykre kuryj han ke mū inhhā, Topē ti, ti tỹ ēg jykre tugnỹm ke mūn kỹ. Ũn pir kuprēg tóg, ti tỹ ti jagfy ēg kar jykre tugnỹm jé. ěn tóg ter ja nĩ, hā ra Topē tóg ti ter kỹ ti rĩn mǎn ja nĩ, ēg tỹ ti ki kanhró nỹtĩ jé, ũ tỹ Topē jagfy ēg jykre tugnỹm ke ti,” he tóg, Paulo ti.

³² Ti tỹ ag mỹ ti ter kar rĩr mǎn tón kỹ ũ ag tóg to é he mū. Jó ũ ag tóg: “kurā ũ kā ēg hēn ri ke mūn ā vī mē mǎn sór mū,” he mū.

³³ Hā kỹ Paulo tóg tĩ mū, ag ré kỹ.

³⁴ Kỹ ũ ag tóg ti nón mū mū, kỹ ag tóg Jesus ki ge mū sir. Ag kā ũ vỹ tỹ Dionísio nĩ. Areópago tá ag jyvēn tĩ ag kā ũ vē, Dionísio ti. Kỹ ũ fi tóg Jesus ki rā mū gé. Fi jyjy hā vỹ: Damáris, he mū. Kỹ ũ ag vỹ ti ki ge mū gé sir.

18

Cidade tỹ Corinto tá

¹ Kỹ Paulo tóg cidade tỹ Atenas ki kutē kỹ cidade tỹ Corinto ra tĩ mū.

² Tá Israel ũ tóg nĩ nĩ, ti jiji hā vỹ: Áquila, he mū. Ponto tá ke vē. Ũri tóg ga tỹ Itália tá kātĩg ja nĩ, ā prũ fi mré. Fi jyjy hā vỹ: Priscila, he mū. Pǎ'i mág tỹ imperador tỹ Cláudio he mū tóg Israel kar ag mỹ: “cidade tỹ Roma ki pa jēg,” he ja nĩgtĩ. Hā kỹ fag tóg cidade tỹ Corinto tá junjun ja nĩgtĩ.

³ Kỹ Paulo tóg fag mré nĩ nĩ sir. Fag mré tóg rǎnhrāj mū sir. Hā ra fag tóg kur tỹ ĩn han mũgtĩ,

Paulo kóm. Fag rãnrãj hã vë. Hã kÿ Paulo tóg fag mré rãnrãj mũ sir, ti tÿ fag mré nĩn kÿ.

⁴ Kÿ tóg vënhkán ke kurã kar ki ag mẽ Topẽ vĩ tó mũ, Israel tÿ vënh kanhrãn jafã krêm, Israel ag tÿ ti vĩ kri fi jé, fóg tÿ Grego ag ke gé.

⁵ Kÿ Silas vÿ Macedônia tá kãĩ mũ, Timóteo ke gé. Kÿ Paulo tóg Topẽ vĩ tó tãvĩ nĩnĩ, ãn tÿ kur han mãn tũ tóg nĩ. Israel ag mẽ tóg Jesus kãmén mũ, ti tÿ tÿ Cristo nĩ ti.

⁶ Hã ra ag tóg ti kato vĩ mũ. Kÿ ag tóg Jesus to é he mũ. Kÿ Paulo tóg ã kur rũmrũm mũ, ag mẽ: “vënh hã ki ãjag tóg vãgfor kenh mũ, nũgme ki vár kÿ, inferno ki,” he jé. “Ajag mẽ sóg tó, Jesus ti, hã ra ãjag tóg mẽ jãvãnh nÿtĩ. Kÿ ãjag tÿ vësóg ki vësÿrénh ke vë. ãnh hã tóg fóg ag kar mẽ tónh tĩg ha, kanhgág ag kar mẽ ke gé,” he tóg mũ, Paulo ti.

⁷ Hã kÿ tóg tá kutẽ kÿ fóg ãn kãra rã mũ, ti jiji hã vÿ: Tício Justo, he mũ. Topẽ kamêg ti tĩ. Ti ãn vÿ Israel tÿ vënh kanhrãn jafã rã jẽ gé. Kÿ Paulo tóg ti ãn kãra rã mũ sir.

⁸ Hã ra Israel tÿ vënh kanhrãn jafã to pã'i vÿ Jesus ki rã mũ, ti jyjy hã vÿ: Crispo, he mũ. Tĩ mré ke kar vÿ Jesus ki ge mũ gé, Corinto tá ke tÿ hën ri ke ag ke gé, ag tÿ Paulo vĩ mẽ kÿ. Kÿ ag tóg kygpe kÿ nÿtĩ sir.

⁹ Kejën Paulo tóg kuty kã nén nẽ vég mũ. Topẽ tÿ ti mẽ vënh ven vë, kÿ tóg ti mẽ: “kamêg tũg ra,” he mũ. “ãnh vĩ kãmén ra, ha mẽ kÿ nĩ tũg,” he tóg.

¹⁰ “ã mré sóg nĩnh mũ. Û pi(jé) ã vóg kónãn mũ!” he tóg. “Cidade tag ki ù tÿ hën ri ke ag vÿ tÿ isũ nÿtĩnh mũ,” he tóg, Topẽ ti.

¹¹ Kÿ Paulo tóg prÿg pir kri kysã tÿ 6 ke ki tá nĩ nĩ. Ag mẽ tóg Topẽ vĩ kãmén tĩ nĩ sir, tá.

12 Kejĕn ũ tỹ Gálio he mũ tóg tỹ Romano tỹ governador nĩ, ga tỹ Grécia ki. Kỹ Israel ag kar tóg Paulo kato vāsānsān mũ. Kỹ ag tóg ti kãgmĩ kỹ pã'i mág mỹ ti ven mũ mũ.

13 Kỹ ag tóg governador mỹ: “tag tóg ěg jykre tỹ tũ' he sór mũ',” he mũ. “Vĕnh kar tóg ti ví tugnĩn Topĕ to jãnĵãn tĩ, vĕnh jykre tãg tỹ hã ra,” he ag tóg ti mỹ.

14 Kỹ Paulo tóg vĩ sór mũ, hã ra Gálio tóg Israel ag mỹ: “Israel',” he mũ. “Ti tỹ nĕn ũ kórég han mũ ra sóg ãĵag jagfy vĩ tĩ vĕ, ti tỹ crime han mũ ra, Paulo ti,” he tóg.

15 “Hã ra ãĵag jykre to ãĵag tóg ti to jũ mũ, ãĵag jiji to, ãĵag vĕnh rá to (mỹr). Isũ pijé', ãĵag tũ tag ti'. Āĵag hã ne tag to jykrén ke mũ inhhã'. Inh pi(jé) ãĵag tũ to jykrén sór mũ',” he tóg, Gálio ti, pã'i mág ĕn ti.

16 Kỹ tóg ag mỹ: “ha mũ jĕg,” he mũ sir, vĩ tar han kỹ.

17 Kỹ tá nỹtĩ ag tóg Sóstenes kãgmĩg mũ. Israel tỹ vĕnh kanhrãn jafã to pã'i vĕ. Ti kãgmĩ kỹ ag tóg ti mrãnmrãn mũ, pã'i mág ĕn ĩn tá, hã ra Gálio tóg ki ĕmĕ sór tũ nĩ.

Paulo tỹ Antioquia ra vỹn ke

18 Kỹ Paulo tóg tá nĩ sir, kurã tỹ hĕn ri ke ki. Kỹ tóg kejĕn Jesus mré ke ag mỹ: “isĩg vĕ ha,” he mũ. Kỹ Áquila tóg ti mré tĩ mũ, ti prũ tỹ Priscila fi mré hã. Ag tỹ ga tỹ Síria ra mũnh ke vĕ. Cidade tỹ Cencreia tá ag tóg canoa mág ki ge sór mũ, va mũ jé. To hã tóg vĕnh jãrég mũ, Paulo ti, Topĕ mỹ promessa han kỹ.

19 Kŷ ag kar tóg canoa mág kĀki cidade tŷ Éfeso ra mŷ mŷ. Hā ra Áquila fag vŷ tá nŷtĩ, mŷ mĀn tŷ fag nĩ sir.

Kŷ Paulo tóg Israel tŷ vĕnh kanhrĀn jafā kĀra rā mŷ, Israel ag mré vĩ jé.

20 Ag tŷ ti vĩ mẽ kŷ tá ke ag tóg ti mŷ: “ĕg mré nĩ nĩ,” he mŷ.

Hā ra tóg ag mŷ: “hā ra sóg ver tĩg mŷ ha,” he mŷ.

21 “KĀnhmar sóg vŷn kenh ke mŷ hā ra, Topĕ tŷ inh vŷn kenh ke to há nĩn kŷ,” he tóg. Kŷ tóg cidade tŷ Éfeso tá kutĕ mŷ.

22 Kŷ tóg cidade tŷ Cesaréia tá jun mŷ. Kŷ tóg cidade tŷ Jerusalém ra tĩg kŷ Jesus ki ge mŷ kar vigvég mŷ, ũ tŷ Topĕ vĩ mẽ jé vĕnh mĀn tĩ ag. Kar kŷ tóg cidade tŷ Antioquia ra tĩ mŷ.

23 Tá tóg nĩ sĩ han mŷ. Kar kŷ tóg tá kutĕ kŷ ga tŷ Galácia mĩ kutĕ mŷ, ga tŷ Frígia mĩ ke gé. Jesus mré mŷ ag jyvĕn tóg mŷ sir, ag tŷ tar nŷtĩ jé.

Apolo tŷ Topĕ vĩ tó

24 Kejĕn Israel ũ tóg cidade tŷ Éfeso tá jun mŷ, ti jiji hā vŷ: Apolo, he mŷ. Cidade tŷ Alexandria tá tóg mur ja nĩ. Vĩ há ti nĩ. Topĕ vĩ tó tóg tĩ gé, vĀsŷ rán kŷ nĩ ĕn to tóg tar nĩ.

25 Ĕn tóg Jesus japry ki kanhró nĩ, Jesus jamĭn ki. Mŷmĕg vĀnh nĩn kŷ tóg Jesus vĩ tó tĩ mŷ, ti tŷ to krónh ke vĀnh nĩn kŷ. Hā ra tóg João tŷ ag kygpég mŷ ĕn hā ki kanhró nĩ. Ĕg tŷ Jesus jyjy tó kŷ kygpe kŷ nĩ tag ki kagtĩg tóg nĩ ver.

26 Ĕn tóg Israel tŷ vĕnh kanhrĀn jafā krĕm ag kanhrĀn mŷ sir, ti tŷ mŷmĕg vĀnh nĩn kŷ. Áquila fag tŷ ti vĩ mẽg kŷ fag tóg ti mŷ: “ĕg venh kĀtĩg nĩ,”

he mǔ. Kǔ fag tóg ti mǔ Topě japry kāmén kǎn mǔ, Topě jamǎn ti.

²⁷ Kar tóg ga tǔ Grécia ra tǔg sór mǔ, Apolo ti. Kǔ Jesus mré ke ag tóg ti mǔ: “há ti nǔ, ha tǔg ge,” he mǔ. Kǔ ag tóg Jesus mré mǔ ag mǔ vĕnh rá jĕnĕg mǔ, ag tǔ ti mǔ: “kǎrǎ ra,” hen jé. Tá jun kǔ tóg Jesus ki ge kǔ nǔtǐ ag jyvĕn mǔ, kǔ ag tóg ti tǔ ag jyvĕn to tar han kǔ nǔtǐ nǐ sir, Topě tǔ ũn jagǎgtǎn mǔ ag.

²⁸ Israel ag mré tóg vǐ tǐ, Apolo ti, vĕnh kar jo. Ag mǔ tóg Topě vǐ tó tǐ, vǎsǔ rán kǔ nǐ ĕn ti. Kǔ tóg ag mǔ Cristo kāmén mǔ sir. “Cristo vǔ tǔ Jesus nǐ,” he tóg mǔ ag mǔ, Apolo ti, ag mǔ Topě vǐ rá kāmén kǔ.

19

Paulo tǔ cidade tǔ Ēfeso tá nǐ

¹ Kǔ Apolo tóg cidade tǔ Corinto tá nǐ nǐ sir. Hǎ ra Paulo tóg cidade tǔ Ēfeso tá jun mǔ. Ga ĕn mǐ tóg tǔg ja nǔgtǐ, pǎnónh kri kyjer ĕn mǐ. Kǔ tóg Ēfeso tá jun mǔ sir.

² Tá ũ ag tóg Jesus ki ge ja nǔgtǐ. Kǔ Paulo tóg ag mǔ: “ǎjag mǔ Topě kuprǐg tǔ jagrĕ nǔtǐ, ǎjag tǔ Jesus ki gen kǎ?” he mǔ. Kǔ ag tóg ti mǔ: “kǔ ne nĕ ge, Topě kuprǐg ti?” he mǔ, Paulo mǔ.

³ Kǔ Paulo tóg: “ǎjag tǔ kygpe kǔ ǎjag hĕ ri ké?” he mǔ. Kǔ ag tóg: “Joǎo tǔ ag kygpe ri ke ti nǐ, ĕg kygpe ti,” he mǔ.

⁴ Kǔ Paulo tóg: “Joǎo tóg ag kygpe ja nǔgtǐ, ag tǔ ǎjag jykre tovǎnh sór nǔtǐn kǔ,” he mǔ. “Kǔ tóg vĕnh kar mǔ kāmén ja nǐ gé, ag tǔ ũ tǔ ti nón kǎtǐ ĕn ki ge jé, hǎ vǔ: Jesus, he mǔ,” he tóg, Paulo ti.

⁵ Ag tǔ tag mĕ kǔ ag tóg ti mǔ: “Jesus jiji tó kǔ ĕg kygpe ge,” he mǔ.

⁶ Kŷ Paulo tóg ã nĭgé tŷ ag mĕg mŷ, kŷ Topĕ kuprĭg tóg ag ki rã mŷ sir. Vĕnh vĭ ũ han ag tóg mŷ sir. Kŷ ag tóg Topĕ vĭ tó mŷ gé.

⁷ Ũ tŷ 12 ag hŷn, vĕnh vĭ ũ han mŷ ĕn ag.

⁸ Kŷ Paulo tóg Israel tŷ vĕnh kanhrãn jafã kãra rã mŷ. Ti tŷ mŷmĕg vãnh nĭn kŷ tóg Topĕ tŷ tŷ ĕg pã'i nĭ kãmén mŷ. Kysã tãgtŷ ki tóg ag mŷ kãmén mŷ, ag tŷ hĕn ri ke mŷn ti vĭ kri fi jé.

⁹ Hã ra ũ ag tóg ti vĭ to fe ũ nŷtĭ sir, ag tŷ kri fi jãvãnh nŷtĭn kŷ. Kŷ ag tóg to é hen kŷ ag tóg to vĭ kónãn mŷ, vĕnh kar jo. Kŷ Paulo tóg ag mré vĭ mãn tŷ nĭ sir. Jesus mré mŷ ag mŷ tóg: “vyr mŷ ĕg nŷtĭ,” he mŷ. Kŷ tóg escola krĕm ag kanhrãn mŷ sir, kurã kar ki. Escola to professor ĕn jiji hã vŷ: Tirano, he mŷ.

¹⁰ Prŷg régre ki tóg tá nĭ nĭ, gen kŷ, Paulo ti. Hã kŷ ga tŷ Ásia tá ke ag kar vŷ Jesus vĭ mĕg mŷgtĭ, Israel ag kar, fóg tŷ Grego he mŷ ag kar ke gé.

¹¹ Kŷ Topĕ tóg Paulo mŷ vĕnh jykre nĭm mŷ gé, kŷ tóg ĕg tŷ nĕn han vãnh tŷ hĕn ri ke hyn han mŷ.

¹² Kejĕn ag tóg Paulo kur tŷ ũn kagyga ag mĕgmĕg mŷ, ag tŷ há' he jé. Paulo tŷ kur mĕ kar kŷ ag tóg tŷ ũn kagyga ag mĕgmĕg mŷ. Kŷ ag tóg hághá' he mŷ. Vĕnh jagrĕ kórég ag vŷ gen kŷ pa mŷ gé, ũn kaga ag tŷ ti kur mĕ kŷ.

Kujá ag

¹³ Kŷ Israel ag kujá ag vŷ tá nŷtĭ gé. Kujá ĕn ag tóg ĕmã kar kri rŷm ke tĭ. Kejĕn ag tóg ãjag tŷ vĕnh jagrĕ kórég ven kŷ ag tóg Jesus jyjy tó tĭ. Őn kŷ ag tóg tó tĭ. Kŷ ag tóg ũ mŷ: “Jesus jykre tŷ sóg ã kutĕm ke mŷ, Paulo tŷ ũn kãmén tĭ ĕn jykre tŷ,” he mŷ, ũn

jagrē kórég mǎ. Hã ra ag tǎ ón kǎ Jesus jiji tó vĕ. Ti mré ke pijé'.

14 Ũ tǎ ge tó mǎ ag vǎ tǎ Israel ag nǎtǎ. Topĕ tǎ ki rǎ tǎ to pã'i mág krĕ ag vĕ, kǎ ti jiji hã vǎ: Ceva, he mǎ, ag panh jyjy ti. Ũ tǎ 7 ke ag vĕ, ti krĕ ěn ag.

15 Ag tǎ ũn jagrē kórég mǎ Jesus jiji tó kǎ vĕnh jagrē kórég ěn tóg ag mǎ: “Jesus ki kanhró sóg nǎ, Paulo mĕ inh huri ke gé, hã ra ãjag tóg tǎ ũ nǎtǎ?” he mǎ ag mǎ, kujá ag mǎ.

16 Kǎ ũn jagrē kórég ěn tóg ag to hũm he mǎ. Ag kygrĕg tóg mǎ, hã ra ag tóg ti tǎ hĕ ri ke tǎ nǎ. Kǎ ag tóg kator kǎ rinfĭg mǎ sir, kygvĕnh kǎ.

17 Kǎ Éfeso tá ke ag kar tóg mĕg mǎ, Israel kar, fóg tǎ Grego ag kar ke gé. Kǎ ag tóg mǎmĕgmĕg mǎ sir. Kǎ Jesus Cristo jiji tóg ag mǎ tar nǎ, ag mǎ tóg nĕn kar kãfór nǎ, Jesus Cristo jyjy ti.

18 Kǎ Jesus ki ge kǎ nǎtǎ ag tóg ãjag jykre kórég tugtó mǎ sir, jagnĕ mǎ.

19 Ũ ag tóg curandeiro tǎ han ja nǎgtǎ, kujá tǎ ke gé. Kǎ ag tóg ãjag vĕnh rán gé kã mǎ mǎ, curandeiro tǎ vĕnh rán ěn ti. Kǎ ag tóg kuprũn kãn mǎ sir, vĕnh kar rĩnve. Ag tǎ ti kaja nĩkrĕn kǎ tóg kaja e ja nǎ, jãnkamy tǎ 50 mil hǎn.

20 Hã kǎ Topĕ vĩ tóg sir vĕnh kar kri rũm ke mǎ. Kǎ ũ tǎ hĕn ri ke ag tóg kri fĭg mǎ sir.

Éfeso tá vĕnh génh

21 Kar kǎ Paulo tóg to jykrĕn mǎ. Ga tǎ Macedônia mĩ tóg kutĕ sór mǎ, ga tǎ Grécia mĩ, Jerusalém ra tǎg jé. “Isǎ Jerusalém ra tǎg kar kǎ sóg cidade tǎ Roma ra tǎg sór mǎ gé,” he tóg, Paulo ti.

22 Kǵ tóg ga tǵ Macedônia ra ũn régre ag jěgněg mǹ, ti mré rǎnrǎj mǹ ag, hǎ vǵ: Timóteo mré Erasto, he mǹ. Ti hǎ tóg hǎ ra ga tǵ Ásia tá nǐ nǐ ver, Paulo ti.

23 Kejěn věnh génh tóg kutě mǹ, Jesus japry tugrǐn, ti jamǐn tugnǐn.

24 Ũ tóg Éfeso tá nǐ nǐ, ũ tǵ prata tǵ ĩn sǐ kǎggrá han mǹ ti, ũ tǵ topě tǵ Diana he mǹ fi jo ĩn sǐ ěn kǎggrá han mǹ ti, retrato ěn. Ũ tǵ han mǹ jiji hǎ vǵ: Demétrio, he mǹ. Ti camarada tǵ hěn ri ke ag tóg věnh rǎnrǎj ěn ki nén há végtǐ. Ag ganho vě.

25 Kǵ tóg ǎ camarada ag jé prěr kǎn mǹ, Demétrio ti. Ũ tǵ ǎ ri kén rǎnrǎj mǹ ag jé prěr tóg mǹ gé. Ag věnh mǎn kǵ tóg ag mǵ: “ha vé,” he mǹ. “Věnh rǎnrǎj tag ki ěg tóg nén ũ há végtǐ, ěg ganho ti. Tag ki ěg há nǵtǐ,” he tóg.

26 “Hǎ ra Paulo tag tóg cidade tag ki tóg ũ tǵ hěn ri ke krǐn mǹ sir, ga tǵ Ásia mǐ ke gé. Ag mǵ tóg: “věnh nǐgé tǵ han ja pi(jé) tǵ Topě nǐ,” he tǐ. Kǵ ag tóg ti vǐ kri fig mǹ sir. Tag végtǐ ěg mǹ (mǵr),” he tóg.

27 “Kǵ ěg tǵ nén tag tóg tǹ' he sór mǹ sir ti tugrǐn, ěg ganho ti. Hǎ ra Diana fi jo ĩn tóg tǵ nén ũ tǹ nǐ ke gé, ti sǐnvǐ nǐ ra. Kǵ fi tóg tǵ nén ũ tǹ nǐ gé sir, fi tǵ tǵ ũn mág nǐ ra. Ásia kar mǐ ag tóg fi to jǎnjǎn tǐ, ga kar mǐ ke gé. Hǎ ra tóg fi tǵ tǹg' henh ha, Paulo ti, ti tǵ: “věnh kǎggrá pi(jé) tǵ Topě nǐ, hen kǵ,” he tóg, Demétrio ti, ũ tǵ fi jo ĩn sǐ han mǹ ěn ti.

28 Ag tǵ tag mě kǵ ag fe tóg gǵm ke mǹ sir. Kǵ ag tóg jamǎ hár(a) prěr kǵ: “!..topě tǵ Diana fi vǵ kǎfór ne..! !..Tǵ fi Éfeso ag tǹ ne..!” he mǹ sir, prěrprěr kǵ.

29 Kǵ cidade ẽn ki ag vẽn h gẻnh vẻ sir, kǵ vẻnh kar tóg ỉn mág ẽn ra pẻtẻ mủ, ỉn kri ỉn tủ ẽn ra. Gaio he mủ ti pẻre ag tóg mủ mủ, ti kǵgmỉ kǵ, Aristarco ke gẻ. Macedônia tá ke ag vẻ. Ẽn ag tóg Paulo mrẻ kǵmủ ja nỉgtỉ. Ẽn ag kugmỉg ag tóg mủ, ag tỷ ỉn mág ẽn ra ag tatỉ mủ jẻ.

30 Kǵ Paulo tóg ra tỉg sỏr mủ, ag mrẻ vỉ jẻ, hǵ ra ủ tỷ Jesus ki ge kǵ nỷtỉ ag tóg ti mỷ: “tỉ tủg ra,” he mủ.

31 Kǵ ga tỷ Ásia tá pǵ'i ag tóg ti mỷ vẻnh vỉ jẻnẻg mủ gẻ, ti tỷ ỉn mág ẽn ra tỉ tủ nỉ jẻ. Ti to ag tóg há nỷtỉ, pǵ'i ag.

32 Ỉn mág tá ag tóg vẻnh mǵn kǵ nỷtỉ nỉ, ủ tỷ hẻn ri ke ag. Kǵ ủ ag tóg nẻn ủ tỏ tỉ, prẻnprẻr kỷ, jỏ ủ ag tóg nẻn ủ tỏ tỉ, prẻnprẻr kỷ. Kỷ vẻnh kar tóg vỉ vỉ he kǵn mủ sir. Vẻnh mǵn kỷ ag nỷtỉ, hǵ ra ag tóg: “ẻg tỷ hẻ ri ke jẻ vẻnh mǵn nẻ hỷn'?” he mủ.

33 Kỷ Israel ag tóg vẻnh kar mỷ ủ ven mủ gẻ, Alexandre he mủ ẽn. Kỷ Alexandre tóg ả nỉgẻ tỷ ge mủ, ag tỷ katy' he jẻ. Kỷ tóg ag mỷ kǵmẻn sỏr mủ.

34 Kỷ ag tóg vẻg mủ sir, ti tỷ tỷ Israel nỉ ti, Alexandre ti. Hǵ ra ag tóg tỷ fỏg nỷtỉ, tá vẻnh mǵn kỷ nỷtỉ ag. Kỷ ag tóg Israel ag to jủgủ nỷtỉ nỉ. Ag tỷ ti tỷ tỷ Israel nỉ ẽn ven kỷ vẻnh kar tóg prẻr pir han mủ, hǵ vỷ: “!..Éfeso tá ke fi tỷ vẻnh kar kǵfỏr ne..! !..Diana he mủ fi vỷ vẻnh kar kǵfỏr ne..!” he mủ, prẻnprẻr kỷ. Hora rẻgre han ag tóg mủ sir, ge nỷtỉ ki.

35 Governo mỷ rǵn tỉ ẽn tóg hǵ ra ag fe tỷ há' he mủ. Kar kỷ tóg ag mỷ: “Éfeso tá ke',” he mủ. “Vẻnh kar vỷ Diana fi ki kanhrỏ nỷtỉ,” he tóg. “Éfeso tá ẻg tóg fi ki rỉr mủ. Fi kǵggrǵ nẻji tóg kanhkǵ tá kǵkutẻ ja nỉ. Vẻnh kar tóg tag ki kanhrỏ nỷtỉ,” he tóg.

³⁶ “Ū tóg tag kato vī tū nīgtī (mỹr),” he tóg. “Hã kỹ jatu ké. Krĩ rỹg tũg ra,” he tóg.

³⁷ “Tag ag tatĩ ãjag tóg kãmũ ja nīgtī, hã ra ag tóg topẽ fi jo ĩn tá nén ù péju ja tū nīgtī. Ęg topẽ fi to ag tóg vī kónãn tū nīgtī (mỹr),” he tóg.

³⁸ “Demétrio mỹ ag kato vī sór ke mũ’?” he tóg. “Vẽnh kãggrá han mũ ag mỹ ti mré ag vī kafãn sór mũ’?” he tóg. “Kỹ kófa ag mỹ tómnĩ ge, vẽn jyvẽn ke kurã ěn kã. Ag kato vĩmnĩ ge,” he tóg.

³⁹ “Ãjag tỹ hã ra nén ù tó sór kỹ ãjag tóg ěg tū ki kanhró nỹtĩ. Kurã nĩm jé ěg tóg ke mũ, kỹ ěg vẽn mãn kỹ venh mũ ha,” he tóg.

⁴⁰ “Hã ra ěg tỹ ón kỹ vẽn génh kỹ ù ag hỹn ěg to: pã'i mág tỹ imperador kato ag tẽ sór mũ, he mũ. Nén ù tū to ãjag tóg vẽn mãn mũ (mỹr),” he tóg. “Ū tỹ ěg mỹ: ne nẽ? he mũ ra ěg tỹ ne tónh ke tóg tū tĩ,” he tóg, governo mỹ rán tĩ ti.

⁴¹ Kar kỹ tóg ag mỹ: “ha mũ jęg,” he mũ. Kỹ ag tóg mũ mũ sir.

20

Paulo tỹ ga tỹ Macedônia mĩ tỹg

¹ Vẽn kar tỹ jatu ke mãn kỹ Paulo tóg Jesus ki ge kỹ nỹtĩ ag jé prẽr mũ. Ag jyvẽn tóg mũ, kỹ tóg ag mỹ: “sỹ tĩ ma,” he mũ. Kỹ tóg ga tỹ Macedônia ra tĩ mũ.

² Kỹ tóg ga ěn mĩ tĩ mũ, kỹ tóg fĩn kutẽ mũ. Jesus ki ge kỹ nỹtĩ kar ag jyvẽn mág tóg mũ. Kỹ tóg tĩg mãn kỹ ga tỹ Grécia tá jun mũ.

³ Tá tóg kysã tãgtũ tũg mũ. Kỹ tóg ga tỹ Síria ra vỹn ke sór mũ, canoa mág kãmĩ. Hã ra Israel ag tóg

tá ti vóg kónān sór mǔ. Kǔ tóg to jykrén kǔ ga tǔ Macedônia mǔ kutē mǔ, ga tǔ Síria ra vǔn ken jé.

⁴ Ti mré ag tóg mǔ mǔ, hā vǔ: Sópatro, he mǔ, Pirro kósin tag ti, Beréia tá ke tag ti. Kǔ Tessalônica tá Artistarco tóg ti mré tǔ mǔ, Segundo ke gé. Derbe tá Gaio tóg ti mré tǔ mǔ, Timóteo ke gé. Ásia tá Tíquico tóg ti mré tǔ mǔ, Trófimo ke gé.

⁵ Ēn ag kar vǔ ěg jo mǔ mǔ, cidade tǔ Trôade ra. Tá ag tóg ěg jāvānh mǔ sir.

⁶ Kǔ ěg tóg cidade tǔ Filipos tá pa mǔ, festa tǔ pāo jēgja tǔ ke kurā kar kǔ. Kǔ ěg tóg kurā tǔ 5 (ke) tǔg kǔ Trôade tá junjun mǔ ag tá, ěg jo mǔ ag tá. Tá ěg tóg kurā tǔ 7 (ke) tǔg mǔ sir.

Cidade tǔ Trôade tá

⁷ Semana tǔ kurā ve ki ěg tóg vēnh mǎn mǔ sir, Domingo kā, Jesus jamī kó jé. Kǔ Paulo tóg tǔ vaj kǔ tǔg sór mǔ, hā kǔ tóg ag mré vēmén mág mǔ. Kǔ ěg tóg meia noite pétēm mǔ, vēmén nǔtǔn ki.

⁸ Īn to jāpry jāfā tá ěg nǔtǔ, kǔ néj gru tǔ hēn ri ke tá grud kǔ nǔtǔ nǔ.

⁹ Kǔ kyrū tóg tá nǔ nǔ, ti jyjy hā vǔ: Êutico, he mǔ. Jānkā ror kā tóg nǔ nǔ, janela kā. Hā ra tóg nǔr mǔ sir. Nǔr sér han tóg mǔ sir. Jó Paulo tóg vēmén jē nǔ. Kǔ tóg ā nǔr kǔ jānkā ror ki kutē mǔ. Janela tāgtǔ tá nǔ kǔ tóg ěprā kutē mǔ. Kǔ tóg ter ja nǔ sir, ag tǔ re kǔ, ti ve jé.

¹⁰ Kǔ Paulo tóg tere mǔ gé sir. Ti kri tóg pānh ke mǔ. Kǔ tóg ti kāgǔg mǔ, ā nǔgnó tǔ. Kǔ tóg ag mǔ: “fe kaj tǔg ra,” he mǔ. “Ti kuprǔg vǔ ti kākā nǔ nǔ,” he tóg.

11 Kĩ tóg tãpɾy mũ, Paulo ti. Jesus jamĩ kãnhkrég tóg mũ sir, kũ tóg ko mũ gé. Ag mĩ tóg vēmén mág han mǎn mũ gé, kũ tóg tỹ vaj mũ. Vaj kũ tóg tĩ mũ, cidade ên ki kutê kũ, Paulo ti.

12 Hã ra ag tóg kyrũ ên pére kãmũ mũ. Rĩr tóg nĩ nĩ, kũ ag krĩ tóg há' he mũ sir.

Cidade tỹ Mileto ra

13 Kũ êg tóg ti jo canoa mág kãra ge mũ, Paulo jo. Kũ êg tóg cidade tỹ Assôs ra mũ mũ. Tá Paulo tóg êg mré canoa kãra rã sór mũ gé, ti tỹ êg mré tĩg jé. “Iso ra mũ jêg, inh hã vỹ inh pên kã ra tĩ mũ,” he ja tóg nĩgtĩ, Paulo ti.

14 Êg tỹ cidade tỹ Assôs tá pa kũ tóg êg mré tĩ mũ gé, Paulo ti, canoa mág kãmĩ. Kũ êg tóg cidade tỹ Mitilene tá junjun mũ.

15 Tá pa kũ êg tóg tỹ vaj kũ goj vãso tỹ Quios kakãm krỹg mũ. Tỹ vaj kũ êg tóg goj vãso tỹ Samos to hã nũgnũr mũ, kũ êg tóg tỹ vaj kũ cidade tỹ Mileto tá junjun mũ sir.

16 Paulo tóg: “Éfeso ra êg mũnh ke tũ nĩ,” he ja nĩgtĩ. “Êg tỹ Jerusalém kukãm mũnh ke vê, hã kũ êg tóg Ásia ki nỹtĩnh ke tũ nĩ. Festa tỹ Pentecoste ki tóg sỹ Jerusalém tá nĩnh há tĩ,” he ja tóg nĩgtĩ, Paulo ti.

Paulo tỹ Jesus mré ke ag mré vĩ

17 Mileto tá nĩ kũ tóg Éfeso ra vênh vĩ jênêg mũ, Paulo ti, kófa ag mĩ, Jesus ki ge kũ nỹtĩ to pã'i ag mĩ, ag kãmũ jé.

18 Ag tỹ tá junjun kũ tóg ag mỹ: “inh ve ja ãjag tóg (mỹr),” he mũ. “Inh kãtĩg ven kã ãjag tóg inh vé, isỹ ga tỹ Ásia tá jun vén kã,” he tóg.

19 “Ēg Senhor tỹ Jesus tỹ inh mỹ nén nĩm ja han isóg tĩ. Věnh kǎfór han tũ sóg tĩ. Kejěn sóg fỹ tĩ gé, sỹ věnh jykre pāno ven kỹ. Israel ag tóg iso jũgiũ tĩ gé, kỹ sóg vēsỹrénh tĩ gé,” he tóg.

20 “Nén há kar tó sóg tĩ ājag mỹ. Inh pi(jé) ājag mỹ tó tũ nĩgtĩ', sỹ nén ki kanhrān mũ ti'. Ēg věnh mǎn ki sóg tó ja nĩgtĩ, ājag ĩn krēm ke gé,” he tóg.

21 “Israel ag mỹ sóg tó ja nĩgtĩ, inh mré ke ag mỹ, fóg tỹ Grego ag mỹ ke gé, ag tỹ ājag jykre tovānh jé, Topě jykre han jé, Jesus Cristo ki rā jé, ěg Senhor ki. Tag tó ja sóg nĩgtĩ,” he tóg, Paulo ti.

22 “Ha vé, Jerusalém ra sóg tĩ mũ, Topě kuprĩg tỹ inh mỹ: ha tĩg, hen kỹ. Isỹ tá nén venh ke ki kagtĩg sóg nĩ ver,” he tóg.

23 “Hǎ ra Topě kuprĩg tóg inh mỹ tag tó tĩ, ha mẽ: “ã se jé ag tóg ke mũ, ã vóg kónān jé ag tóg ke mũ,” he tóg tĩ. Isỹ ěmā ũ ki rā tóg inh mỹ inh vēsỹrénh ke tó tĩ, Topě kuprĩg ti,” he tóg.

24 “Hǎ ra tóg inh mỹ tỹ nén ũ tũ nĩ. Ag tỹ isén ke mũ ra tóg inh mỹ tỹ nén ũ tũ nĩ gé. Sỹ inh rǎnhrāj kǎn há tóg tĩ, Jesus Cristo tỹ inh mỹ věnh rǎnhrāj nĩm ja ěn ti, hǎ vỹ: sỹ věnh kar mỹ Jesus to vĩ sér ěn tó jé, he mũ, sỹ Topě tỹ ěg jagěgtǎn mũ ti tó jé, he mũ,” he tóg.

25 “Ha vé, inh ve mǎn ke tũ ājag tóg nĩ ha, ki kanhró sóg nĩ. Ũ tỹ hěn ri ke ag mỹ sóg Topě tỹ tỹ ěg pǎ'i nĩ tó ja nĩgtĩ, isỹ ag venh tĩg kỹ. Hǎ ra ag kar ěn tóg inh ve mǎn ke tũ nĩ ha,” he tóg.

26 “Hǎ kỹ sóg ājag mỹ tó mũ. Ũ tỹ Jesus ki rā tũ nĩn kỹ tóg iso: inh mỹ tóg tó ja tũ nĩ, henh ke tũ nĩ,” he tóg.

27 “Ājag mǝ sóg tó kǎn, Topě jykre kar tó sóg ājag mǝ. Inh pi(jé) ājag mǝ nén ũ tó tǔg ja nǝ,” he tóg.

28 “Věnh ki rǝrnǝ, vēso jykrén kǝ. Kǝ Jesus ki ge mǝ kar ag ki rǝrnǝ gé. Topě kuprǝg vǝ ājag tǝ ag to pǎ'i hyn han, kǝ ag ki rǝ há han nǝ. Ā kyvěnh tǝ tóg ag kygǝm mǝ mǝr, Jesus ti. Ti mǝ ag tóg tǝ ti mǝg ri ke nǝtǝ, kǝ ājag tǝ ti mǝg ěn jěn ke,” he tóg.

29 “Isǝg kǝ ũ ag tóg ājag to junjun ke mǝ, kǝ ag tóg mǝg ri ke nǝtǝ, ti mǝg mǎn sór kǝ, hǎ vǝ: Jesus ki ge kǝ nǝtǝ ag kókén sór mǝ, he mǝ,” he tóg.

30 “Ājag kǎmǝ ũ tóg věnh ó tónh ke mǝ gé, Jesus mré mǝ ag tǝ ag mré mǝ kónǎn han jé,” he tóg.

31 “Kǝ věnh ki rǝr. Iso jykrén. Prǝg tǎgtǝ ki sóg ājag jyvěn, kurǎ ki, kuty ki ke gé. Ājag kar jyvěn sóg (mǝr). Ājag jyvěn kǝ sóg fǝ tǝ gé kejěn,” he tóg.

32 “Hǎ ra sóg Topě mǝ: ag ki rǝr, he mǝ, ājag to. Topě vǝ Ā vǝ tǝ ājag ki rǝr ke mǝ gé, ti tǝ ājag jagǎgtǎn kǝ. Ti hǎ vǝ ti ki rǎ to ājag tar han ke mǝ, Topě ti. Ājag mǝ tóg ěmǎ há tǎvǝ nǝm ke mǝ gé, kar kǝ, ti tǝ kar ag mré hǎ,” he tóg, Paulo ti.

33 “Inh pi(jé) ājag mǝ: inh mǝ jǎnkamy nǝm, inh mǝ kur nǝm, he mǝ,” he tóg.

34 “Isǝ nén ũ génh jé sóg rǎnrǎj ja nǝgtǝ (mǝr), inh nǝgé tǝ. Kǝ inh rǎnrǎj ki inh companheiro ag vǝ ājag tǝ ti vigve ja nǝgtǝ gé inh kóm,” he tóg.

35 “Hǎ ki sóg ājag mǝ Jesus jykre ti ven mǝ. ěg rǎnrǎj ki ěg tǝ ven kǝ ěg tóg ũn krónhkrój ag mǝ nén ũ vin ke mǝ gé, ěg tǝ ti jykre han kǝ. ěg Senhor tǝ Jesus vǝ mǝ sóg ěkrég tǝ. Ti hǎ tóg ěg mǝ tag tó ja nǝgtǝ, kǝ tóg: “ũ tǝ ěg mǝ nén ũ nǝm kǝ tóg pǎgsǝ nǝ,” he ja nǝgtǝ. “Hǎ sǝ tóg nǝ. ěg tǝ ũ mǝ ěg tǝ nǝm hǎ kǝ

tóg há nỹ,” he ja tóg nĩgtĩ, Jesus ti,” he tóg, Paulo ti. Paulo tỹ ag mỹ ken hã vễ.

³⁶ Ti tỹ tó kăn kỹ tóg ã jakrĩ tỹ jẽ mũ, kỹ tóg Topẽ mré vĩ mũ, vễnh kar to.

³⁷ Kỹ ag tóg kygfỹ' he mũ. Paulo nunh jăgmỹ ag tóg ãjag nĩgnó fón mũ, ti ki ag tóg nhun ke mũ.

³⁸ Ag mỹ tóg e tĩ, ti tỹ ag mỹ: “inh ve măn ke tũ ãjag nĩ ha,” hen kỹ. Kỹ ag tóg canoa mág ra ti mré mũ mũ sir.

21

Jerusalém ra

¹ Văhã ěg tóg ag mỹ: “ěg mũ sór vễ,” he mũ. ěg tỹ ag ré kỹ mũ kỹ tóg ag mỹ jagy tĩ. Ge ra ěg tóg tá pa mũ. Kỹ ěg tóg canoa mág kămĩ mũ mũ, goj văso tỹ Cós kukăm, vễsyméri. Tỹ vaj kỹ ěg tóg goj văso tỹ Rodes tá junjun mũ. Kar ěg tóg cidade tỹ Pátara tá junjun mũ sir.

² Tá ěg tóg canoa mág ũ vég mũ gé, ũ tỹ ga tỹ Fenícia ra tĩ mũ ěn. Kỹ ěg tóg kăra ge kỹ kămĩ mũ mũ sir.

³ Goj văso tỹ Chipre vég ěg tóg mũ, ěg jakănh tá. Kỹ ěg tóg ga tỹ Sírĩa kukăm mũ mũ. Cidade tỹ Tiro tá ěg tóg krỹg mũ. Ag tỹ canoa tỹ nén rĩnh tĩ ěn tỹ tá vin han ke vễ, cidade tỹ Tiro tá.

⁴ Tá ěg tóg Jesus mré mũ ag vég mũ. Hã kỹ ěg tóg kură tỹ 7 (ke) ki tá nỹtĩ nĩ. Topẽ kuprĩg tỹ ag krĩn kỹ ag tóg Paulo mỹ ke mũ, ti tỹ Jerusalém ra tĩg tũ nĩ jé, he ag tóg.

⁵ Ge ra ěg tóg kură tỹ 7 (ke) tũg kỹ mũ măn mũ. Hã ra ag tóg ěg mré mũ sĩ han mũ, ãjag prũ fag mré hã ke gé. Cidade tá ag tóg pa mũ ěg mré, kỹ ěg tóg goj fyr tá ěg jakrĩ tỹ nỹtĩn kỹ Topẽ mré vĩ mũ.

6 Kǵ ěg tóg: “ěg mũnh ken vĕ ha,” he mũ. Kǵ ěg tóg canoa kĀra ge mũ. Jó ag tóg Ājag jamā ra vŷnvŷn ke mũ gé.

7 Kǵ ěg tóg cidade tŷ Tiro tá pa kŷ mũ mĀn kŷ cidade tŷ Ptolemaida tá junjun mũ. Jesus mré ke ag vég ěg tóg mũ sir tá. Ag mré ěg tóg kurā pir han mũ.

8 Tŷ vaj kŷ ěg tóg tá pa kŷ cidade tŷ Cesaréia ra mũ mũ, ěg pĕn kĀ. Tá ěg tóg Jesus vĭ tó tĭ ũ ĩn krĕm nŷtĭ mũ, ti jiji hĀ vŷ: Filipe, he mũ. Ũ tŷ 7 (ke) ěn ag kĀ ũ vĕ, ũ tŷ vĕjĕn vĕnh kĀpópĀm mũ ěn ag kĀ ũ vĕ.

9 Ti kósin fag vŷ tŷ 4 (ke) nŷtĭ, ũn mén ja tũ fag. Ěn fag vŷ Topĕ vĭ tó mũgtĭ.

10 Si há tũ tá Judéia tá ke ũ tóg kĀtĭ mũ, ũ tŷ Topĕ vĭ tó tĭ ti, ti jyjy hĀ vŷ: Ágabo, he mũ.

11 Ěn tóg ěg tá jun kŷ Paulo vĕsógfĭn ja tŷ Ā nĭgé sigség mũ, Ā pĕn ke gé. Kŷ tóg: “Topĕ kuprĭg tŷ tón hĀ vĕ, ha mĕ: ũ tŷ vĕsógfĭn ja tag tŷ tũ nĭ ěn vŷ se kŷ jĕnh mũ,” he mũ. “Israel ag vŷ ti senh mũ, kŷ ag tóg fóg ag mŷ ti fĕg mũ, he tóg, Topĕ kuprĭg ti,” he tóg, Ágabo ti.

12 Ěg tŷ tag mĕ kŷ ěg tóg Paulo mŷ: “Jerusalém ra tĭ tũg nĭ,” he mũ. Kŷ tá ke ag tóg ge mũ sir ěg mré.

13 HĀ ra Paulo tóg: “Ājag hĀ ne tóg kygfŷ' he mũ!,” he mũ. “Inh fe kaj han Ājag tóg mũ,” he tóg. “Ag tŷ ise sór nŷtĭn kŷ tóg inh mŷ tŷ nĕn ũ tũ nŷ. Ag tŷ isĕn sór nŷtĭn kŷ tóg inh mŷ tŷ nĕn ũ tũ nŷ gé, ag tŷ Jerusalém tá inh vóg kónĀn sór kŷ, ěg Senhor tŷ Jesus tugnĭn,” he tóg, Paulo ti.

14 Ěg vĭ mĕ jĀvĀnh tóg nĭ. Kŷ ěg tóg vĭ mĀn tũ nĭ sir. “Jesus tŷ nĕn han mũ vŷ tóg há nĭ,” he ěg tóg mũ sir.

15 Kar kǵ ěg tóg nén kar kǎn mǔ. Kǵ ěg tóg Jerusalém ra mǔ mǔ.

16 Cesaréia tá ke ũ ag tóg ěg mré mǔ mǔ gé, Jesus mré ke ũ ag. Ěg mǵ ag tóg ũ ven mǔ, ěg tǵ ti ĩn krēm nǵtǵ jé. Ti jiji hǎ vǵ: Menasom, he mǔ. Goj vǎso tǵ Chipre tá ke vē. Vǎsǵ tóg Jesus ki rǎ ja nǵgtǵ. Ěg tǵ ti ĩn krēm nǵgnǵr ke vē.

Paulo tǵ Tiago mré vēmén

17 Ěg tǵ Jerusalém tá junjun kǵ Jesus mré ke ag fe tóg mǵin ke mǔ sir.

18 Tǵ vaj kǵ Paulo tóg ěg mré Tiago venh tǵ mǔ. Kǵ kófa ag kar tóg tá vēnh mǎn mǔ gé.

19 Ag mǵ tóg: “ǎjag mǵ há?” he mǔ. Kǵ tóg ag mǵ Topě tǵ nén han kar tugtó mǔ. Tugtó kǎn tóg mǔ, Topě tǵ fóg kar krǵn mǔ ti, ti tǵ ag mǵ Topě vǵ tón kǵ.

20 Ag tǵ mē kǵ ag tóg Topě mǵ vǵ há han mǔ. Kǵ ag tóg Paulo mǵ: “régre!” he mǔ. “Israel tǵ hēn ri ke ag vǵ Jesus ki ge kǵ nǵtǵ, ũ tǵ mil tǵ hēn ri ke ag. Ěn kar tóg Moisés tǵ ěg mǵ vēnh jykre nǵm ja han (ka)mē nǵgtǵ,” he ag tóg.

21 “Hǎ ra ũ ag tóg ag mǵ ǎ to ón ja nǵgtǵ. ǎ to ag tóg: “Israel kar krǵn kónǎn tóg tǵ,” he tǵ. “Israel tǵ fóg mǵ mǔ kar krǵn kónǎn tóg tǵ, ag tǵ Moisés tǵ ěg mǵ nén nǵm ja tovǎnh jé,” he ag tóg tǵ ǎ to, ón kǵ. ǎjag krē gré junun fár kym tǵg nǵ, he ǎ nēji tǵ. Moisés tǵ ěg mǵ nén nǵm ja hán mǎn tǵg nǵ, he ǎ nēji tǵ,” he ag tóg, Paulo mǵ.

22 “Kǵ ěg ne han mǔ ha’?” he ag tóg. “Ũ tǵ hēn ri ke ag vǵ vēnh mǎn ke mǔ, ag tǵ ǎ kǎtǵg mēn kǵ,” he ag tóg, Paulo mǵ.

23 “Tag hã han jé ã tóg ke mũ, ha mẽ. Û tỹ 4 (ke) ag vỹ ki nỹtĩ ãg mré, Topẽ mỹ promessa han mũ ag,” he ag tóg.

24 “Ag mỹ: “inh mré nỹtĩmnĩ,” hemnĩ. Ag mré vãnh jãnhkri han nĩ, ãg jykre ki. Ag tỹ vễjãrég mũ kỹ ag jo kajãm nĩ. Hã kỹ vãnh kar tóg ã jykre ki kanhró nỹtĩ sir. Û ẽn ag tỹ ã to ón mũ ve jé ag tóg ke mũ, ã tỹ Moisés tỹ ãg mỹ nén nĩm ja ẽn han kỹ,” he ag tóg mũ, Tiago ag, Paulo mỹ.

25 “Jó ẽg tóg fóg ag tỹ Jesus ki ge mũ ag mỹ vãnh rá jẽnẽ ja nĩgtĩ, kanhgág ag mỹ ke gé. Û tỹ Israel jykre han tũ kar to ẽg tóg jykrén, kỹ ẽg tóg ag mỹ vãnh rá ẽn jẽnẽ ja nĩ. Ag mỹ ẽg tóg: Moisés tỹ ẽg mỹ nén nĩm ja ẽn han ke tũ ãjag nĩ, he ja nĩgtĩ. ãjag tỹ nén han ken hã vễ, ha mẽ: vãnh kãggrá to festa ko tũg nĩ, retrato to festa ẽn. Nén ù kyvénh ko tũg nĩ gé. Nén tỹ vễsóg ki ter ja ẽn ko tũg nĩ gé. ãjag prũ tũ fag mré nỹ tũg nĩ gé, he ja ẽg tóg nĩgtĩ ag mỹ, ù tỹ Israel jykre han tũ ag mỹ,” he ag tóg, kófa ag, Paulo mỹ.

26 Kỹ Paulo tóg ù tỹ 4 (ke) ẽn ag mỹ: “inh mré nỹtĩmnĩ,” he mũ, ù tỹ promessa han mũ ag mỹ. Tỹ vaj kỹ tóg ag mré vãnh jãnhkri mũ, Israel ag jykre ki. Kỹ tóg Topẽ jo ãn to tĩg kỹ ù tỹ ki rĩr tĩ ag mỹ: “ag mré sóg vãnh jãnhkri mũ,” he mũ sir. Ag mỹ tóg kurã nĩm, Paulo ti, ag tỹ kurã ẽn kã Topẽ mỹ ti tũ pũn jé, ù tỹ 4 (ke) ag jo, Topẽ tũ ki rĩr tĩ ag. Kurã ẽn to hã ag tóg vãnh jãnhkri tĩ, kurã tỹ 7 (ke) ki, promessa han mũ ag.

Ag tỹ Paulo se

27 Kŷ tóg kurā tŷ 7 (ke) ěn tũ ken kŷ Israel tŷ Ásia tá ke ag tóg Topě jo ĩn tá ti vég mũ sir, Paulo ti. Kŷ ag tóg věnh génh mág han mũ. Ti kāmīg ag tóg mũ, kŷ ag tóg prĕnprĕr mũ sir.

28 “!..Israel kar, kāmũ jĕg ra..!” he ag tóg. “!..Ūn gré ěn ve ra..! !..Ū tŷ věnh kar krĭn kónān mũ ěn ve ra..! !..Ěg povo to tóg vĭ kónān mo..! !..Moisés tŷ ěg mŷ nĕn nĭm ja to..! !..Topě jo ĩn to tóg vĭ kónān mo..! !..Kŷ tóg fóg ag mŷ: Topě jo ĩn kāra ge jĕg, he ja ne..! !..Hā kŷ tóg Topě jo ĩn kavĕnh mo..!” he ag tóg, prĕnprĕr kŷ, Paulo to.

29 Fóg tŷ Trófimo ěn ve ja ag tóg nĭgtĭ, Éfeso tá ke ěn, Paulo mré tĭ mũ ěn. Jerusalém tá ag tóg ti ve ja nĭgtĭ, kŷ ag tóg ón kŷ: “Paulo hŷn ti pére vyr, Topě jo ĩn kāra,” he mũ.

30 Kŷ cidade ěn tá ke kar ag vŷ věnh génh mũ sir, jũgũ kŷ. Ag tŷ Paulo kāgmĭ kŷ ag tóg Topě jo ĩn kátá ti kutĕm mũ. Kŷ ũ tŷ ki rĭr tĭ ag tóg Topě jo ĩn nĭgfĕnh mũ sir.

31 Kŷ ag tóg ti rĕg mũ, Paulo ti.

Hā ra soldado ag pā'i vŷ mĕg mũ, major ti, Jerusalém tá ke kar ag tŷ věnh génh kŷ.

32 Kŷ tóg soldado ag jé prĕr kŷ, ag pā'i jé prĕr kŷ tóg ag to pétĕ mũ. Ag tŷ soldado ag ve kŷ, ag tŷ major ve kŷ ag tóg sir krŷg he mũ, Paulo rĕn kŷ.

33 Hā ra major tóg tá jun mũ. “Ti kāgmĭ ra,” he tóg, soldado ag mŷ. “Ti se ra, ferro régre tŷ,” he tóg. “Ū nĕ?” he tóg. “Ti tŷ ne han nĕ?” he tóg, věnh kar mŷ, major ti.

34 Hā ra ũ ag tóg ti mŷ nĕn ũ tó, kŷ ũ ag tóg ti mŷ nĕn ũ tó, kŷ tóg ki kanhrān tũ nĭ sir. Kŷ tóg soldado ag mŷ: “ěg ĩn kāra ti rāg,” he mũ.

³⁵ Ag tỹ sãnsãn he jafã tá junjun kỹ ag tóg ti vãng mũ. Vẽnh kar tỹ ti to vễnh génh kỹ ag tóg ti vãng mũ, ag tỹ ti kã kyn ke jé.

³⁶ Vễnh kar tóg ag nón mũ kỹ: “!..ti rễ ra..!” he mũ, prẽnprẽr kỹ.

Paulo tỹ ag mỹ vễnh kãmén mũ

³⁷ Ag tỹ ãn kãra ti rãg sór kỹ Paulo tóg major mỹ: “sỹ ã mré vễmén há tóg tĩ,” he mũ. Grego vĩ ki tóg ti mỹ ke mũ. Fóg tỹ major vễ, hã kỹ tóg Grego vĩ hã tó tĩ.

³⁸ Kỹ major tóg ti mỹ: “ã hã ne tóg Grego vĩ tó há nĩ,” he mũ. “Kỹ ã mỹ tỹ Egito tá ke ên tũ nĩ, ù tỹ kurã ên kã vễnh génh han mũ ên’, ù tỹ mil tỹ 4 (ke) mré tĩ mũ ên, governo kato tẽ mũ ên ag mré, êmã tũ mĩ tĩ mũ ên?” he tóg, Paulo mỹ, major ti.

³⁹ Kỹ Paulo tóg ti mỹ: “hỹ,” he mũ. “Tỹ sóg Israel nĩ,” he tóg. “Tỹ sóg cidade tỹ Tarso tá ke nĩ. Ga tỹ Cilícia tá cidade mág kãfór vễ, inh mur ja ti. Isỹ povo tag mré vễnh há tóg tĩ,” he tóg, Paulo ti, major mỹ.

⁴⁰ Kỹ tóg ti mỹ: “ha vĩ ge,” he mũ.

Kỹ Paulo tóg sãnsãn he jafã kri jẽ kỹ ag mỹ ke mũ sir. Hebreu vĩ ki tóg ag mỹ ke mũ, kỹ tóg:

22

¹ “inh kanhkã’,” he mũ. “Ijóg’,” he tóg. “Isỹ ãjag mỹ inh jykre kãmén ke vễ, ki êmẽ,” he tóg ag mỹ.

² Kỹ ag tóg ti tỹ Hebreu vĩ ki ag mỹ vĩ mẽg mũ sir, kỹ ag tóg katy’ he mũ sir.

³ Kỹ tóg ag mỹ: “tỹ sóg Israel nĩ,” he mũ. “Cidade tỹ Tarso tá inh mur, ga tỹ Cilícia tá. Cidade tag ki sóg hã ra mog mũ, kỹ Gamaliel tóg inh kanhrãn.

Inh mǝ tóg ěg jóg'jóg ag jykre tó kǎn, kǝ sóg to tar ja nǝ. Topě jykre to sóg tar tǎvǝ ja nǝgtǝ, ājag tǝ ũri han mǝ ri kén,” he tóg. “Topě jykre hǝn, he sóg tǝ gé, ěg jykre ěn to, hǝ ra sóg kygně.

⁴ Hǝ kǝ sóg Jesus mré mǝ ag to jǝ tǎvǝ ja nǝgtǝ. Ag kǎgtén sór ja inh nǝgtǝ, ũn tǎtá fag ke gé. Ag sigse ja sóg nǝgtǝ, vĕse ja kǎki sóg ag vǎm ja nǝgtǝ gé.

⁵ Topě tǝ ki rǝr tǝ to pǎ'i mág vǝ ki kanhró nǝ, kófa ag kar ke gé. Ag hǝ tóg inh mǝ permissǎo han ja nǝgtǝ, sǝ cidade tǝ Damasco ra tǝg jé, tá ěg mré ke ag mǝ ven jé. Tá sóg Jesus mré ke ag sigse sór ja nǝ gé, Jerusalém ra ag tatǝ kǎtǝg jé, tag ki ag vóg kónǎn jé,” he tóg, Paulo ti.

*Paulo tǝ ā tǝ Jesus ki rǎ kǎmén
(Hk 9.1-19; 26.12-18)*

⁶ “Isǝg kǝ sóg Damasco tá jun mǝ. Kǝ tóg vǎhǎ vĕnh jĕngrĕ tar tǎvǝ tóg vǎhǎ inh ki kómkóm ke mǝ. Kanhkǎ tá ke vĕ, vĕnh jĕngrĕ tag ti. Rǎ tǝ ěg nǝno kǎ sa ra tóg ke mǝ.

⁷ Kǝ sóg kutĕ mǝ. Kǝ sóg vĕnh vǝ mĕg mǝ, kǝ tóg inh mǝ: “Saulo', Saulo', ā tǝ ne jé isǝ ag vóg kónǎn nĕ?” he mǝ, vĕnh vǝ ti.

⁸ Kǝ sóg ěg Senhor mǝ: “ā tǝ ũ nĕ?” he mǝ. Kǝ tóg inh mǝ: “tǝ sóg Jesus nǝ, Nazaré tá ke ěn,” he mǝ, “ā tǝ ũn vóg kónǎn sór tǝ ěn hǝ vǝ tǝ inh nǝ,” he tóg inh mǝ.

⁹ Inh mré mǝ ag vǝ vĕnh jĕngrĕ ěn vigvég mǝ. Hǝ ra ag tóg ũ tǝ inh mǝ vǝ mǝ mĕg tǝ nǝ.

¹⁰ Kǝ sóg ěg Senhor ti mǝ: “kǝ sǝ hĕ ri kenh ke nĕ?” he mǝ. Kǝ tóg inh mǝ: “jĕg nĕ ra,” he mǝ. “Damasco ki rǎ. Tá ũ tóg ā mǝ tó kǎn mǝ, ā tǝ nĕn han ke ti,” he tóg inh mǝ, vĕnh vǝ ti.

11 Hã ra sóg nén ù vég tũ nĩ, vènh jèngrẽ ên tar tâvĩ nĩn kÿ. Kÿ inh mré mũ ag tóg inh nĩgé kãgmĩ kÿ inh pére mũ mũ. Hã ki êg tóg Damasco tá junjun mũ sir.

12 Kÿ ù tÿ Ananias he mũ ên tóg inh venh kãtĩ mũ. Moisés tÿ êg mÿ vènh jykre nĩm ja ên han kãn tóg nĩgtĩ, Ananias ti. Damasco tá ke kar vÿ ti to vĩ há han mũgtĩ, Israel ên ag kar.

13 Ên tóg inh venh kãtĩ mũ, kÿ tóg iso jun kÿ inh mÿ: “régré’,” he mũ. “Saulo’,” he tóg mũ. “Inh ki êvãnh ra,” he tóg. Kÿ sóg vèsÿmér ti vég mũ sir.

14 Kÿ tóg inh mÿ: “êg jóg’jóg ag tÿ Topê vÿ ã kuprêg, vãsÿ,” he mũ, “ã tÿ ti jykre ki kanhró nĩ jé, ã tÿ ùn kuryj nĩ ên ve jé, Cristo ên. Ti hã tóg ã mré vĩnh mũ,” he tóg inh mÿ, Ananias ti.

15 “Ã tÿ vènh kar mÿ ã tÿ nén vég mũ tónh ke vè, ã tÿ nén mēg mũ ti,” he tóg inh mÿ.

16 “Kÿ êmē kÿ nĩ tũg nĩ. Jêg nē ra, ã tÿ kype kÿ jē jé, Topê tÿ ã tÿ ti vĩ mranh tÿ tũ’ he jé. Ti mré vĩ, ti jiji tó kÿ,” he tóg inh mÿ, Ananias ti,” he tóg, Paulo ti.

Paulo tÿ ã rãnrãj kãmén

17 “Isÿ Jerusalém ra vÿn ke kÿ sóg Topê jo ãn krēm ti mré vĩ mũ. Kÿ sóg nén nē vég mũ.

18 Ti hã vè, êg Senhor hã vè. Kÿ tóg inh mÿ: “kur Jerusalém tá kutē,” he mũ. “Ã vĩ mēnh ke tũ ag nĩ, ã tÿ ag mÿ inh kãmén mũ ra,” he tóg inh mÿ.

19 Kÿ sóg êg Senhor ti mÿ: “hã ra ag tóg isÿ nén han ja ki kanhró nÿtĩ,” he mũ. “Ag sigse han ja isóg tĩgtĩ. Vènh kanhrãn jafã krēm sóg ag mrãnmrãn ja tĩgtĩ gé, ù tÿ ã ki ge kÿ nÿtĩ ag,” he sóg ti mÿ.

20 “Kỹ sóg ag tỹ Estêvão tén kỹ, ag tỹ ù tỹ ã vĩ tó mũ ên tén kỹ sóg tá jẽ ja nĩ gé, kỹ tóg inh mỹ há ja tĩ, ag tỹ ti tén kỹ. Ag kur ki sóg rĩr ja nĩgtĩ gé, ù tỹ Estêvão tén mũ ag kur ki,” he sóg, ěg Senhor mỹ.

21 Hã ra tóg inh mỹ: “vó, ha tĩg,” he mũ. “Kór há ra sóg ã jẽnẽnh mũ, kuvar há ra. Fóg kar to sóg ã jẽnẽnh mũ, kanhgág kar to ke gé,” he tóg inh mỹ,” he tóg, Paulo ti.

22 Hã ra vẽnẽnh kar ên ag tóg ěmẽ kỹ nỹtĩ nĩ. Ag tỹ ti vĩ tag mẽ kỹ ag tóg prẽnprẽr mũ sir. “!..Ti tén ra..!” he ag tóg. “!..Û tỹ ge vĩ kórég ne..!” he ag tóg. “!..Ti rĩr nĩn kỹ tóg ěg mỹ tỹ ù nỹnh mo..!” he ag tóg.

23 Prẽnprẽr ag tóg mũ. Ājag kur vãm ag tóg mũ, ga funfur han ag tóg mũ sir. Ag jũgũ vẽ.

24 Kỹ major vĩ: “ĩn kãra ti rãg,” he mũ. “Nén fár tỹ ti mrãnmrãn, cavalo tỹ mrãn ke jafã ri ke ên tỹ. Hã tỹ ti ki jẽmẽ. Ag tỹ hẽ ri ke jé ã to vĩ kónãn nẽ? hemnĩ ti mỹ,” he tóg, major ti, soldado ag mỹ. Major tóg Paulo tỹ ag mỹ nén tó ja ên mẽ ja tũ nĩ, ti tỹ Hebreu ag vĩ ki kagtĩg nĩn kỹ. Hã kỹ tóg soldado ag mỹ: “ti ki jẽmẽ,” he mũ sir.

25 Kỹ ag tóg ti ség mũ, nén fár tỹ, ag tỹ ti mrãnmrãn jé. Hã ra Paulo tóg capitão mỹ, ù tỹ tá jẽ ên mỹ tóg: “mỹ ã mỹ kuryj, ag tỹ inh mrãnmrãn ke ti?” he mũ. “Tỹ sóg Romano nĩ, hã ra ag tóg nén fár tỹ inh mrãnmrãn sór mũ, ù tỹ inh ki jẽmẽg tũ ra, ag tỹ inh jyvẽn tũ ra,” he tóg, Paulo ti.

26 Kỹ tóg capitão mỹ e tĩ, kỹ tóg major mỹ tónh tĩ mũ. Ti mỹ tóg: “ã tỹ ne han ke nẽ ha?” he mũ. “Romano vẽ mỹr,” he tóg ti mỹ.

27 Kỹ major tóg ti to kãtĩ mũ, kỹ tóg ti mỹ: “kỹ ã mỹ tỹ Romano nĩ?” he mũ. Kỹ Paulo tóg: “hỹ,” he

mũ.

²⁸ Kÿ major tóg ti mÿ: “isÿ tÿ Romano nĩ jé sóg jãnkamy tÿ hẽn ri ke tÿ kajãm,” he mũ ti mÿ. Kÿ Paulo tóg ti mÿ: “inh mur kã sóg ge nĩ hã ra, inh panh ri kén,” he mũ.

²⁹ Kÿ ag tóg ti tovãnh mũ sir, ù tÿ ti mrãnmrãn ke mũ ên ag. Hã ra tóg major mÿ e tĩ, ti tÿ ti se kÿ. Ti tÿ ùn Romano senh ke tũ vễ vễ, hã kÿ tóg ti mÿ e tĩ.

Israel tÿ pã'i ag tÿ Paulo vĩ mễg mũ

³⁰ Tÿ vaj kÿ major tóg Israel ag ki jẽmẽ mãn sór mũ, ag tÿ hẽ ri ke kÿ Paulo to jũ mũ ti. Kÿ tóg ti kavãn mũ. Kÿ tóg Topẽ tũ ki rĩr tĩ to pã'i mág ag jé prěr mũ, vênh jyvẽn tĩ kar ag ke gé. Kÿ tóg Paulo pére tĩ mũ, ag jo ti fễg jé.

23

¹ Kÿ Paulo tóg vênh jyvẽn ti ag vég mũ, kÿ tóg: “inh kanhkã',” he mũ. “Vênh jykre há kar han isóg nĩgtĩ (mÿr), kurã kar ki, ùri ke gé, isÿ Topẽ mĩ êkrén kÿ,” he tóg.

² Kÿ Topẽ tũ ki rĩr tĩ to pã'i mág tóg ke mũ, ù tÿ Ananias he mũ ên vÿ: “ti jẽnky ki tãnh,” he mũ, ti jy nÿtĩ ag mÿ.

³ Kÿ Paulo tóg ti mÿ: “Topẽ vÿ ã tãnh ke mũ,” he mũ. “Jykre régre ã nĩ, kÿ ã tóg tÿ ãn to ró ri ke nĩ. Ęg tÿ tinta kupri tÿ to tĩn kÿ Ęg tóg ti kórég vég tũ nĩgtĩ, tinta krêm ti kórég ti,” he tóg. “Inh jyvẽn sór ã tóg mũ, Topẽ jykre ki, hã ra ã hã tóg Topẽ jykre mranh, ã tÿ ag mÿ: ti tãnh ra, hen kÿ,” he tóg, Paulo ti.

⁴ Kÿ tá nÿtĩ ag tóg ti mÿ: “ã hã tóg Topẽ camarada mÿ vĩ kónãn, Topẽ tũ ki rĩr tĩ to pã'i mág mÿ,” he mũ, Paulo mÿ.

⁵ Kŷ Paulo tóg: “mē’,” he mŷ. “Ti tŷ tŷ pā’i mág nŷn ki sóg kagtŷg ja nŷ, ke tŷ nŷ mŷ ra sóg ti to vŷ kónān ja tŷ nŷ vē,” he tóg. “Topē vŷ ki tag tóg rán kŷ nŷ nŷ, hā vŷ: ā povo tŷ pā’i mág to vŷ kónān tŷg nŷ, he mŷ,” he tóg, Paulo ti.

⁶ Hā ra Paulo tóg ag vég mŷ, vēnh jyvĕn tŷ ag. Ū ag tóg tŷ Saduceu nŷtŷ, kŷ ū ag tóg tŷ Fariseu nŷtŷ. Vyrmy ag jykre nŷtŷ. Kŷ Paulo tóg jamā hár(a) ke kŷ ag mŷ: “inh kanhkā’,” he mŷ. “Tŷ sóg Fariseu nŷ, kŷ inh panh tóg tŷ Fariseu nŷ gé,” he tóg. “Topē vŷ ūn ter mŷ ag rŷnrŷn mǎn ke mŷ. Tag vŷ inh mŷ ki hā ke nŷ, hā kŷ ājag tóg iso jŷgjŷ mŷ,” he tóg, Paulo ti.

⁷ Ti tŷ tag tó kar kŷ vēnh jyvĕn tŷ ag tóg vēnh kǎpugpóv kŷ nŷtŷ. Fariseu ag tóg Saduceu ag mré vŷ jŷgjŷ han mŷ, jagnĕ vŷ kafān kŷ.

⁸ Saduceu ag mŷ tóg tŷ tŷ, Topē tŷ ěg ter mŷ rŷn mǎn mŷ ti. Topē tŷ jĕnĕ jafā tóg ag mŷ tŷ tŷ gé. Kŷ vēnh kuprŷg tóg ag mŷ tŷ tŷ gé. Hā ra Fariseu ag mŷ tóg nŷtŷ, vēnh kuprŷg, Topē tŷ jĕnĕ jafā, ti tŷ ěg rŷn mǎn mŷ ke gé. Hā kŷ ag tóg jagnĕ vŷ kafān mŷ sir.

⁹ Kŷ ag tóg jagnĕ to jŷgjŷ kŷ prĕnprĕr mŷ. Fariseu ag kāmŷ ū ag tóg jĕg nĕ nĕ kŷ, Saduceu vŷ kafān kŷ ag tóg: “nĕn ū kórĕg han tŷ ti nŷ, Paulo ti,” he mŷ. “Hĕn ri ke mŷn ti hŷn nĕn nĕ ve ja nŷ, vēnh kuprŷg hĕn ri ke mŷn, ke tŷ nŷ kŷ Topē tŷ jĕnĕ jafā,” he ag tóg, Fariseu ag, Topē vŷ to professor ag.

¹⁰ Kŷ vēnh génh tóg kutĕ mŷ ve nŷ. Kŷ major tóg Paulo to jykrĕn mŷ. “Ag hŷn gen kŷ ti janjān ke mŷ, ti jónjān kŷ,” he tóg, vēnh génh ven kŷ. Kŷ tóg soldado ag mŷ: “kur mŷ jĕg, ti kǎgmŷ jĕ, ěg ĩn kǎra ti rǎg jĕ,” he mŷ, major ti. Kŷ ag tóg ĩn kǎra ti rǎg mŷ.

¹¹ Tŷ kuty kŷ Jesus tóg Paulo mré vŷ mŷ. “Kamĕg

tũg ra,” he tóg ti mǎ. “Jerusalém tá ã tóg inh vĩ tó há han. Ge jé ã tóg ke mũ, cidade tỹ Roma tá,” he tóg, Paulo mǎ, Jesus ti.

Ag tỹ Paulo tén sór

¹² Tỹ vaj kỹ Israel ag tóg vĕnh mǎn mũ sir. Jagnĕ mré ag tóg jykrén mũ. “Paulo tén jé ĕg tóg ke mũ,” he ag tóg. “Jĕn ke tũ ĕg nĩ, kron ke tũ ĕg nĩ gé, ĕg tỹ Paulo tén ke jo, ke tũ nĩ mũ ra Topĕ jé ĕg vóg kónĕn,” he ag tóg.

¹³ Ũ tỹ 40 (ke) kǎfór vĕ, jagnĕ mré jykrén mũ ag.

¹⁴ Ĕn ag vỹ Topĕ tũ ki rĩr tĩ to pǎ'i mág ag mré vĕnh kǎmũ mũ, kófa ag mré hǎ. “Jagnĕ mré ĕg jykrén,” he ag tóg. “Nĕn ũ kǎmĕnh ke tũ ĕg nĩ, ĕg tỹ Paulo tén ke jo, ke tũ nĩ mũ ra Topĕ jé ĕg vóg kónĕn,” he ag tóg.

¹⁵ “Kỹ major mré vĕnh mũmnĩ. Vĕnh jyvĕn tĩ ag mré mũmnĩ, ãjag tỹ ti mré vĩ jé. Ti mǎ: ĕg tỹ ti tỹ nĕn ũ kórĕg han mũ to jykrén mǎn ke vĕ, hemnĩ, hǎ to ĕg mǎ ti ven mǎn nĩ, hemnĩ ti mǎ. Ti tỹ: hej, hen kỹ ĕg tóg ti tén ke mũ, kỹ tóg ãjag to jun ke tũ nĩ,” he ag tóg, pǎ'i ag mǎ.

¹⁶ Hǎ ra Paulo ve fi kósin tóg ag tỹ han sór mũ ĕn mĕg mũ. Kỹ tóg soldado jo ĩn kǎra rǎ kỹ Paulo mǎ tó mũ.

¹⁷ Kỹ Paulo tóg capitão ũ jé prĕr kỹ ti mǎ: “major mǎ kyrũ tag pére tĩg, ti tỹ ti mǎ nĕn ũ tó jé,” he mũ ti mǎ.

¹⁸ Kỹ tóg ti pére tĩ mũ sir, major to. Kỹ tóg ti mǎ: “ũ se kỹ jé ĕn tóg, Paulo ĕn tóg inh jé prĕr,” he mũ, “kỹ tóg inh mǎ: “kyrũ tag tỹ major mǎ ti pére tĩg,” he mũ. Ti tỹ nĕji ã mré vĩ sór nĕ,” he tóg, capitão ti.

¹⁹ Kỹ major tóg ti nĩgé kǎgmĩ kỹ ti pére tĩ mũ, vĕnh péju kỹ. Kỹ tóg ti mǎ: “ã hĕ ri ké?” he mũ.

20 Kǵ tóg ti mǵ: “Israel ag tóg to jykrén, ag tǵ ã mǵ to vǵ jé, ã tǵ vaj kǵ Paulo jěnh jé, věnh jyvěnh tǵ ag to. Ón kǵ ag tóg ã mǵ: “ti ve mǎn jé ěg tóg ke mǵ, ěg tǵ ti to jykrén mǎn jé,” henh ke mǵ. Hǎ ra ag ón vě,” he tóg, major mǵ.

21 “Ag mǵ: hej, he tǵg nǵ. Ũ tǵ 49 (ke) ag tóg, ti jo vǎjig mǵ. Jagně mré ag jykrén, ag tǵ nén ũ konh ke tǵ nǵ jé, kron ke tǵ nǵ jé, ti tén ken jo. “Ke tǵ nǵ mǵ ra Topě jé ěg vóg kónǎn,” he ag tóg. Ěn ag tóg ã tǵ ag mǵ: hej, henh ke jǎvǎnh mǵ sir,” he tóg, kyrǵ ti, major mǵ.

22 Kǵ major tóg ti mǵ: “ũ mǵ: ti mǵ sóg tó, he tǵg nǵ,” he mǵ. “Ha jatun mǵ tǵg,” he tóg ti mǵ.

Major tǵ Paulo jěnh ke, pǎ'i mág tǵ governador ra

23 Kǵ major tóg capitão régre ag mǵ: “kǎmǵ jěg ra,” he mǵ. Kǵ tóg ag mǵ: “ǎjag tǵ kǎnkǎn ra,” he mǵ. “Cidade tǵ Cesaréia ra ǎjag mǵnh mǵ, kuty tag kǎ 9 horas ki. Kǵ soldado tǵ 200 (ke) ag vǵ mǵnh mǵ, cavalo kri mǵ ag tǵ 70 (ke) ag ke gé, kǵ ũ tǵ 200 (ke) ũ ag vǵ rógro pu gég mǵnh mǵ,” he tóg.

24 “Kǵ cavalo ũ ag vǵ mǵnh ke mǵ gé, Paulo tǵ kri nǵ jé. Governador tǵ Félix to ti pére mǵ jěg, tǵ tǵ jatun mǵ tá jun jé,” he tóg, major ti, capitão ag mǵ.

25 Kǵ tóg pǎ'i mág tǵ Félix mǵ rán mǵ, major ti, kǵ tóg:

26 “Cláudio Lísias tǵ rá vě,” he mǵ. “Isǵ Governador tǵ Félix mǵ rán hǎ vě, ã tǵ inh kǎfór nǵn kǵ. Ā mǵ sóg: ã mǵ há? he mǵ,” he tóg.

27 “Tag vǵ tǵ Israel ag věse jě. Ti tén kren ag tóg. Hǎ ra sóg ti tǵ tǵ Romano nǵ jěmh, kǵ sóg inh soldado ag mré ti kren han.

²⁸ Hã ra sóg ti kato tẽ mũ ag ki jẽmẽ sór mũ. Ag tỹ hẽ ri ke jé ti to jũgũ nẽ'? he sóg. Hã kỹ sóg vẽn jyvẽn tĩ ag mỹ ti ven mũ.

²⁹ Kỹ sóg vég mũ. Ag jykre tugrĩn ag tóg ti to jũgũ mũ. Crime han tũ ti nĩ. Ti tỹ nén ã to ter jé han tũ ti nĩ gé. Kỹ tóg ti tỹ nén ã to se kỹ nỹ jé tóg han tũ nĩ gé.

³⁰ Hã ra sóg nén ã mẽ gé. Ti to ag tóg vājig mũ sir, hã kỹ sóg vėsỹmér ti jẽnẽg mũ ã to. Ti kato vĩ mũ ag mỹ sóg: ti hã mré vĩmnĩ, he mũ gé,” he tóg.

Vẽn rá ki tóg tó ja nĩ, major ti, governador mỹ.

³¹ Kỹ soldado ag tóg han mũ sir, ti tỹ ag mỹ nén tó mũ ti. Paulo pére ag tóg mũ mũ. Kutu tá mũ kỹ ag tóg cidade tỹ Antipátride tá junjun mũ.

³² Tỹ vaj kỹ ag tóg kyrãgrã mũ, ãjag jamã ra, ã tỹ ãjag pẽn kã mũ mũ ag. Cavalu kri mũ ag tóg ti pére mũ mũ inhhã.

³³ Ēn ag vỹ Cesaréia tá junjun mũ. Governador mỹ ag tóg vẽn rá ěn nĩm mũ. Kỹ ag tóg ti mỹ Paulo ven mũ.

³⁴ Kỹ pã'i mág ěn tóg vẽn rá vég mũ, kỹ tóg Paulo mỹ: “tỹ ã ga tỹ hẽ tá ke nĩ, ga tỹ ne tá?” he mũ. Kỹ tóg ti mỹ: “ga tỹ Cilícia tá,” he mũ.

³⁵ Kỹ tóg Paulo mỹ: “ã kato vĩ mũ ag tỹ junjun kỹ sóg ã ki jẽmẽn mũ,” he mũ. Kỹ tóg soldado ag mỹ: “pã'i mág tỹ Herodes tỹ vẽn jyvẽn jafã krẽm ti nĩm,” he mũ, pã'i mág tỹ Félix ti.

24

Ag tỹ Paulo kato vĩ

¹ 5 dias tũg kỹ pã'i tỹ Ananias vỹ tá jun mũ, cidade tỹ Cesaréia tá. Topẽ tũ ki rĩr tĩ to pã'i mág

vē. Kófa ag vỹ junjun mũ gé ti mré. Ủ vỹ vỹ kãfór han tĩ gé, ti jiji hã vỹ: Tértulo, he mũ. Kỹ ag tóg pã'i mág tỹ governador mỹ Paulo tó mũ, ón kỹ ti kato vỹ kỹ.

² Kỹ tóg Paulo jé prēr mũ.

Kỹ Tértulo tóg ti kato vỹ mũ, kỹ tóg: “Félix’,” he mũ. “Há tãvĩ ã tóg jẽ,” he tóg ti mỹ. “Ëg ki ã tóg rĩr há tãvĩ han tĩ, kỹ ãg tóg jatun mỹ nỹtĩ. ã tỹ nén to jykrén mũ kar tóg ãg mỹ há tĩ,” he tóg, Félix mỹ.

³ “Hã kỹ ãg tóg ã to há (pẽ) tãvĩ nỹtĩ. ã to ãg jykrén há han tĩ. Kurã kar ki ãg tóg ã to vỹ há han tĩ,” he tóg.

⁴ “Kỹ ãg tóg ã mré nén ù sĩ (pẽ) to vĩnh kãmũ mũ. Kutar ã nĩ, ãg ki rĩr há han kỹ, hã kỹ ãg tóg ã mỹ vỹ mág han sór tũ nĩ. Ëg to ã há nĩ, hã kỹ ã tóg ãg vỹ mẽ sór mũ,” he tóg.

⁵ “Tag ti vỹ vỹ kónãn tãvĩ han tĩ. Israel kar ag krĩn kónãn tóg tĩ, kỹ ag tóg tĩ tigrĩn vẽn kãpugpóv kỹ nỹtĩ. Ga kar mũ tóg ke tĩ. Kỹ tóg tỹ Nazaré tá ke ãn mré ke ag pã'i mág nĩ gé,” he tóg. Paulo to tóg ke mũ.

⁶ “Kỹ tóg Topẽ jo ãn kãvénh sór mũ gé, hã kỹ ãg tóg ti kãgmĩ. Ëg tỹ ãg jykre ki ti jyvẽn ke vỹ vỹ.

⁷ Hã ra Lísias tóg kãtĩ mũ, major ãn ti. Kỹ tóg ti kãgmĩg mũ. Ëg kuju ki tóg ti tỹ hãn ke mũ, jũ kỹ.

⁸ Kỹ tóg ti kato vỹ mũ ag mỹ ké, ag tỹ ã venh kãmũ jé. ã tỹ vẽn tag ti ki jẽmẽ kỹ ã tóg venh mũ. Ki hã ãg tóg ke tĩ. ã mỹ ti tónh mũ,” he tóg, Tértulo ti. Ti tỹ Paulo to ón hã vỹ.

⁹ Kỹ Israel ag tóg ti mré tó mũ gé, pã'i ãn ag. “Ti tỹ ki hã ke vỹ,” he ag tóg, Tértulo to.

Paulo tỹ vẽn kãmén

10 Kĩ governador tóg Paulo mĩ ã nĩgé tỹ ven mũ, Paulo ví jé. Kĩ Paulo tóg: “prỹg tỹ hẽn ri ke ki ã tóg tỹ pã'i mág nĩ, Israel ag mỹ,” he mũ. “Hã kĩ tóg sỹ ã mỹ inh jykre tón kĩ tóg inh mỹ sér tĩ,” he tóg.

11 “Kurã tỹ 12 pātén tũ tóg nĩ, sỹ Jerusalém tá jun ti. Sỹ tá Topẽ tũ han jé sóg ra tĩg ja nĩgtĩ. Vẽn kar vỹ tá inh ve ja nĩgtĩ. Ag hỹn ã mỹ tónh mũ, ã tỹ ag ki jēmẽn kĩ,” he tóg.

12 “Hã ra sóg jatun mỹ isũ han tĩ ja nĩ. Topẽ jo ĩn krēm sóg ũ ví kafān ja tũ nĩ. Vẽn génh han ja tũ sóg nĩ gé, ěg vẽnh kanhrān jafā krēm. Cidade ki sóg nén ũ kórég han ja tũ nĩ gé,” he tóg.

13 “Ag tỹ inh kato ví mũ pi(jé) tỹ ki hã ke nĩ'. Ā tỹ ve há nĩn kĩ ã tóg ki kanhró nĩnh mũ,” he tóg.

14 “Kỹ sóg ã mỹ ki hã tónh mũ ha,” he tóg. “Inh jóg'jóg ag tỹ Topẽ jykre han tĩ ěn hã han isóg tĩ gé, kĩ sóg vāsỹ nén rán kĩ nĩ ěn kri fig tĩ gé, ũ tỹ Topẽ ví tó tĩ ag tỹ nén rán ja ěn ti, Moisés mré hã. Hã ra sóg vẽnh jykre tãg tag han mũ gé, Topẽ tỹ ũri ěg mỹ nén tó mũ ti. Tag to ag tóg: “vyr mỹ vẽnh jykre vẽ,” he tĩ, pã'i ag.

15 Hã ra sóg ag ri kén Topẽ tỹ nén han ke ěn ve sór mũ. Ti tỹ ěg ter kar kĩ ěg rĩn mǎn ěn ve sór isóg mũ. Ũn jykre kuryj ag rĩn mǎn jé tóg ke mũ, ũn jykre pãno ag ke gé,” he tóg.

16 “Kỹ sóg tĩg há han sór mũ (mỹr), ũ tỹ iso: nén ũ kórég han ti huri, he tũ nĩn jé,” he tóg. “Topẽ rĩnve sóg tĩg há han sór mũ,” he tóg.

17 “Vãhã sóg Jerusalém tá jun mǎn. Prỹg tỹ hẽn ri ke ki sóg tá jun ja tũ nĩ vẽ. Hã ra sóg ra vyr, sỹ inh povo ki ũn jagãgtar fag mỹ nén ũ vin jé, sỹ Topẽ mỹ nén ũ pũn jé gé,” he tóg.

18 “Vēnh jānhkrig ja sóg nī, ěg jykre ki. Kĩ sóg Topē jo ĩn kĀra rĀ ja nī, jatun mĩ, vēnh génh han tú kĩ.

19 HĀ ra Israel ag tĩ Ásia tá ke ag vỹ tá inh ve ja nĩgtĩ gé,” he tóg. “Ěn ag tĩ Ā jo nỹtĩn kĩ, ag tĩ inh kato vĩ kĩ tóg há tĩ vē, ag tĩ iso jykrén mũ ra, ag tĩ iso jũ mũ ra,” he tóg.

20 “HĀ ra ũ tĩ ki nỹtĩ ag tĩ Ā mĩ inh jykre kórég tónh ke vē. Vēnh jyvĕn tĩ ag vỹ inh ki jĕmĕ ja nī, kĩ tag ag vỹ tá nỹtĩ ja nī. HĀ ra ag tóg tá isỹ nĕn ũ vēnhmỹ han ve ja tú nī,” he tóg.

21 “Vēnh vĩ pir tỹ sóg jamĀ hár(a) tó ja nī, isỹ ag rĩnve jĕn kĩ, hĀ vỹ: Topē tỹ ũn ter mũ rĩn mĀn mũ ěn kri sóg fig mũ, hĀ kĩ Ājag tóg ũri iso jũgĩũ mũ, he ja sóg nī ag mỹ,” he tóg, Paulo ti.

22 Kĩ Félix tóg kurĀ ũ kĀ ti ve mĀn sór mũ, pĀ'i mág tỹ governador ěn ti. Jesus japry ki kanhró tóg nī, Jesus jamĩn ki, ti jykre ki, Félix ti. HĀ kĩ tóg: “major tỹ Lísias kĀtĩg kĩ sóg Ājag ki jĕmĕ kĀn mũ,” he mũ.

23 Kĩ tóg capitĀo mỹ: “ti fĕg han ra,” he mũ. “Ti jagĀgtĀn ra hĀ ra,” he tóg. “Ti mré ke ag tỹ ti mỹ nĕn ũ nĩm sór kĩ tóg há nī. Ag mỹ nenh tũg nī,” he tóg, capitĀo mỹ, Félix ti. Ti tỹ Paulo to ken hĀ vē.

Félix tỹ Paulo ki jĕmĕ mĀn

24 Si há tú ra Félix vỹ Paulo vĩ mĕ mĀn sór mũ, ti prũ fi mré. Fi jyjy hĀ vỹ: Drusila, he mũ. Israel fi vē. Kĩ tóg Paulo jé prĕr mũ sir, Félix ti, ti tỹ fag mỹ Jesus Cristo ki rĀ kĀmĕn jé.

25 Kĩ Paulo tóg vēnh jykre kuryj kĀmĕn mũ sir. Vĕso jykrén ke kĀmĕn tóg mũ. Topē tỹ kar kĩ vēnh kar tỹ nĕn han mũ tó tóg mũ. Kĩ Félix tóg Ā kanĕ tỹ jũrũn' ke mũ sir, ti tỹ Ā jykre pĀno mĩ ěkrén kĩ. Kĩ

tóg ti mÿ: “ha ver tÿg,” he mÿ. “Kejÿn sóg ã ki jÿmÿ mǎn mÿ gé, kar kÿ, inh kutar tÿ nÿn kÿ,” he tóg, Félix ti, Paulo mÿ.

²⁶ Hã ra tóg Paulo ki jǎnkamy mǎn sór mÿ gé, ti tÿ ti kavǎn jé, ti tÿ ti kyvǎn jé. Hã jé tóg kǎnhmar ti jé prÿr mǎn', kǎnhmar ti jé prÿr mǎn' he tÿ, ti mré vÿmén jé. Hã ra Paulo tóg ti mÿ ven tÿg.

²⁷ Hã ki prÿg régre tóg tÿg mÿ sir. Kÿ Félix jÿgja kǎ ù tóg jÿ mÿ sir, hã vÿ: Pórcio Festo, he mÿ. Kÿ Félix tóg Israel ag tÿ ã to vÿ há han sór mÿ, ag tÿ ti tÿ jykrén há han jé, ti nón. Hã kÿ tóg Paulo kavǎg tÿ nÿ. Se kÿ tóg jÿ nÿ.

25

Paulo tÿ pǎ'i mág tÿ Imperador ve sór

¹ Hã kÿ Festo vÿ tÿ governador nÿ sir. Ti tÿ 3 (ke) dias ãn kǎ pǎ'i mág nÿn kÿ tóg cidade tÿ Cesaréia tá kutÿ kÿ cidade tÿ Jerusalém ra tÿ mÿ.

² Kÿ Topÿ tÿ ki rÿr tÿ to pǎ'i mág ag vÿ Israel há ag mré vÿ mág han mÿ, Paulo kato. Kÿ ag tóg governador mÿ nén ù to vÿ mÿ.

³ “Á tÿ ãg to há nÿn kÿ vÿnh vÿ jÿnÿmÿnÿ, Paulo tÿ Jerusalém mÿ kǎtÿg jé, ãg mÿ,” he ag tóg ti mÿ. Hã ra ag tóg ti kǎtÿg kÿ ti tén sór mÿ, ãpÿr kri, ãmÿn kri.

⁴ Hã ra Festo tóg ag mÿ: “Cesaréia tá tóg se kÿ jÿ, Paulo ti,” he mÿ. “Jó sóg kǎnhmar ra tÿg mÿ gé,” he tóg.

⁵ “Kÿ ãjag pǎ'i ag vÿ inh mré mÿnh mÿ gé. Tá sóg ãjag mré ti venh mÿ, ti tÿ hÿn ri ke mÿn nén ù kórég han ja ãn ti,” he tóg.

⁶ Kÿ tóg tá nÿ sÿ han mÿ sir, 8 (ke) dias hÿn hÿn ri ke mÿn, ke tÿ nÿ kÿ 10 (ke) dias hÿn. Kÿ tóg Cesaréia

ra vj̄n ke mǎn mǔ. Tj̄ vaj kj̄ tóg ã tj̄ kri nĩn kj̄ ag jyvĕn jafǎ kri nĩ mǔ. Kj̄ tóg soldado mǔ: “Paulo pére kǎtĩ,” he mǔ.

⁷ Ti katĩg kj̄ Israel ag tóg ti jy nỹtĩ, Jerusalém tá kǎmǔ ag. Paulo kato ag tóg vĩ tj̄ hĕn ri ke han mǔ. Ti jykre pǎno tugtó ag tóg mǔ sir, ón kj̄, hǎ ra tóg ag mǔ ki krov tũ nĩ.

⁸ Kj̄ Paulo tóg vĕnh kǎmĕn mǔ sir, kj̄ tóg: “Israel ag jykre mranh ja tũ sóg nĩ,” he mǔ. “Topĕ jo ĩn kavĕnh ja tũ sóg nĩ gé. Kj̄ sóg ĕg kar pǎ'i mág tj̄ Imperador vĩ mranh ja tũ nĩ gé,” he tóg, Paulo ti.

⁹ Hǎ ra Festo tóg Israel ag mǔ nĕn ũ há han sór mǔ. Hǎ kj̄ tóg Paulo mǔ: “mǔ ã tj̄ Jerusalém ra tĩg jé há?” he mǔ. “Sỹ tá ã jykre venh há tóg tĩ, ag tj̄ ã kato vĩ ti,” he tóg, Festo ti.

¹⁰ Hǎ ra tóg Paulo mǔ ag tj̄ tá ti tĕn ha mĕ tĩ, hǎ kj̄ tóg: “ne jé,” he mǔ. “Ĕg pǎ'i mág tj̄ Imperador jĕgja kǎ ã tóg inh ki jĕmĕg mǔ,” he tóg. “Hǎ kj̄ ã tj̄ tag ki inh jykre venh ke vĕ,” he tóg. “Israel ag to sóg jykre pǎno han ja tũ nĩ (mỹr). Kj̄ ã tóg ki kanhró nĩ (mỹr), ha mĕ,” he tóg.

¹¹ “Isỹ crime han ra isỹ to ter ke vĕ vĕ. Kj̄ sóg ne tónh ke tũ nĩ vĕ. Hǎ ra ag tóg ón kj̄ inh kato vĩ mǔ sir. Hǎ kj̄ tóg ã tj̄ ag mǔ inh fĕg kj̄ vĕnhmỹ tĩ. Ā tj̄ ag mǔ nĕn há han sór vĕ (mỹr), hǎ kj̄ ã tóg ag mǔ ke mǔ. Ĕg pǎ'i tj̄ Imperador hǎ tóg ã pin kj̄ inh jykre venh ke mǔ,” he tóg, Paulo ti.

¹² Kj̄ Festo tóg ã mré jykrĕn mǔ ag mré vĩ mǔ, kj̄ tóg Paulo mǔ: “ã tj̄ Imperador ve sór kj̄ ã tóg Imperador venh tĩg mǔ, cidade tj̄ Roma ra,” he mǔ, Paulo mǔ.

Pǎ'i tj̄ Agripa tj̄ Paulo mré vĩ

13 Si há tũ ra Israel ag pã'i mág tỹ Agripa vỹ cidade tỹ Cesaréia tá jun mũ, ti prũ tỹ Berenice fi mré. Fag tỹ Festo to pygsa ke vë.

14 Tá fag tóg kurã pir tũg mũ. Kỹ Festo tóg ti mỹ Paulo kãmén mũ. Kỹ tóg ti mỹ: “Félix vỹ vëse ù kavãn ja tũ nĩ,” he mũ.

15 “Kỹ Topẽ tũ ki rĩr tĩ to pã'i mág ag tóg inh mỹ ti kãmén, Israel ag kófa ag ke gé. Jerusalém tá ag tóg inh mré ti kato vĩ, isỹ ag mỹ: té, ha ti vóg kónãn, he jé,” he tóg.

16 “Kỹ sóg ag mỹ: ãg jykre tóg ge tũ nĩ, he mũ. Ëg pi(jé): ti tén ra, henh mũ', kãnhmar', he sóg. Ti kato vĩ mũ ag tỹ ti kato nỹtĩn kỹ tóg vënh kãmén tĩ, vëse ti. Kar ãg tóg ti vóg kónãn tĩ sir. Romano jykren hã vë, he sóg ag mỹ,” he tóg Festo ti.

17 “Hã kỹ ag tóg tag ki vënh mãn mũ. Kỹ sóg vësỹmér ag vég mũ, tỹ vaj kỹ. Inh nĩg jafã kri nĩ kỹ sóg Paulo jé prër mũ,” he tóg.

18 “Kỹ ag tóg ti kato vĩ mũ. Hã ra ag tóg isỹ nén to jykren mũ tó tũ nĩgtĩ (mỹr), ti jykre kórég ti,” he tóg.

19 “Ag Topẽ jykre tó ag tóg mũ. Ûn ter mũ tó ag tóg mũ, ag tỹ ùn to: Jesus, he mũ ãn ti. Hã ra Paulo tóg ti to: rĩr ti jẽ nĩ, he mũ,” he tóg.

20 “Kỹ sỹ ne to jykren ke tóg tũ tĩ inh mỹ. Kỹ sóg Paulo mỹ: ã mỹ Jerusalém ra tĩg ke tũ nĩ? he mũ. Tá ag tóg ã jyvënh há han mũ sir, he sóg ti mỹ,” he tóg.

21 “Hã ra Paulo tóg ãg pã'i mág tỹ Imperador ve sór mũ, ti tỹ ti jykre ve jé. Hã kỹ sóg soldado ag mỹ: ti fẽg han ra, he mũ. Kejẽn sóg Imperador ra ti jẽnënh mũ, he sóg ag mỹ,” he tóg, Festo ti, pã'i tỹ Agripa mỹ.

22 Kỹ Agripa vỹ Festo mỹ: “sỹ ti vĩ mẽnh hã tóg ti,”

he mũ.

Kỹ Festo tóg: “vaj kỹ ã tóg ti vĩ mẽnh mũ,” he mũ

²³ Tỹ vaj kỹ Agripa vĩ kătĩ mũ, Berenice fi mré. Kur sĭnvĩ rĭnh kỹ fag nỹtĩ, pã'i mág kur ti. Tenente ag mré fag tóg kãmũ mũ, ùn kăfór ag mré ke gé, cidade ẽn tá ke ag. Ĩn mág kăra ag tóg ge mũ. Kỹ Festo tóg Paulo jé prěr mũ sir. Kỹ ag tóg ti pére kãmũ mũ.

²⁴ Kỹ Festo vỹ: “pã'i tỹ Agripa',” he mũ. “Tag ki ke kar',” he tóg. “Tag ti ve ra ha,” he tóg. “Israel kar ag tóg Jerusalém tá inh mré ti to vĩ. Tag ki ag tóg inh mré vĩ mũ gé ti to. Prěrprěr ag tóg, ti ter jé,” he tóg.

²⁵ “Hă ra sóg vég mũ. Nén ù vĕnhmỹ han tũ tóg nĩ, ti tỹ to ter jé. Kỹ tóg pã'i mág tỹ Imperador ve sór mũ, hă kỹ sóg to jykrén mũ. Sỹ ti jĕnh ke vĕ,” he tóg.

²⁶ “Hă ra sóg ti to nén rán ke ki kagtĩg nĩ ver, sỹ Imperador mỹ nén rán jé. Hă kỹ sóg ti jé prěr, ajag tỹ ti ve jé, ã tỹ ti ve jé, pã'i tỹ Agripa',” he tóg. “Ajag tỹ ti ki jĕmĕ kỹ sóg sỹ nén rán ke ki kanhró nĭnh mũ,” he tóg.

²⁷ “Sỹ nén rán tũ ra ti jĕnh kỹ tóg vĕnhmỹ nỹnh mũ, sỹ ag tỹ ti kato nén tó mũ ẽn rán tũ ra,” he tóg, Festo ti.

26

Paulo tỹ vĕnh kămén măn

¹ Kỹ Agripa vĩ Paulo mỹ: “ã tỹ vĕnh kămén kỹ tóg há tĩ,” he mũ. Kỹ Paulo tóg ã nĭgé tỹ krỹg he mũ, kỹ tóg: “pã'i Agripa',” he mũ.

² “Ă hă ne tóg Israel jykre kar ki kanhró nĩ'. Hă kỹ tóg inh mỹ há tĩ, sỹ ùri ã jy vĩ kỹ,” he tóg.

3 “Israel ag tỹ inh kato vỹ mũ to sóg kāmén kãn sór mũ ã mỹ,” he tóg. “Hã kỹ jatun mỹ inh vỹ jēmēmñĩ,” he tóg.

4 “Israel kar vỹ inh ki kanhró nỹtĩ, vāsỹ, isĩ kã, isỹ inh mur ja tá nĩn kã, isỹ kar kỹ Jerusalém tá nĩn kỹ ke gé,” he tóg.

5 “Isĩ kã sóg ěg jykre han kãn mũ, tag ki kanhró ag nỹtĩ, ag tỹ tó sór kỹ,” he tóg. “Tỹ sóg Fariseu nĩ (mỹr), jó Fariseu ag vỹ ěg jykre kar to tar nỹtĩ (mỹr),” he tóg.

6 “Hã ra ag tóg inh kato vỹ mũ. Topě vỹ ěg jóg'jóg ag mỹ: “rĩr mãn jé ãjag tóg ke mũ, ãjag ter kỹ,” he ja nĩgtĩ. Ti vỹ tag kri sóg fig mũ, hã kỹ ag tóg inh kato vỹ mũ,” he tóg.

7 “Povo tỹ 12 (ke) vỹ tỹ ěg nỹtĩ. ěg kar vỹ Topě jykre hyn han tĩ, kuty ki, kurã ki ke gé. ěg tỹ ter kar rĩr mãn jé, hã jé ěg tóg ke tĩ, hã jé ěg tóg Topě jykre han tĩ, pã'i tỹ Agripa',” he tóg. “Sỹ Topě tỹ ěg mỹ tag tó kri fi kỹ Israel ag tóg inh kato vỹ mũ,” he tóg.

8 “Mỹ ãjag mỹ vėnhmỹ, Topě tỹ ũn ter kar rĩn mãn ke ti'?” he tóg. “Vėnhmỹ ke tũg nĩ,” he tóg, Paulo ti.

9 “Hã ra sóg vāsỹ Jesus kato tẽ ja nĩ gé. Nazaré tá ke ěn mré ke ag vóg kónãn jagy han ja sóg nĩ vė, vāsỹ,” he tóg.

10 “Jerusalém tá sóg ke ja nĩgtĩ. Jesus tũ ag sigse ja sóg nĩgtĩ gé. Topě tũ ki rĩr tĩ to pã'i mág ag vỹ inh mỹ tag to permissão han ja nĩgtĩ gé,” he tóg. “Ag tỹ Jesus mré ke ag kãmĩ ũ tén kỹ tóg inh mỹ há ja tĩgtĩ gé,” he tóg.

11 “Ěg vėnh kanhrãn jafã krēm isóg ag vóg kónãn ja nĩgtĩ gé, ag tỹ Jesus ki ge tag tovãnh jé, ag tỹ ti mỹ

vĩ kónān jé. Ag to sóg jũ tãvĩ ja nĩgtĩ gé, inh fe tỹ gỹm ken kỹ. Kỹ sóg cidade ù ra ag nón tĩg ja nĩgtĩ gé, ag vóg kónān jé,” he tóg.

*Paulo tỹ ã tỹ Jesus ki rã kāmén
(Hk 9.1-19; 22.6-16)*

¹² “Hã kỹ sóg cidade tỹ Damasco ra tĩg ja nĩ gé. Topẽ tũ ki rĩr tĩ to pã'i mág ag vỹ inh mỹ permissão han ja nĩgtĩ, inh mỹ: ha tĩg, hen kỹ.

¹³ Ēpry jagma sóg meio dia ki jēngrē tar vé, kanhkā tá. Rã kãfór vĕ, ha mẽ, pã'i,” he tóg. “Jēngrē ěn vỹ inh ki kómkóm ké, inh mré mũ ag ki ke gé.

¹⁴ Kỹ ěg kar vỹ vár mũ, ga kri. Kỹ sóg vĕnh vĩ mẽ. Inh mré tóg vĩ, Hebreu vĩ ki, kỹ tóg inh mỹ: “Saulo', Saulo',” he mũ. “Ã hã ne tóg isũ ag vóg kónān nĩ,” he tóg inh mỹ. “Ã vóg isóg mũ, ka junun kri ferro ěn tỹ, monh vóg jafã ěn tỹ. Kỹ tóg ã tỹ inh kato nig kỹ, ã tỹ ka kato vāsān kỹ tóg kaga mág tĩnh mũ,” he tóg inh mỹ, vĕnh vĩ tĩ,” he tóg, Paulo ti.

¹⁵ “Kỹ sóg ěg Senhor mỹ: “ã tỹ ù nĕ?” he mũ. Kỹ tóg inh mỹ: “tỹ sóg Jesus nĩ,” he mũ. “Ã tỹ ùn vóg kónān sór tĩ ěn vỹ tỹ inh nĩ,” he tóg inh mỹ.

¹⁶ “Jĕg ra, vĕnh rã hã jĕg,” he tóg. “Ã mỹ sóg vĕnh ven, ã tỹ isũ han jé, ã tỹ nĕn vég mũ tag tó jé. Ā mỹ sóg vĕnh ven mǎn ke mũ gé, kejĕn. Tag kar tó jé ã tóg ke mũ,” he tóg inh mỹ.

¹⁷ “Ã povo mỹ sóg ã jĕnĕnh mũ, fóg kar ag mỹ ke gé, kanhgág kar ag mỹ ke gé. Hã ra sóg ã jy nĩgān mũ,” he tóg inh mỹ.

¹⁸ “Ag kanĕ nugnón sór inh mũ (mỹr). Ag tỹ vĕnh jykre pāno han kỹ tóg ag kãki kuty nĩ sir, hã ra sóg ag kãki jēngrē han sór mũ. Satanás krĕm ag nỹtĩ,

Japo krēm. Hã ra sóg ag kygvãn sór mũ, ag tỹ inh jykre han jé. Ag tỹ inh vĩ mranh tỹ sóg vãnh pãte fón sór ke mũ (mỹr), ag tỹ ù tỹ inh ki ge kỹ nýtĩ ag mré kanhkã tá nýtĩnh ken jé, isỹ ùn kuprêg kar ag mré hã,” he tóg inh mỹ, Jesus ti,” he tóg, Paulo ti.

Paulo tỹ ã rãnrãj kãmén

¹⁹ “Kỹ sóg ti vĩ mranh tũ nĩ, pã'i tỹ Agripa',” he tóg. “Kanhkã tá nĩ kỹ tóg inh mré vĩ ja nĩ, Jesus ti, kỹ sóg ti vĩ han.

²⁰ Damasco tá ke ag mỹ sóg tó vén, kar Jerusalém tá ke ag mỹ ke gé, ga tỹ Judéia tá ke ag kar mỹ ke gé. Israel kar ag mỹ sóg tó mũ, kar sóg fóg ag mỹ tó mũ gé sir, kanhgág ag mỹ ke gé. Ag mỹ sóg tó, ag tỹ ãjag jykre tovãnh jé, ag tỹ Topê jykre han jé sir, ag tỹ vãnh jykre kuryj han jé, vãnh kar tỹ ag tỹ ãjag jykre tovãnh ve jé,” he tóg, Paulo ti.

²¹ “Isỹ tag han to Israel ag tóg Topê jo ãn krēm inh kãgmĩ ja nĩgtĩ, isén jé,” he tóg.

²² “Hã ra Topê tóg inh jy nĩgãn mũ. Hã kỹ sóg ùri jẽ mũ. Ti vĩ tó inh mũ (mỹr), ùn mág ag mỹ, ùn kãsir ag mỹ ke gé. Vãsỹ Topê vĩ tó tĩ ag tóg tó ja nĩgtĩ, isỹ nén tó mũ tag, Moisés mré hã,” he tóg.

²³ “Cristo jagtar ke tó ja ag tóg nĩgtĩ. ã ter kar rĩr vén ke ti, ãg jo, he ja ag tóg nĩgtĩ, Cristo to. Kỹ tóg ãg povo mỹ jẽngrêg tĩ ãn ri ke nĩ sir, fóg kar ag mỹ ke gé, kanhgág kar ag mỹ ke gé,” he tóg, Paulo ti.

²⁴ Paulo tỹ gen kỹ tóg Festo mỹ e tĩ sir, Paulo tỹ vãnh kãmén kỹ. Kỹ Festo tóg jamã hár(a): “krĩ tũ ã nĩ, Paulo',” he mũ. “ã tỹ vãnh rá ve mág kỹ tóg ã krĩ tũ (pẽ) tĩ,” he tóg, Festo ti.

25 Hă ra tóg ti mÿ: “inh krĩ vÿ há nĩ, Festo’,” he mũ. “Há tãvĩ ã jẽ nĩ vÿ,” he tóg ti mÿ. “Hă ra sóg ki hă tó mũ (mÿr), to jykrén há han kÿ,” he tóg.

26 “Tag kã nĩ vÿ ki kanhró nĩ, pã'i tÿ Agripa tag ti. Hă kÿ sóg ti ve kÿ mÿ'ãg tũ nĩ. Tó kãn sóg mũ. Mẽ ti huri, ki kanhró tóg nĩ. Vẽnh kar tóg mẽ kãn tĩ ha,” he tóg.

27 “Pã'i tÿ Agripa’,” he tóg. “Ă mÿ Topẽ vĩ tó tĩ ag tÿ nén tó mũ kri fig mũ'?” he tóg. “Kri nĩm ã tóg mũ, ki kanhró sóg nĩ,” he tóg.

28 Kÿ Agripa tóg Paulo mÿ: “vẽme sĩ tÿ ã mÿ isÿ Cristo ki rã han sór mũ'?” he mũ.

29 Kÿ Paulo tóg ti mÿ: “hÿ,” he mũ. “Hă to sóg Topẽ mré vĩ mũ,” he tóg. “Ă tÿ vễme sĩ hă ki Jesus ki rãnh ken kÿ tóg há tĩ vễ, ke tũ nĩ kÿ vễme mág ki. Ă tÿ inh ri kén ke kÿ tóg há tĩ vễ, ã, ã mré inh vĩ mễg mũ ag ke gé. Isÿ se kÿ jẽ tag hă to sóg ã mÿ: inh ri kemnĩ, henh ke tũ nĩ,” he tóg, Paulo ti.

30 Kÿ pã'i tÿ Agripa vÿ jễg nễ mũ sir, governador ke gé, Berenice fi ke gé, ag mré nÿtĩ kar ag ke gé.

31 Kÿ ag tóg kãpa mũ. Kÿ ag tóg jagnễ mré vĩ mũ. “Nén ã kórég han tũ ti nĩ,” he ag tóg. “Véké tóg se kÿ jẽ. Ă tÿ nén han tũ to tóg ter ke tũ nĩ,” he ag tóg.

32 Kÿ Agripa tóg Festo mÿ: “ti tÿ kyvar kÿ jẽ hă vễ vễ, hă ra tóg pã'i mág tÿ Imperador ve sór mũ,” he tóg mũ.

27

Cidade tÿ Roma ra

¹ Hă kÿ Festo tóg kejẽn Paulo mÿ: “ã tÿ ga tÿ Itália ra tĩg ke nễ ha,” he mũ. Kÿ tóg pã'i mÿ ti fễg mũ. Soldado ag capitão vễ, pã'i ẽn ti. Û tÿ Imperador

mré ke ag he mũ ãn capitão vĕ. Ti jiji hã vỹ: Júlio, he mũ. Tĩ mũ ag tóg vĕse ù ag vin mũ gé.

² Kĩ ĕg tóg canoa mág kãra ge mũ sir. Cidade tỹ Adramítio tá ke vĕ, canoa mág ĕn ti. Ag tỹ ga tỹ Ásia fyr to mũ sór vĕ, canoa kãmĩ. Kĩ ĕg tóg goj kãmĩ mũ mũ, tá pa kỹ. Aristarco tóg ĕg mré tĩ mũ, cidade tỹ Tessalônica tá ke ĕn ti, ga tỹ Macedônia tá ke ĕn ti.

³ Tỹ vaj kỹ ĕg tóg cidade tỹ Sidom tá krỹg mũ sir. Kỹ Júlio tóg Paulo mũ vĩ há han mũ. Kỹ tóg ti mũ: “ã mré ke ag venh tĩg, ag tỹ ã ki rĩr jé,” he mũ.

⁴ Tá pa kỹ kãka tóg ĕg kato tĕ mũ. Kỹ ĕg tóg goj vãso tỹ Chipre kakãm mũ mũ, ti tỹ ĕg jakãnh tá nĩn kỹ.

⁵ Kỹ ĕg tóg goj kafã tũ kãmĩ mũ mũ, ga tỹ Cilícias fyr to, ga tỹ Panfília fyr to ke gé. Kỹ ĕg tóg cidade tỹ Mirra tá junjun mũ sir, ga tỹ Lícia tá.

⁶ Tá capitão tóg canoa mág ù vég mũ, cidade tỹ Alexandria tá canoa, ù tỹ ga tỹ Itália ra tĩ mũ ĕn. Kỹ tóg ĕg mũ: “kã ge jĕg,” he mũ, capitão ti.

⁷ Kãmĩ ĕg tóg mũ mũ. Komĕr hã ĕg tóg mũ mũ, kurã tỹ hĕn ri ke ki. Kỹ ĕg tóg vãhã goj vãso tỹ Cnido tá junjun mũ. Hã ra kãka tóg ĕg kato tĕ mũ gé. Kỹ ĕg tóg tá fĩn rãm tũ nĩgtĩ. Kỹ ĕg tóg goj vãso tỹ Creta kakãm mũ mũ, kãka tỹ ĕg tỹ vĩrĩn ke kỹ. Krĩ tỹ Salmona kakãm mũ ĕg tóg mũ, kãka krĕfĩn.

⁸ Kãmĩ tĩg tóg jagy tĩ, Creta fyr to hã tĩg kỹ. Kỹ ĕg tóg vãhã komĕr hã ĕg tóg canoa sag ja há he mũ tá junjun mũ. Cidade ù vỹ tá kakó nĩ, ti jyjy hã vỹ: Laséia, he mũ.

⁹ Hã ra ĕg tóg komĕr hã mũ ja nĩgtĩ, hã kỹ kusa tóg kakó tĩ ha. Kỹ tóg goj kãmĩ tĩg kórĕg nĩ, kóho tigrĩn.

Festa ũ pātén tóg huri, Israel ag vākre jafã ti. Hã ky Paulo tóg ag jyvën ky:

¹⁰ “goj tóg kãmĩ tīg kórég tĩ ha, vỹ,” he mũ. “Kỹ ãg tóg jagãgtar mũ ha. Kỳ tóg inh mỹ canoa tỹ nĩninh mỹ tīg ha mẽ tĩ, kỹ ãjag tũ vỹ vãgfor mũ sir, jó ãg hën ri ke mũn kãgter ke mũ gé,” he tóg, Paulo ti.

¹¹ Hã ra capitão tóg canoa tỹ ũ tũn mũn vĩ mẽg mũ sir. Canoa vóg mũ vĩ mẽg tóg mũ gé, hã ky tóg Paulo vĩ mẽg tũ nĩ sir.

¹² Canoa sag ja ãn tóg há sĩ nĩ, hã ky ag tóg tá kusa fĩn pa vãn nỹtĩ. Hã ky ãn e ag tóg tá pa sór mũ, ag tỹ cidade tỹ Fenice tá junjun jé, tá kusa fĩn pa jé. Goj vãso tỹ Creta tá cidade ũ vỹ, canoa sag ja ũ vỹ, Fenice ti. Tá rã krẽfĩn tá kãka vỹ króg he tũ nĩgtĩ. Hã ky ag tóg ra mũ sór mũ sir.

Kóho mág

¹³ Hã ra kãka sĩ tóg komër hã kraug he mũ sir. Kỳ tóg ag mỹ há tĩ. Hã ky ãg tóg tá pa ky Creta fyr ra mũ mũ sir, Creta fyr kakó ra, goj kãmĩ mũn ky.

¹⁴ Vãhã kóho jũ tóg canoa kato tẽ mũ sir, ti jiji hã vỹ: Nordeste, he mũ. Creta tán kãtĩ mũ.

¹⁵ Hã ra ãg tóg kóho jũ tag kato canoa vóg tỹ hẽ ri ke tũ nĩ, kỹ ãg tóg ti vóg tovãnũ mũ sir. Kỳ kóho tóg canoa va tĩ mũ.

¹⁶ Kỳ ãg tóg goj vãso sĩ to hã mũ mũ, ti jyjy hã vỹ: Cauda, he mũ. Hã ra ãg tóg canoa sĩ nỹgnỹn kãmũ ja nĩ, ti se ky. Cauda tá ãg tóg canoa mág kri ti fi han sór mũ, hã ra ãg tóg to jagãgtar mũ, kóho to.

¹⁷ Vãhã ag tóg ti kãtãnfyn mũ, canoa vóg tĩ ag. Kar ag tóg canoa mág tógfĩn mũ, ti tỹ vãm ke tũ nĩ jé. Hã ra ag tóg rỹnhryj kamẽg mũ, rỹnhryj tỹ Sirte he mũ ãn, ga tỹ Líbia fyr tá. Hã ky ag tóg kur kunũg mũ sir.

Kur ẽn vỹ canoa kri sag tĩ, kãka tỹ ti tĩn jé. Ẽn kunũg ag tóg mũ sir.

¹⁸ Hã ra ẽg tóg kóho jũ to jagãgtar' he mũ, kỹ ag tóg tỹ vaj kỹ canoa tỹ rĩg mũ ẽn kuju vãm mũ sir, goj ki, ti kufy vẽnh kãpãm ag tóg mũ sir.

¹⁹ Tỹ vaj ũn kỹ ẽg tóg jagãgtar tãvĩ nỹtĩ, kỹ ẽg tóg vãvãm kãn mũ sir, canoa kãki nỹtĩ ẽn, ti tralha ti. Ẽg kar tóg ag mré vãvãm mũ sir.

²⁰ Kurã tỹ hẽn ri ke ki ẽg tóg rã vég tũ (pẽ) nĩ, krĩg ke gé. Kóho jũ ẽn tóg ẽg kato tẽ mũ. Kỹ tóg ẽg mỹ ẽg kãgter ha mẽ tĩ. “Ẽg hỹn krenkren ke tũ nĩ ha,” he ẽg tóg.

²¹ Hã ra ẽg tóg jẽg tũ (pẽ) ja nĩ, kurã tỹ hẽn ri ke ki. Kỹ Paulo tóg ag to tĩg kỹ: “ãjag tỹ inh vỹ kri finh ke vẽ vẽ,” he mũ. “Ẽg tỹ Creta tá kãpa tũ nĩ ra ẽg jagẽgtar tũ nĩnh ke vẽ vẽ, kỹ ãjag tỹ nén ù kren tũ nĩnh ke vẽ vẽ,” he tóg.

²² “Hã ra ãjag fe ti tỹ rỹnh kemnĩ. Ẽg kar vỹ krenkren mũ. Canoa hã vỹ tũ' henh mũ!,” he tóg.

²³ “Kuty tag kã Topẽ tỹ jẽnẽ jafã tóg inh mré vỹ mũ. Inh Senhor hã vẽ, ù tỹ ti jẽnẽg mũ ti, hã vỹ: Topẽ, he mũ,” he tóg.

²⁴ “Ti tỹ jẽnẽ jafã tóg inh mỹ: “kamẽg tũg nĩ, Paulo’,” he mũ. “Pã'i mág tỹ Imperador ve jé ã tóg ke mũ, kỹ Topẽ tóg ã mré mũ ag kar vin, ag tỹ ã mré krenkren jé,” he tóg inh mỹ,” he tóg, Paulo ti.

²⁵ “Kỹ ãjag fe ti tỹ há' hemnĩ. Topẽ vỹ kri sóg fig mũ. Ti tỹ inh mỹ tó mũ vỹ ge nĩnh mũ,” he tóg, Paulo ti.

²⁶ “Jó ẽg tỹ canoa tỹ goj vãso to tĩn há tóg tĩ,” he tóg.

²⁷ Semana régre vĕ sir, ěg tỹ goj kafã tũ mĩ mũ kri, kóho tỹ ěg ran tĩ ki. Goj kafã tũ ěn jiji hã vỹ: Mediterrâneo, he mũ. Meio noite ki canoa vóg tĩ ag tóg: “ga hỹn kakó nĩ ha,” he mũ.

²⁸ Kỹ ag tóg goj kãmun mũ sir. Kỹ tóg 36 (ke) metros he mũ. Kãnhmar ag tóg kãmun mãn, kỹ tóg 27 (ke) metros he mũ sir.

²⁹ Kỹ ag tóg pãró kamĕg mũ, ěg tỹ ag mỹ kã ta kenh ha mĕ tĩn kỹ. Kỹ ag tóg canoa nér tá ti se jafã tỹ 4 (ke) vin mũ. Ferro ũ vĕ, ti se jafã ti. Ti tỹ rỹnhřỹj kãkã nỹ kỹ canoa tóg tá krỹg he mũ. Ti vin kỹ tóg ag tỹ kurã venh há tĩ, canoa vóg tĩ ag.

³⁰ Kỹ ag tóg canoa sĩ ěn térem mũ, goj ki. Canoa se jafã tỹ ag tóg kãki vin mũ, ag tỹ ón kỹ canoa krĩ tá vin jé. Hã ra ag tóg canoa mág ré kỹ ga ra mũ sór mũ.

³¹ Hã ra Paulo tóg vég mũ. Kỹ tóg capitão mỹ, soldado ag mỹ tóg: “ag tỹ pa kỹ ãjag vỹ krenkren ke tũ nĩ,” he mũ.

³² Kỹ soldado ag tóg vãfe kym mũ sir, ag tỹ vãfe tỹ canoa sĩ térem kỹ. Kỹ canoa sĩ ěn tóg kutĕ mũ sir.

³³ Tỹ vaj ken kỹ Paulo tóg vĕnh kar jyvĕn mũ, ag jĕn jé. Kỹ tóg: “semana régre vĕ (mỹr), ãjag fe von kỹ,” he mũ. “Nén ũ kãmĕg tũ ãjag nỹtĩ (mỹr) ver,” he tóg.

³⁴ “Pão ko ra, ãjag tỹ tar há ki krenkren jé. ũ vỹ ter ke tũ nĩ, kỹ ũ vỹ kaganh ke tũ nĩ gé,” he tóg, Paulo ti.

³⁵ Ti tỹ tag tó kar kỹ tóg pão mãg mũ sir. Vĕnh kar rĩnve tóg Topĕ mré vĩ mũ, kỹ tóg kupãn kỹ ko mũ sir.

³⁶ Kỹ vĕnh kar tóg fe tar nỹtĩ sir. Kỹ ag tóg ko mũ gé sir.

37 276 (ke) ěg nýtĩ, canoa mág ěn kăki.

38 Ěg tỹ ko kar kỹ ag tóg goj ki trigo kugjěg mũ, canoa tỹ kănhvy' hen jé.

39 Tỹ vaj kỹ ag tóg vég mũ sir, hă ra ag tóg goj văso ěn ki kagtĩg nýtĩ. Kỹ ag tóg tá rỹnrỹj vég mũ sir, rĩnrĩj ti. Tá kóho tóg há sĩ nĩ. Kỹ ag tóg tag ra canoa tĩn sór mũ.

40 Kỹ ag tóg ferro ěn kykym mũ sir, goj kăki. Kỹ ag tóg canoa vóg jafă kygvăg mũ gé. Canoa krĩ tá ag tóg kur kujén mũ, kóho kato.

41 Hă kỹ ěg tóg rỹnrỹj ěn to mũ mũ sir. Kỹ goj régre tóg jagně ki jun nĩ. Kỹ canoa tóg rỹnrỹj kăra ră mũ sir. Ti krĩ tóg rĩnrĩj krěm ră mũ, kỹ tóg sir tar mũ sir. Kỹ ti nér tóg kam ke mũ sir, goj jũ kỹ. Kỹ tóg mráj mũ, canoa ti.

42 Kỹ soldado ag tóg věnh sigse ag kăgtén sór mũ, ag mrogmro kỹ věnh pigju tũ nĩn jé, ag krenkren tũ nĩn jé.

43 Hă ra capităo tóg Paulo kren han sór mũ. Kỹ tóg ag mỹ: “ke tũg ra,” he mũ. “Ăjag tỹ tũgnũm há nĩn kỹ goj kăra ge vén inhhă, ăjag tỹ ga ra ge vén jé, tũgnũm kỹ,” he tóg.

44 “Ăjag tỹ tũgnũm kórég kỹ kan kri nỹmnĩ, canoa mránhráj kri,” he tóg, capităo ti.

Kỹ ag tóg ge mũ sir. Hă kỹ ěg kar tóg ga tá junjun mũ, krenkren kỹ.

28

Goj văso tỹ Malta tá

1 Ěg tỹ ga tá nýtĩn kỹ ěg tóg ga jiji měg mũ, hă vỹ: Malta, he mu.

² Tá ke ag tóg ěg jagăgtăn mũ. Kÿ ag tóg pĭn han mũ. Ěg mÿ ag tóg: “kăge jĕg ra,” he mũ, ta kutĕ kÿ, kusa jagy tĭn kÿ. Kanhgág ri ke ag vĕ, tá ke ag.

³ Kÿ Paulo tóg pĭnh tĭ mũ, kÿ tóg pĭ ki nĭn mũ. Hă ra pÿn tóg pĭ kăkă nÿ ja nĭ. Rÿ mẽ kÿ tóg tim ke kÿ Paulo prăg mũ, ti nĭgĕ ki.

⁴ Kÿ tá ke ag tóg pÿn ěn vég mũ, ti tÿ ti nĭgĕ to sa kÿ. Kÿ ag tóg jagnĕ mÿ: “ũ tén tĭ hÿn vĕ,” he mũ. “Goj tán kren, hă ra tóg ģ tÿ nĕn han jan kajăm mũ,” he ag tóg, Paulo to.

⁵ Hă ra Paulo tóg pÿn kăvén mũ, pĭ ki tóg tÿ vén mũ. Hă ra tóg kaga tũ nĭ, ti nĭgĕ ti, Topĕ tÿ ti tÿ há' hen kÿ.

⁶ Hă ra ag tóg ti tugnÿm mũ, ti kănhpar ve jé, ke tũ nĭ kÿ ti ter kÿ kutĕ ve jé. Hă kÿ ag tóg ti vég nÿtĭ, hora tÿ hĕn ri ke ki. Hă ra tóg ke tũ nĭ. Kÿ ag tóg ti to jykren măn mũ. “Topĕ tũ mÿ vó?” he ag tóg mũ, ón kÿ, Paulo to. Ag mÿ tóg e tĭ, hă kÿ ag tóg ti to: “topĕ hÿn,” he mũ.

⁷ Goj văso tá ke ěn ag kăfór vÿ tÿ Públío nĭ. Tá tóg ĩn nĭ, ģ japÿ tá. Ěg tÿ tón nÿtĭ tag tá tóg kakó nĭ, ti ĩn ti. Kÿ tóg ěg mÿ: “kăge jĕg ra,” he mũ. Ti mré ěg tóg kură tăgtũ han mũ.

⁸ Hă ra Públío panh tóg kaga nÿ nĭ. Jăgfa kyvénh han tóg, kÿ tóg to rÿg nÿ nĭ gé. Kÿ Paulo tóg ti venh ră mũ. Kÿ tóg ti to Topĕ mré vĭ mũ. Ā nĭgĕ tÿ tóg ti mĕg mũ, kÿ tóg há' he mũ sir.

⁹ Ti han kÿ vĕnh kagyga kar ag vÿ tá junjun mũ sir, goj văso ěn tá. Kÿ tóg ag tÿ há' he kăn mũ, Paulo ti.

¹⁰ Kǵ ag tóg ěg ki rĩr há han mũ. Ěg tỹ kar kỹ canoa ũ kĀra ge kỹ ag tóg ěg mỹ ěg tỹ nén ve sór mũ kar ěn vin mũ.

Roma ra

¹¹ KysĀ tĀgtũ tũg kỹ ěg tóg canoa ũ kĀra ge mũ sir. Cidade tỹ Alexandre tá ke vē gé, canoa ěn. Tá tóg kusa fĩn rĀ ja nĩ, Malta tá. Ti rá vỹ tỹ ti vēgni kĀggrá nĩ, ti retrato ěn ti. Ón kỹ Romano ag topě ũ vē, ti vēgni kĀggrá ti.

¹² Tá pa kỹ ěg tóg mũ kỹ cidade tỹ Siracusa tá krỹg mũ. Kỹ ěg tóg tá kurĀ tĀgtũ tũg mũ.

¹³ Tá pa kỹ ěg tóg cidade tỹ Régio tá junjun mũ. Tỹ vaj kỹ kĀka tóg ěg vóg há han mũ. HĀ kỹ ěg tóg kurĀ régre tũg kỹ cidade tỹ Pozuoli tá junjun mũ sir.

¹⁴ Tá ěg tóg Jesus mré ke ag vég mũ, kỹ ag tóg ěg mỹ: “ěg mré semana tũg nĩ ver,” he mũ. Kar kỹ ěg tóg cidade tỹ Roma ra mũ mũ sir.

¹⁵ Roma tá ke ag tóg ěg kĀmũ mẽ ja nĩ, Jesus mré ke ag. Kỹ ag tóg ěg venh kĀmũ mũ. Cidade tỹ Ápio jamĀ he mũ ěn tá ag tóg ěg kato tĕgtĕ mũ, ěmĀ tỹ Venda TĀgtũ he mũ ěn tá ke gé. Paulo tỹ ag ve kỹ ti fe tóg mrin ke mũ. Kỹ tóg Topě mỹ vĩ há han mũ. Ti krĩ tóg kĀnhvy' he mũ sir.

¹⁶ Ěg tỹ cidade mág tỹ Roma tá junjun kỹ Paulo tóg vyr mỹ nĩ nĩ, vēse ũ ag mré tóg nĩ tũ nĩ. Soldado pir hĀ tóg ti ki rĩr mũ. CapitĀo tóg ti mỹ tag to: “hej,” he ja nĩ.

Roma tá

¹⁷ KurĀ tĀgtũ tũg kỹ Paulo tóg Israel kĀfór ag jé prĕr mũ. Ag vēnh mĀn kỹ tóg ag mỹ: “inh kanhkĀ!,” he mũ. “Se kỹ inh jĕ, Jerusalém tá, kỹ ag tóg tá fóg

tỹ Romano ag mỹ inh fěg, isỹ nén ũ han tũ hã ra, isỹ ẽg jykre mranh tũ hã ra, isỹ ẽg jóg'jóg tỹ ẽg mỹ vėnh jykre nĩm ja ẽn mranh tũ hã ra,” he tóg.

18 “Fóg tỹ Romano ag tóg inh kavãn sór mũ vė, ag tỹ inh ki jẽmẽ kar kỹ. Isỹ nén han ja tũ to sóg ter ke tũ nĩ vė.

19 Hã ra Israel ag tóg inh kato vĩ, hã kỹ sóg sir pã'i mág tỹ Imperador ve sór mũ, ag tỹ isén tũ nĩ jé. Hã ra sóg ẽg povo kavėnh sór tũ nĩ, Imperador jo,” he tóg.

20 “Hã kỹ sóg ãjag jé prěr mũ, sỹ ãjag ki jẽmẽ jé. Ẽg povo tỹ Israel kar vĩ Cristo ve sór mũ. Sỹ Cristo tó hã to sóg se kỹ jẽ nĩ,” he tóg, Paulo ti.

21 Kỹ ag tóg ti mỹ: “ũ tóg ẽg mỹ ã to vėnh rán han ja tũ nĩ, Judéia tá,” he mũ ti mỹ, pã'i ag. “Kỹ ẽg kanhkã ũ tóg ẽg ki jun ja tũ nĩ jé, ti tỹ ẽg mỹ ã tỹ nén ũ kórég han mũ ẽn tó jé,” he ag tóg.

22 “Hã ra tóg ẽg tỹ ã ki jẽmėnh há tĩ, ã tỹ nén to jykren mũ ti. Vėnh jykre tãg tag kato ag tóg vĩ tĩ, vėnh kar ag, hã kỹ tóg ẽg tỹ ã ki jẽmėnh há tĩ,” he ag tóg ti mỹ, Israel mág ag.

23 Kỹ ag tóg ti mỹ kurã nĩm mũ. Kỹ ũn e ag tóg vėnh mãn mũ sir, ti tỹ ỉn krēm nĩ ẽn tá. Ag mỹ tóg Topẽ tỹ tỹ ẽg pã'i nĩ kãmén mũ. Jesus kãmén tóg mũ, ag tỹ hėn ri ke mũn ti ki ge jé. Moisés tỹ ag mỹ vėnh jykre nĩm ja ẽn tó tóg mũ sir ag mỹ, vãsỹ Topẽ vĩ tó tĩ ag vĩ ke gé. Vėnh rá ẽn ki tóg ag mỹ Jesus ti ven mũ sir. Kusã ki ag tóg kãmũ ja nĩ, tỹ vėmėn nỹtĩ ki ag tóg kutyg mũ.

24 Kỹ tóg ũ ag mỹ ki hã tó ti, Paulo tỹ ag mỹ nén tó mũ ti, kỹ ag tóg kri fig mũ. Hã ra tóg ũ ag mỹ há tũ nĩ.

²⁵ Hã kÿ ag tóg vĕnh kãpugpóv kÿ nÿtĩ. Kÿ ag tóg mũ mũ, Paulo tÿ ag mÿ tag tó kar kÿ, ha mẽ. Ag mÿ tóg: “Topĕ kuprĩg tóg tó há han ja nĩ, ti tÿ Topĕ vĩ tó tĩ tÿ Isaiás mÿ: ag mÿ tag tó, hen kÿ,” he tóg.

²⁶ “Ēg jóg'jóg ag mÿ tóg tag tó ja nĩ, hã mẽ: “povo tag mÿ tag tó, hã mẽ: mẽ jé ãjag tóg ke mũ, ón kÿ, hã ra ãjag tóg to jykrén ke tũ nĩnh mũ, hemnĩ,” he tóg.

²⁷ “Kÿ ag tóg ki kagtĩg nÿtĩnh mũ. Povo tag ag vÿ krĩ tũ nÿtĩ, nĩgrĕg kutu ag tóg nÿtĩ gé, kanĕ kyvó ag tóg nÿtĩ gé, ag tÿ nén ù ve sór tũ nÿtĩn kÿ, ag tÿ jĕmĕ sór tũ nÿtĩn kÿ, ag tÿ to jykrén sór tũ nÿtĩn kÿ ke gé. Hã kÿ ag tóg inh ki ge sór tũ nÿtĩ gé, kÿ sóg ag tÿ há' henh ke tũ nĩ gé,” he tóg, Isaiás ti,” he tóg mũ, Paulo ti, Israel ag mÿ.

²⁸ “Hã kÿ sóg, ãjag mÿ tó mũ,” he tóg, Paulo ti. “Ājag tÿ mẽ jãvãnh nÿtĩn kÿ fóg ag vÿ mẽnh mũ, kanhgág ag ke gé, Topĕ tÿ ag krenkren han sór mũ ti. Kÿ ag tóg ti mÿ: hej, henh mũ,” he tóg, Paulo ti, Israel ag mÿ.

²⁹ Paulo tÿ tag tó kar kÿ Israel ag tóg mũ mũ sir, jagnĕ vĩ kafãn kÿ.

³⁰ Paulo vÿ prÿg régre tũg mũ, ã ĩn krĕm nĩn kÿ. Alugar hen kÿ tóg jĕ nĩ, ĩn ĕn ti, kÿ tóg kajãm mũ, Paulo ti, ã jãnkamy tÿ. Kÿ tóg ù tÿ ti mré vĩ sór mũ mÿ: “kãrã ra,” he ti.

³¹ Vĕnh kar mÿ tóg Topĕ tÿ tÿ ĕg pã'i nĩ kãmén mũ sir, fe tar han kÿ. Ēg Senhor tÿ Jesus Cristo kãmén tóg mũ sir. Ũ tóg ti mÿ: “vĩ tũg ra,” he tũ nĩ, ti se kÿ nĩ hã ra.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

CXXX

PDF generated using Haiola and XeLaTeX on 18 Apr 2025 from source files
dated 29 Jan 2022
16af52c8-0e45-5e91-b36c-cd314d36d7fc